

SAN MATEO

Jaayhui'my Jadu'n Nej Jesucristo

Ytun Yjajtì

Je Jesucristo ymij'ap ymijteedy

¹ Cham ngapxa'ñ nmiydäga'ñich pìn Jesucristo y'ap'ajt yteedy'ajt jadu'n nej yhui'my jaybety. Jesucristo je' oy ap'adyii teedy'adyii David etz Abraham.

² Abraham oy ung'adyii Isaac. Isaac oy ung'adyii Jacob. Jacob oy ung'adyii Judá etz y'ajchytijc y'uchytijc. ³ Judá etz Tamar oy ung'adyii Fares etz Zara. Fares oy ung'adyii Esrom. Esrom oy ung'adyii Aram. ⁴ Aram oy ung'adyii Aminadab. Aminadab oy ung'adyii Naasón. Naasón oy ung'adyii Salmón. ⁵ Salmón etz Rahab oy ung'adyii Booz. Booz etz Rut oy ung'adyii Obed. Obed oy ung'adyii Isaí. ⁶ Isaí oy ung'adyii rey David. Je rey David je' oy ytöxyijc'adyii huidi anajty Urías ytöxyijc'ajtpy. E je' ajcxy y'ung'ajti Salomón.

⁷ Salomón oy ung'adyii Roboam. Roboam oy ung'adyii Abías. Abías oy ung'adyii Asa. ⁸ Asa oy ung'adyii Josafat. Josafat oy ung'adyii Joram. Joram oy ung'adyii Uzías. ⁹ Uzías oy ung'adyii Jotam. Jotam oy ung'adyii Acáz. Acáz oy ung'adyii Ezequías. ¹⁰ Ezequías oy ung'adyii Manasés. Manasés oy ung'adyii Amón. Amón oy ung'adyii Josías. ¹¹ Josías oy ung'adyii Jeconías müid y'ajchytijc y'uchytijc. Huin'it Babilonia jäy oy mach je israelitas jäy. Chi mìn:cxxy jìm Babilonia y'it.

12 Jim ma je Babilonia y'it, jim Jeconías oy ung'adyii Salatiel. Salatiel oy ung'adyii Zorobabel. 13 Zorobabel oy ung'adyii Abiud. Abiud oy ung'adyii Eliaquim. Eliaquim oy ung'adyii Azor. 14 Azor oy ung'adyii Sadoc. Sadoc oy ung'adyii Aquim. Aquim oy ung'adyii Eliud. 15 Eliud oy ung'adyii Eleazar. Eleazar oy ung'adyii Matán. Matán oy ung'adyii Jacob. 16 Jacob oy ung'adyii José huïdi oy ñäy'adyii María. E je María oy ung'adyii Jesús huïdi yxii Cristo.

17 Jadu'n oy ñicxy majmactz najtzquëxi' Abraham ixti David. Ma je David jamajmactz najtzquëxi' chi je israelitas jäy yajtzimy yajmajch ma Babilonia y'it, e nañ jamajmactz najtzquëxi' chiini oy ymiñ yja'ty je Cristo.

Jesucristo yma'xung'ajtïn

18 Jadayab capxy ayuc jadu'n nej ymiñ yja'ty je Jesucristo. Jesús ytaj, huïdi anajty yxii María, yi' ti anajty ycapxytungixy co ypigangixy müid José; e ma anajty ca'ni ñaybudigiiyigixy, chi María oy y'ungdzimigy müid yi' Dios yjihui'ñ ymic'ajt. 19 José, yi' ñäy, hue' anajty yi' yajpaty janch tudägy. Ca' anajty xihua'ñ María mayjäyjoty. Hue' janchtiy yhuinma'nybaty co ixmadza'ñ ayüch ameech ca' pin yajnejhuihua'ñ. 20 Huin'it ma jadu'n anajty nihuinmayiy, chi Huindzin Dios tüg y'ángel ñayquëxici cumäyjoty ma José, chi ñimaayi:

—José, David y'ap y'oc, ca' mijcajee mdzachuinmay nej m'octöxyijc'adiiyb María, com yi' y'ung huïdibi yajma'xung'adamy hue' müid Dios yjihui'ñ ymic'ajt ycixpi. 21 Yi' ypadamy tüg y'ung

e mx̄m̄öhüpy Jesús. Jadu'n yi' x̄i'ad̄ȳb com jéḡix̄ co yi' yajpocyñ̄ihuädzam ñaax ycajp.

²² Tüg'óciy jada ytundaayi yjajtaayi yciyxy yca'pxy jadu'n nej je Dios anajty ti nimäy je profeta, je jäy huidi Dios y'ayuc najtzcapx̄iȳp ma anajty jadu'n yjaybetyity:

²³ Je töxyjäy huidibi ca' yëdyjc m̄iddz̄inäy hue' je' ung tzim̄icip. Chi ypadamyb tög je y'ung hue' je' yx̄i'adaan̄p Emanuel.

Emanuel hue' yhuimb̄dz̄imy Dios m̄id̄ ñch ajt.

²⁴ Co José ymäyhuijy, chi cuyduñ jadu'n nej anajty Dios y'ángel ti nimäyii, chi huoy María jadu'n nej j̄ihūiy töxyj̄c'adyii. ²⁵ Per ni ca' ajcxy jadu'n ch̄inaay jadu'n nej jäy yp̄icy ch̄inäy ixti cooni oy María y'ung yajma'xung'aty. Chi yx̄imoy Jesús.

2

Madza' ni'ixpiḡȳb oy co'ix̄iyḡixy pi'c'ung

¹ Jesús yma'xung'ajty ma tög cajp huidi yx̄i' Belén, j̄im ma Judea ñaaxjot, huin'it co anajty Herodes yrey'aty ma yi' j̄imbi naaxjot. Chi huin'it yja'ty ma Jerusalén cajp nij̄jity yëdyjct̄ijc̄ huidibi anajty ti choñ ma x̄i' yp̄idz̄imy, yi' huidibi anajty ajcxy x̄i' madza' ti ni'ixpiḡȳḡixy. ² Chi ajcxy yajtyy:

—¿Ma je judíojäy yrey t̄ibi yma'xung'aty? Ti ñch ajcxy n'ijxi yi' ymadza' j̄im ma x̄i' yp̄idz̄imy, e yi' ñch ajcxy ya miñ nhuindz̄iḡihuaanḡixy.

³ Co je rey Herodes jadu'n m̄idooy, chi ooy ytiḡiy tajp̄i maybi m̄id̄ tög'óciy cajpjäy j̄im Jerusalén.

⁴ Huin'it je rey huomujctay tög'óciy teedyt̄ijc̄ huindz̄ind̄ijc̄ huidibi anajty yaj'ixpijcp yi' Dios yley,

chi yajtiy ma anajty yma'xung'ada'ñ yi Cristo. ⁵ Chi ajcxy y'adzooy:

—Jim Belén ma Judea ñaaxjot, com Dios y'ayucnajtzcapxiiybi jadu'n je' cojaay:

⁶ E miich Belén, mabi Judea ñaaxjot, mij'ajtp mgix'ajtp ca'ydi jac huidi naax jac huidi cajp, com ma miich chona'ñ tüg Huindzin huidi ane' mam yi israeljäy.

⁷ Huin'it Herodes oy yajhuoyii ameech huidibi anajty ti ijxcixy yi madza'. Chi tiybijcy yajxon mina anajty oga'n ti ijxcixy je madza'. ⁸ E huin'it ajcxy quejxy jim Belén. Chi jadu'n nimay:

—Ñicxcix jim e ocnidiu ocyajtiugixy je pi'c'anäg; e co anajty ti mbatcixy, miñ miich ajcxy xyajnimáaygixyich jaydëbi ich nicxy nañ jadu'n nhuindzigiyich.

⁹ Co jadu'n rey najtzcapxiyday, chi ajcxy choñ. E je madza' tibi anajty ijxcixy ma xi ypidzimy, chi ajcxy ijxy jayijp je' anajty ñicxy ma je' ajcxy, ixti coní oy je madza' yhuäcxipy ma anajty je pi'c'anäg yajpaady. ¹⁰ Co je rey ixpiytyjc jadu'n ijxy yi madza', chi ajcxy oy janch jotcujc ñayjihüiyii. ¹¹ Co ajcxy ytijctigiiy, chi ajcxy ijxy je pi'c'anäg miid ytaj je María. Chi jada' ajcxy ñaygojxtinaydaaci huindzigiiy ojadajty ajcxy je pi'c'anäg. Chi ajcxy yaj'ahuach yxuumy aguejtucy abijctucy, chi ajcxy yajpidzimy oori, poom, etz tüg tzooy huidi yxi mirra. Chi ajcxy moy je pi'c'anäg. ¹² Chi cumäyjoty ajcxy nimaayi co ca' huaad yhuimbijtcixy ma Herodes, chi ajcxy ñicxni ma ycajp, jüyöyñaxy ajcxy je Herodes, huingbi tü'aa ajcxy ycuynicx.

Co José etz María yqueegyñicxcixy Egipto

13 Co je rey ixpicytjic ajcxy yhuimbijttaayñi, chi cumäjoty José ijxy tüg Dios y'ángel, chi ñimaayi:

—Pidíg, nicx jim Egipto ñaaxjot mïid yi pi'c'anäg etz mïid yi' ytaj, e jim mhui'mïpy ixti cooni ñich miich nimähuïpy. Com yi Herodes y'ixtähuamy yi' yi pi'c'anäg e yaj'öga'ñ yi'.

14 Chi huin'it José ypidígy mïid tzoön coodz je pi'c'anäg mïid ytaj, chi ajcxy ñicxy jim Egipto. 15 Jim ajcxy y'ijty ixti cooni oy y'ögy je Herodes. Jada je' jadu'n yajcuydun jadu'n nej Dios anajty ti ymïnañ ma yi' y'ayucnajtzcapxïybi: “Jim Egipto ñich n'ung ti nhuoy.”

Herodes pidacy y'ane'mïn co huen pi'c'anäg yaj'öctäyïi ajcxy

16 Co Herodes oy huinma'ñ yajyöy co ti anajty ooy yhuin'ñïyïi je rey ixpicytjic ajcxy co ca' anajty ti ñihuimbidyïi, chi ooy yjot'ambijcy, chi ni'ane'mdïy co huen nicxy jim Belén etz majaty cajp mihuingon Belén, yaj'öctaaygixy tüg'óciy yi pi'c'anäg huïdibi mejtz jimïjt etz huïdibi ca'ni nigooty mejtz jimïjt. 17 E jadu'n jada yajcuyduñ jadu'n nej anajty Dios y'ayucnajtzcapxïybi, je Jeremías, anajty ti cojaay:

18 Jim Ramá yajmïdoy co anajty chachjïy chachyäxy jäy ajcxy; yi Raquel tzachjïyb tzachyaaxp mïid y'ung ajcxy ycixpi, ca' ajcxy anajty yjotcujc'aty mïid co anajty y'ung ti y'öctäy.

19 Co oy y'öcni Herodes huin'it jim Egipto, Dios tüg y'ángel ñayguëxïci cumäjoty ma José. Chi ñimayi:

20 —Pidīg, miidnicx yi pi'c'anäg etz yi' ytaj jim ma yi Israel ñaaxjot jadügtecy com ti y'öctaayñi yi huidibi anajty yaj'ögam yi pi'c'anäg.

21 Huin'it José ypidīg, miid nicxy yi pi'c'anäg etz yi' ytaj jim ma Israel ñaaxjot. 22 Per co José nejhuiy co je Arquelao yi' anajty jim ane'mb jadu'n nej anajty je yteedy Herodes, ooy chigiy nej ñicxip jim. E co jadu'n anajty ti ycumäy co ca' jim ñicxip, chi ajcxy ñicxy jim Galilea ñaaxjot. 23 Co jim yjäty, chi jim chinaydacpijcy ma je cajp huidi yxi Nazaret. Jadayaabi je' jadu'n tun jajt jadu'n nej anajty ycojaayity ma Dios y'ayucnajtzcaxxiybi ñecy co Jesús xii'adiyb Nazareno.

3

Juan el Bautista y'ayuc capxhuäcxy ma tidz naax it

1 Huin'it tiempo nañ jadu'n Juan je Bautista (huidibi jäy yajniibejtpi) ymiñ tüg tig'idum ma Judea ñaaxjot capxhuäcx Dios y'ayuc, 2 ymiñ:

—Jothuimbijtcix ma Dios com yi Dios y'ane'min huingoniñ yi'.

3 Jada Juan yi' je' huidibi je profeta Isaías nigapxy ymiñ:

Jim mijtig'idum yajmidoy tüg ayuc miñañ:
 “Ni'ixiygixy yi mHuindzin ytü'aa,
 ni'ixiygixy tüg tü'aa tiybi.”

4 Je Juan hue' anajty yhuit'ajtpy iyujc nibijc (huidibi jäy ytipy camello) e hue' anajty yhuinip iyujc ac, e yi' anajty yjicxy'ajtpy mu' etz tijaty iyujc päg jim tüg tig'iduum. 5 Chi choon jim Jerusalén jäy etz tüg'óciy huidijaty tzinaayb ma

Judea ñaaxjot, nañ jadu'n huıdıjaty tziinaayb ma Jordán mıjnııba', ñıcx ajcxy ma Juan amıdo'ıjtıy yı' y'ayuc. ⁶ Co anajty ajcxy nıgapxtaaygıxy yı yıocy huıdı anajty tı tundıgooygıxy, huın'ıt anajty ajcxy Juan yajnııbedyıı ma Jordán mıj nıı.

⁷ Per yı Juan y'ıx co may fariseo jäy etz saduceo jäy mıñ anajty ajcxy nııbejtıxy, chí ajcxy nımay:

—ıMiıch ajcxy, m'ajuugy m'amıgüg ahua'n ıyujc! ¿Pın tı xyajni'ıxııygıxy nej jėbi huaad mgögueeccıxy yı ayo'n huıdıbi huıngomb? ⁸ Yajxon jäy'ajtcıx tıydudägy huen nıguėxıgy co tı mjothuımbıjtıxy.

⁹ Ca' jadu'n mdzachmınaangıxy co Abraham xy'ap'adyıı xy'oc'adyıı. İch mııch ajcxy yam ndımnımaayb co Dios ıxtı jėbi yı' yaj'ap'adyıı yaj'oc'adyıı Abraham jada tzaajot ca'ydı mııch ajcxy. ¹⁰ Yı jach nı'ıxı yı' y'ıjtnı ma quıpy y'ıjx, tüg'ócıy quıpy huıdı ca' oy ytm'aty yajpujxp yı', e chí jada' yajnögy jıınjoty. ¹¹ İch, janch yajnııbejtıch mııd nıı, yı' yı' jadu'n nej tüg ıxpejt co tı mjothuımbıjtıxy; per jacminamb tzojc huıdı ajcxy xyajnııbedıpy mııd Dios yjıhuı'ñ etz mııd jıın. Je' ymııd mıc'ajtıı etz cötujcın, nıgı ca'ydı ııch, nı xycapaadyıch nıcxı ycıg nyajtecyjendügyıch.

¹² Ymııd mıc'ajtıı pıjc-huäcxamy yı jäy jadu'n nej jäy huımbojy moc, abıcy pıdäga'ñ actz, abıcy moc pajc. Yujcpıga'ñ moc pajc ma tze'x nınöghıua'ñ yı moc actz moc jaam jıınjoty ma je jıın huıdıbi nıcamınaaxıı ycapıch.

Co Jesús ñııbejty

¹³ Huın'ıt Jesús chooñ ma Galilea ñaaxjot, chí ñıcxı ma Jordán mıj nıı ma anajty Juan

yjäyyajniibety, niibedam anajty yi' nañ jadu'n.

¹⁴ Juan ca'jadim'a'ixi'y, chi nimay Jesús:

—Ich miich ixypy xyajniibejtpich, ¿e miich mimb ma ichi?

¹⁵ Chi Jesús y'adzooy:

—Jadachambi oc'a'ixi' jadu'n, com ooy yi' ycopityity co nguydundayim tüg'óciy tibi Dios xyaj'ane'mim.

Huin'it Juan a'ixiy chi yajniibejty Jesús. ¹⁶ Co Jesús niibejttay, chi Jesús ijxy Dios yihui'ñ nigidägyii jadu'n nej tüg pi'cmuuxy. ¹⁷ E huin'it yajmidoy tzajpcíxy tüg ayuc ymina'ñ:

—Jada je' ich n'ung'ajtypich huídibi ooy nd-zocyich huídibi ooy mid jotcuje nayjihui'yijich.

4

Je mujcu' tuñ ijxta'ni Jesús

¹ Chi Dios yihui'ñ yajnicxy Jesús mijtigüduum jaydëbi je ca'oybi yjot'ixiyb yhuinma'ñ'ixiyb.

² Jim y'ijty jaygay huixchigui'px xi' huixchigui'px tzuum, e huin'itni ooy yiböccodyii. ³ Chi je ca'oybi nimijhuägy Jesús ocjot'ixa'ñ oc-huinma'ñ'ixa'ñ, chi nimay:

⁴ —Pen Dios miich xy'ung'ajtp, nima' jada tzaa huen naygojyii tzajcaagy.

Chi Jesús y'adzooy:

—Jaybety jadu'n ymiñ ma Dios ñecy: “Ca'p jäy tzajcaagyti'ajty nitzinähui'py, nañ jadu'n nitzinähui'py tüg'óciy yi' ayuc huídibi Dios ycapxp.”

⁵ Chi je ca'oybi midnicxy Jesús jim Jerusalén, chi ymidpejty tzajptijc cöduum. ⁶ Chi nimay:

—Pen janch co miich Dios xy'ung'adyii, cödijpnax jilby naaxc'ixy, ca' yi' nej mjadipy com jaybety jadu'n ymiñ co jadu'n ymina'ñ:

Dios yquexyp yi' y'ángeles jigix xycuend'adipy xy-huidzipy m'iid yci', ca'ydi ninej mgönepy ma tzaagop.

⁷ Chi Jesús y'adzooy:

—Nañ jadu'n ymiñ jaybety: “Ca' m'jot'ixipy mhuinma'ñ'ixipy yi' mhuidzin Dios.”

⁸ Jadüg'oc je ca'oybi ym'iid'ajty Jesús ma tüg copn'icx janch cijxpi, e jim yajni'ixi'iyday tüg'óciy naax cajp co ooy m'iidity oy'ajtin etz m'ic'ajt. ⁹ E chi nimay:

—Iich jada miich nmoydähuipy tüg'óciy, pen mi-ich cojxtina' xyhuindzig'i'yich xy'ojadatyich.

¹⁰ Huin'it Jesús y'adzooy:

—Huinhuäctucich miich mujcu', com jadu'n yjaybetyity: “Tüg'pajc yi' m'huindzin Dios yi' mhuidzig'i'huipy m'ojadadipy.”

¹¹ Huin'it je ca'oybi huinhuäctucy Jesús, chi Jesús ñimiini ángeles ycuend'ajti.

Jesús ytung yajtzondacy jim Galilea

¹² Co Jesús nejhuuy co Juan ti anajty yajpidägy pujxtigoty, chi yhuimbijtni jadüg'oc jim Galilea.

¹³ E ni ca' yhui'mi'y jim Nazaret, chi ñicxy jim Capernaum, jim ma Zabolón etz Neftalí y'it. ¹⁴ Jada je' jadu'n tuni jajti jadu'n nej Dios y'ayucnajtzcapxiybi Isaías anajty ti cojaay:

¹⁵ Zabolón etz Neftalí ñaaxjot. Je tü'aa hu'idibi mejypa' hu'idibi a'oy'amy ma Jordán mij ni. Jim Galileajäy chinäy hu'idibi ca' yjudiojäyity.

16 Yi jäy ajcxy huídibi jim tzinaayb agootztuuby ijxpaty ajcxy tüg tñcxin jajin. Je huídijaty anajty ajcxy tzinaayb ma je jibicpi y'anicíy, chi ajcxy ycodicxiy tugi tñcxin jajin.

17 Ixti huin'it Jesús ytigíy ayuccapxhuäcxp yminañ:

—Jothuimbijtcix, yajmingix yajmejtzcix mjet mhuinma'ñ ma Dios, com yi Dios y'ane'min huin-gonip yi'.

*Jesús nimay nimidaax je acxmajtzpi:
“Pajamgich”*

18 Jesús tüyöyb anajty ma Galilea mejypa', co ijxpaty metz yéydijc ac tüg quëxpi, hue' anajty yi' je' je Simón, huídibi nañ jadu'n yxi Pedro, e je jadügpí hue' je' anajty Andrés. Acxmadzi anajty ajcxy yi' ytung'ajty e jim anajty ajcxy yi' tzachnigöhuich y'acxmadzi'ñ. 19 Chi Jesús nimay ajcxy:

—Pajamgich, ñich miich ajcxy nyajni'ixihuipy nej jäy myaj'ixpigipy je Dios ytiy'ajt.

20 Huin'it je' ajcxy ixmajztay tüg'óciy yi' y'acxtzaay, chi ajcxy panicy Jesús.

21 Hueeni jac'amijci'm Jesús ijxy janimetz Zebedeo ajcxy ymang, je Jacobo etz Juan. Jim anajty yi' ajcxy ma tüg barco miid yteedy, yi' anajty ajcxy yi' jim chach'adagíy y huídibi mi'acxmajtzciy. Chi ajcxy Jesús yhuohui. 22 E huin'it ajcxy ixmajztay je barco etz yi' yteedy, chi ajcxy panicy Jesús.

Jesús yaj'ixpicy mayjäy

23 Huídijttay Jesús ma tüg'óciy Galilea ñaaxjot, yaj'ixpicy jäy majaty je naymujctac cajp cajp. Capxhuäcxy yi' Dios ytiy'ajt etz nañ jadu'n pa'mjäy yajtzocy huen ytimyhuidipá'mity anajty ajcxy

ymiid. ²⁴ Chi Jesús oy yajnejhuñyñi ma tüg'óciy yi Siria ñaaxjot, e chi ajcxy miiidmiñ ma Jesús tüg'óciy huidiyaty anajty ajcxy ca'oybi miiid, etz huidiyaty anajty ajcxy cíxuxy tecyxuxy, chi Jesús yajtzoocy. ²⁵ Huin'it Jesús ypanicxi mayjäy huidiyaty anajty ajcxy tzinaayb ma Galilea ñaaxjot etz yi Decapolis jäy, nañ jadu'n Jerusalén jäy etz huidiyaty tzinaayb ma Judea ñaaxjot, nañ jadu'n huidiyaty anajty ajcxy tzinaayb a'oy'amy ma Jordán mij nii.

5

Je tiy'ajt huidibi Jesús ycapx ma tüg cögor

¹ Co Jesús ijxy tüg'óciy je mayjäy, chi nicxy ma tüg copnicx, e chi jim y'ixtacy. E huin'it je' y'ixpijcpidijc ajcxy yjübigiiy. ² Chi Jesús ytigiiy yaj'ixpijcp ymínañ jadu'n:

Je pinjaty ajcxy jotcújicp

³ —Janch jotcuyc je jäy ajcxy huidibi nejhuñyb co yajmayajtpy Dios y'oy'ajt, yi' ajcxy paatip Dios y'ane'min.

⁴ Janch jotcuyc je jäy ajcxy huidi yajpatp taj may, yi' ajcxy yajmöhuam jotcuyc'ajtin.

⁵ Janch jotcuyc je jäy ajcxy huidibi yung naxpy jäy'ajtp, yi' ajcxy padaamb tüg'óciy je huidi Dios ti yaj'ahuanii.

⁶ Janch jotcuyc je jäy ajcxy huidibi cuydunamb huidibi Dios chojcpy, Dios yi' ajcxy pubedib.

⁷ Janch jotcuyc je jäy ajcxy huidibi pa'ayoob huenyimpinjäyity, Dios nañ jadu'n ajcxy pa'ayohuib.

⁸ Janch jotcuyc je jäy ajcxy huidibi huadz yjot yhuinmañ, yi' ajcxy y'ixipy yi Dios.

⁹ Janch jotcuyc je jäy ajcxy huidibi ca' ti tzip tzojccixy, com yi' ajcxy Dios ung'adib.

¹⁰ Janch jotcuyc je jäy ajcxy huidibi yajnixiicp yajni gapxp müd je Dios ytiy'ajt ycixpi. Yi' ajcxy idamb ma Dios y'ane'min.

¹¹ Janch jotcuyc miich ajcxy co jäy jibic xytungixy co nigooob xyñihuambejtcixy etz capxcixy huidijaty ca' ytiy'ajtity müd iich ycixpi. ¹² Xondaaccix jotcuj'ajtcix co mbadaangixy tüg oy'ajtin jii by tza-ppjoty. Nañ jadu'n ajcxy ixhuidijty pahuidijty je Dios y'ayucnajtzcaxiybi jecy'ajty.

Miich ajcxy je tudägyjäy ya naaxhuiñ

¹³ Jadu'n nej caan ca' yajpüch je tzüch jüxcy tim jadu'n miich ajcxy myajpaady ya naaxhuiñ. Pen je caan ca' müd ti xücx'ajtin, ¿nej jëbi nyajtuunim? Ca' y'oc'oyyajtunity, chi yajnajtzxidiyñi, chi yhuaani tembejt hua'cpejt.

¹⁴ Oc'ix tüg je cajp jim copcix, ca' jëbi mhuijtzyüdzim mgoyüdzim. ¹⁵ Co tüg jin nyajtoyicim, ca' huaad tu'tz ngöjupim. Hue janchtiy co nyajtiicxim cix, huin'it jëbi xycodicxtaayim jadu'n nej ajt nyajpaatim ma tijc. ¹⁶ Nañ jadu'n miich ajcxy mdzinaaygixy tudägy ma ajcxy je mayjäy jaydëbi ajcxy ixipy je oybi huidi miich ajcxy mdumyb. Huin'it ajcxy ojadadipy je mDios teedy huidibi jii by tzaippjoty.

Jesús yaj'ixpicy nej yi' yi' Dios ycötujcin

¹⁷ Ca' mhuinmay co iich ti nmiñich ya co nbiganich je Dios y'ayuc je' huidibi anajty ti jaay Moisés etz je profetitijc. Ca' iich nyajmijaagixa'ñ je cötujcin, iich ti nmiñich co nguyduna'ñich jadu'n nej ymiñ jaaybety. ¹⁸ Janch tiy'ajt jadu'n

nej nimaaygixy, je huídibi mimb jaaybety jadu'n tundáhuam jajtáhuam. Ni tüg letra oy mabaad ymúdzity nicxy ycayajcuyduñ. ¹⁹ Je jáy huídibi ca' nimidooy je Dios ytiy'ajt oy yjadim mutz-jaty etz yaj'ixpicy jáy jadu'n, je' ajcxy padamb je mutzpi tigiydac ma Dios y'ane'min. Paady je jáy huídibi yaj'ixpijcp jadu'n nej tiy'ajt ymina'ñ, e paduñ jadu'n nej yaj'ixpicy, je' ajcxy padamb tüg je mijpi tigiydac ma Dios y'ane'min. ²⁰ Ich miich ajcxy nimaayb, pen ca' miich ajcxy jac'oy mdúngixy ca'ydi fariseos etz escribas ajcxy, ca' nimina mdigihuipy ma Dios y'ane'min.

Jesús yaj'ixpicy co ca'p huaad pin yjotmädy

²¹ Miich ajcxy mnejhuuygixy jadu'n nej yi m'ap mdeedy ajcxy ayuc yajhui'my: “Ca' jáy myaj'ögip; e pin anajty jáy yaj'öcp ypaadip je tzaachypi.”

²² Ich miich ajcxy jadu'n nimaayb pinjaty ymigütiic mijotma'tp, je' Dios tiydunaanipy; e pin ymigüg xüdiip tzuudiip, yajtiydunipy je' ma Dios tiydundac; e pin ymigüg tzuudiip locidiip ayo'ndumb, je' y'ity co ñicxip ayoodactuuby.

²³ Pen myajnicxpy miich mhuindzigi'ñ ma Dios ytiic, e pen jim jäymetzgodyii co mmigüg ti xyhuin'innaxy ti xyhuincapxynaxy yinjaty hueenjaty, ²⁴ jim myajhui'm je huindzigi'ñ ma je al-tar yhuinduu, e nicx jayijp nayyaj'oyihuii müd je migüg, huin'it mhuimbedip e chimgiyecy je mhuindzigi'ñ.

²⁵ Tzojc naygapxjotcidägi müd je midzip, pen yam müd tüyöy ni'am tü'am, ca' jecyity co je midzip xyciyegip ma juez, e je juez xyciyegip ma je policia, e je' nicxy xypidägy pujxtigoty. ²⁶ Janch

tij'ajt ñch miich nimäy co ca' jibby mbidzimipy ixti cooni mgüejtähuipy je meeñ.

Jesús yaj'ixpicy co ca'p ndundigóoyimipy müd hu-ingbi töxyjäy

²⁷ Miich ajcxy mnejhuñyb co jecyip tij'ajt ymina'ñ: “Ca' mmidundigoyipy huingbi töxyjäy.”

²⁸ ñch miich ajcxy nimaayb, pen ji pin huindixy tüg töxyjäy, e jot'adñyb nejjaty, ti je' anajty ñitundigooyñi ma yjot yhuinma'ñ.

²⁹ Pen yi mhuiñ a'oy'amybi xyajtundigoyamb tim yajpidzimb; jac'oy co tüg'idu'mbi mhuiñ ytigoyipy ca'ydi co cixyca'px mnicxipy jijnjoty.

³⁰ E pen yi mgi' a'oy'amybi xyajtundigoyamb tim ixpux etz najtzjibibi' jiguem; jac'oy co tüg mgi' ytigoyipy ca'ydi co mmnicxipy metz mgi' jijnjoty.

Jesús yaj'ixpicy co jäy ca'p huaadytöxyijc ixmach mañ'ajtñgixy

³¹ Nañ jadu'n ymiñ jaaybety: “Pin ixmajtzp ytöxyijc, huen möhuipy tüg necy ti ycixpi co ñay'ixmájtzigixy.” ³² ñch miich ajcxy nimaayb, pen ji pin ixmach ytöxyijc, e ca' anajty ti ytundigooy müd huingbi yëydijc, je yëydijc anajty nigiydeyñyb ytöxyijc co anajty ytundigooy müd huingbi yëydijc; pin yëydijc pijcp müd je töxyjäy huñdibi anajty ti yaj'ixmach, pocytumyb je' anajty.

Jesús yaj'ixpicy nej nguyduunim tñbi n'ahuanñyim ma Dios yhuinduu

³³ Miich ajcxy mnejhuñyb nej jecy'ajty m'aptijc mdeedytjic ajcxy yajnimay: “Ca' ñigo ti m'ahuanñhuipy, mguydunipy jadu'n nej anajty ti mmina'ñ.” ³⁴⁻³⁶ Per ñch miich ajcxy nimaayb: ni

mga'ibaadip ni mgacapxpaadip; ni mgamina'nip; "y'ijxpy tzajpjotyipi," com yi' Dios chinaydac. E ni mgamina'nip, "y'ijxpy naaxhuiñybi," com Dios yajpatp oy ytimymaajity. E ni mgamina'nip; "y'ijxpy Jerusalén," com jim je' Dios chajptijc; ni mga'ibaadip ni mgacapxpaadip mgohuajc, com ca' mjaty myaj'ahuimbity poob o tzixy tüg cöhuay. ³⁷ Hue' janchtiy, tiydudägy minangixy: "oy" o "ca'." E pen miich ajcxy anaxy jaccapxp jadu'n mujcu' y'ayuc je' anajty ajcxy mgapxpy.

Jesús yaj'ixpicy co ca'p huaad jibic nyajhuimbijtim

³⁸ Miich ajcxy mnejhuib co jecy'ajty yajminañ: "Pen ji jäy mhuiin xyajpidzimi, nañ tim jadu'n yhuiin myajpidzimipy; pen ji migüg mditz xyajpidzimi, nañ jadu'n myaj'ahuimbidity." ³⁹ Per ñich miich ajcxy nimaayb: Ca' myaj'ahuimbidity jibicpi ma migügtijc; pen ji pin xycoxy ma mhuiñyjip tüg adu'mbi, jac tim mo' jadüg adu'm'amybi. ⁴⁰ Pen ji pin xyxiy e xypigaani yi mnijen, najtz'ixi', huen xyajnicxi nañ jadu'n mjocx huit. ⁴¹ Pen ji pin adzip tzimy xyajminicxañ tüg kilómetro jiguemity, yajnicx jac tim jadüg kilómetro. ⁴² Pen tijaty xpijctzoohui, mo'. E pen ji pin xyminuucxañ, yajnuucx.

Co ndzojicim nmidzip

⁴³ Jadu'n ymiñ jaaybety nej jecyip Moisés yjay: "Migüg'adii yi' huidibi xymigüg'ajtp, e midzip'adii yi' huidibi xymidzip'ajtp." ⁴⁴ ñich miich ajcxy nimaayb: Tzoc yi' huidibi ajcxy xymidzip'ajtp, etz mibijctzoohui ma Dios huen y'oy'ajtin paady yi' huidibi xyñigapx xyni'ojib, e

nañ mi'oyjäy'at yi huídibi xyca'ixamb. ⁴⁵ Huin'it miich ajcxy xy'ung'adüby yi Dios tzajpjoty pi huídibi yxi yajtiicxp yajjajp ma oyjäydijc etz ma jibicjäydijc, nañ jadu'n yajtüy ma jibicjäydijc etz ma oyjäydijc. ⁴⁶ Pen miich ajcxy mdzojcpy je huídibi xychojcp, ¿ti jäygidacín yi' m'ocpadamyb? Nañ jadu'n yi' ajcxy yja'idüitzp yi pocyjäydijc etz yi yajcogüeiptidijc. ⁴⁷ Pen miich ajcxy mgapxpcxyp yi mjugymigüg, ¿ti oybi yi'? Nañ jadu'n ajcxy yi' yja'idüitzp yi huídibi ajcxy ca' Dios nejhuüygixy. ⁴⁸ Jäy'ajtcix tudägy jadu'n nej ajcxy yi mdeedy tzajpjoty pi ytudägy.

6

Jesús yaj'ixpicy co nduunim oy yjäy'ajtin

¹ Ca' mdungixy je oybi ma jäy y'ixy yhuindixy müd co mdzachyajhuindixcaangixy co mdungixy oybi. Pen jadu'n m'idüitzcixy mDios Teedy huídi jüby tzajpjoty tzinaayb, ca' ajcxy xymöhua'ñ je oy'ajtin. ² Paady co mbubedipy mmigüg, je ay-oobi jäy huídi yajmayajtpy tijaty, ca' huaad mni-gapxy mnimiydägy o mnaygömayii co anajty ti mmöy tijaty. Yi' jadu'n idüitzp je jäy huídi mijcix nayjihüüyip huídi anidaacp co huen jäy y'ixyii mijpidägyii co anajty jadu'n y'idich. Janch üch miich ajcxy jadu'n nimaaygix co yi' ti patcixy je oy'ajtin. ³ Co miich mmöhuipy mmigüg tijaty yajmayajtpy, hue' janchtiy mdunipy ca' myajnejhuühuipy huídi müd mnaymigüg'adyii. ⁴ E co miich amon m'idipy, mDios Teedy huídi ijxp co amon tijaty mduñ, je' xymöhuamb tüg oy'ajtin mayjäyduum.

Jesús yaj'ixpicy nej Dios mmibijctzoohuim

⁵ Co miich ajcxy Dios mmibijctzoy, ca' jadu'n m'iditczixy jadu'n nej je jäy huídibi capxtacp ma Dios huin aguy ahuac aguy. Yi' ajcxy capxtacp ma Dios huäctina' jiiiby tzajptigoty jaydëbi jäy y'ixiyyb etz ymijpidägiiyb. Ich jëyi jadu'n nimaayb, co jadu'n oy'ajtín'adüby. ⁶ E co miich Dios mmibijctzoy, nicx tigoty etz m'agihuipy je mdijc aguu. Huin'it Dios mibijctzou. E je Dios y'ijxpy ymidooyb co jadu'n mmibijctzoy, e je' je m'oy'ajtín xymöhuipy mayjäyduum.

⁷ Com Dios mmibijctzoy, ca' m'agapxiyo'cip je huídi anajty ti m'occapxi, jadu'n nej ajcxy y'iditczixy huídi ca' nejhuiygyxy Dios ytiy'ajt. Yi' ajcxy huinma'ñypidägy co miid ajcxy ymay'ayuc huin'it ajcxy ymidoohuiyb. ⁸ Ca' jadu'n m'iditczixy jadu'n nej je' ajcxy; mDios ñejhuuyb ti miich ajcxy myajmayjajtpy ma anajty ca'ni mbijctzooñi. ⁹ E jadu'n miich ajcxy Dios mibijctzohuiipy, jadu'n mina'nip:

Dios Teedy, miich huídibi tzajpjoty tzinaayb; huindzigy miich mxii y'ity.

¹⁰ Huen miñ ya miich yi m'ane'min. Huen mdzojcín yajcuyduñ ma je jäy yjot yhuinma'ñ jadu'n nej yajcuyduñ jiiiby tzajpjoty.

¹¹ Mooygich ajcxy ngaayín n'uucín jabom jabom.

¹² Méecxibich ajcxy nbocy ngaydey huídibi ich ajcxy ndundigooyb, jadu'n nej ich ajcxy meecxyich huídibi ajcxy xymidundigooybich.

¹³ Ca' m'a'ixiy co ich ajcxy nhuinma'ñ tigoyipich. Yajnihuaatzcích ajcxy ma yi jibicpi. Co miich

yi' mje' je cötujcïn, je mic'ajtin etz je oy'ajtin huinixii huinítiempo. Amén.

14 Pen miich ajcxy mhuinmeecxyp je huidibi xymidundigooygixp, je mDios Teedy huidibi tza-jpjoty je' nañ jadu'n xyhuinmeecxip miich ajcxy mbocy. 15 E pen miich ajcxy ca' pïn jäy mhuinmeecxy nej xymidundigooygixy, nañ jadu'n mDios ca' xyhuinmeecxip ajcxy ma ti mdundigooygixy.

Jesús yaj'ixpicy nej huaad n'ijtim jaygaay

16 Com ajcxy m'ida'nip jaygaay jay'ügy (mïna Dios mmibijctzoogixy), ca' mnaybidáaccigixy tajy may, jadu'n nej ajcxy iditczixy yi' huidibi ajcxy minamb co Dios mibijccixy e ca' yjanchity. Yi' ajcxy yajtigajchpy yhuiñyijp jigix jäy ajcxy oc'ixiiyb co jaygaay jay'ügy y'ijtcixy; jëyi jadu'n oy'ajt'adiyb. 17 Miich ajcxy co m'idipy jaygaay jay'ügy jotcujc naybidägi, caax mgohuajc etz puj mhuin mjijp, 18 ca'ydi myajniguëxigy mayjäyjoty co m'ity jaygaay jay'ügy, hue' janchtïy myajniguëxig ma je mDeedy huidibi ca' yaj'ijxy; e je mDeedy huidibi ijxp huidibi miich ajcxy ca' mduñ ijxna' quëxna' yi' xymöhuipy oy'ajtin mayjäyduum.

Je jugy'ajtin tzajpjotypi

19 Ca' nigi m'adzocy huidibi ya naaxhuiñ, je' co ya huindigooyb oy ytimtijity huidibi yi' huech yajhuindigooyb, huidibi tougaayip etz ma je meetzpi ajcxy meetzcixy pigiccixy tijaty. 20 Je' miich nijot'ajtcixy je' oy'ajt huidibi miich ajcxy Dios xymöhuamb jiiiby tzajpjoty ma ca' huech yajhuindigooy ni ti, e nañ ni ycatougaayii ni ti, etz ma je meetzpi ca' ajcxy meetzcixy pigiccixy tijaty.

21 Ma miich ajcxy m̄id̄ity je oy'ajt nañ jiiby ajcxy mjot mhuiinma'ñ p̄id̄äg.

Yi mhuiin jadu'n yi' nej t̄üg t̄icx̄in

22 Yi mhuiin yi' yi' jadu'n̄ip nej t̄üg t̄icx̄in jain ma mn̄in̄icx̄, e paady pen ca' miich yi' mhuiin xyajtund̄igoy, t̄üg'óc̄iy mjot mhuiinma'ñ huädz yi'.

23 Pen miich mhuiin xyajtund̄igoyb nañ jadu'n mjot mhuiinma'ñ hūidi miich m̄id̄ ca' y'oȳity, jadu'n yi' nej coodzp̄i j̄ac tim n̄iḡi ca' y'oȳity ca'ydi je coodzp̄i!

Dios etz je comeñ'ajtin

24 Ni t̄üg p̄in ca' huaad m̄id̄ tuñ metz huindz̄in com m̄ijotma'ti t̄üg je', e jadüḡp̄i choḡipy; o ixtij̄ipy t̄üg e jadüḡ ym̄iḡüg'ad̄īyb. Nañ jadu'n ca' huaad miich ajcxy metz m'ojadajtcixy, Dios etz je meeñ.

Dios ycuend'ajtpy yi' yj̄äy

25 Paady īch miich ajcxy n̄imaayḡixy: Ca' mdzachhuiinmaayḡixy ti ajcxy mn̄itz̄in̄ahuipy, ti ajcxy mgaȳipy m'üḡipy o ti ajcxy mhuit'ad̄īyb mducxy'ad̄īyb. MDios yi' ti xymooyḡixy je mjugy'ajtin, e paady yc̄ixp̄i yi' nejhūīyb ti ajcxy myajmayjajtpy. 26 Oc'ix miich ajcxy yi' joon hūidi queec-hūid̄ijtp. Yi' ajcxy ycanīipcixy ycatunḡixy, nañ ni ca' yi' ajcxy yujc̄pīccixy ma tze'x. Miich ajcxy mDios Teedy hūidi tzajp̄joty tz̄inaayb, je' moydaayb hūidi ajcxy yi' yj̄icxyp. E miich ajcxy mjactzoobatp ca'ydi yi' joon. 27 ¿P̄in ji ma miich ajcxy, ooy m̄ij jahuinmay, j̄eb̄i t̄üg nuux yjacyeegȳi?

28 ¿E na'amy co miich ajcxy mdzachnidajy mdzachnimay m̄id̄ je mhuit mducxy yc̄ixp̄i?

Oc'ix miich ajcxy nej yoñ tüg je pijy huidi yajpatp tun niġap. Ni yí' ycatuñ ni piidy. ²⁹ Per janch tiy'ajt jadu'n nej nimaayġixy, ni je comeeñjāy huidi yxii rey Solomón, ni ycaquipxíy je' yxojxin miid je pijy. ³⁰ E pen mDios xojxpy jadu'n je aay ujtz cham etz tzojcy ytítztāy ñicxtāy, jac niġi miich ajcxy Dios xymöhua'ñ huídibi myajmayjajtpy, miich ajcxy huídibi hueeni mmibijcin. ³¹ Paady ca' niġoobi mdzachhuinmaayġixy ma ajcxy mbaadip ti mgayipy m'ügipy o ti mhuit'adiyb mducxy'adiyb. ³² Yi jāy ajcxy huídibi ca' mibicy yi Dios oy tzach nijot'ajtcixy jadyaabi, per miich mDeedy huídibi tzajpjoty je' ñejhuiyb ti miich ajcxy myajmayjajtpy. ³³ E pen miich ajcxy mbidacpy Dios jayijp ma mjot mhuinma'ñ etz mguydun ajcxy yí' y'ane'min, huin'it miich ajcxy Dios xymöhuiipy tijaty myajmayjajtpy. ³⁴ Paady ca' mhuinmaayġixy cham miid je jabom cixpi, je' co je jabombi ymimiñ je tajin mayin. Tzoc mijotcujc'ajtim je tajin mayin huidi cham nminajx nyajnajxim.

7

Ca' mbocy ixy yi mmigüg

¹ Ca' m'ix'ijxpy mba'ijxpy ti mmigügtijc ytundiġooyb, jġix ca' Dios xytiydunipy chaachytunipy. ² Pen miich m'ix'ijxpy mba'ijxpy mmigügtijc ti ytundiġooyb, nañ jadu'n miich Dios xytiydunipy xychaachytunipy, e yi quipxi'ñ huídibi miich mhuaryb quipxi'ñ, nañ yí' Dios yajtunamyb ma miich. ³ ¿Nej co miich m'ixy huídibi mmigüg ytumyb e hueeni

ytundigooyb, e ca' mnay'ixyii hu'idibi miich jac mij mdundigooybi? ⁴ ¿Nej jëbi mmigüg m'ocnimäy: “Nbubedamybich miich ca'ydï mjacpocytuñ”, e miich yam m'ocmïdpi jac mij pocy? ⁵ Miich ci'm mnayhuin'ïñyïi. Nicx jayïjp mbocy mgaydey ocyajhuädz, huin'it jëbi mbubety je mmigüg.

⁶ Ca' mmöy yi jibicjäydijc hu'idibi Dios yjë'ajty co nicx camij'ijx camijpidaaccixy; ni mgayegipy Dios y'ayuc ytiy'ajt ma yi jäy ajcxy hu'idibi ca' tzojccixy Dios y'ayuc ytiy'ajt.

Nbijctzoohuim n'amidoohuim Dios

⁷ Mibijctzougix yi Dios e yi' xymöhuipy ajcxy; ixtaaygix, huin'it mbáatcixipy; cogapxïygix e ahuädzip ajcxy mdijc aguu. ⁸ Com pin tijaty pijctzoob ypaatyp yi'; e pin tijaty ixtaayb ypaatyp yi'; e pin cogapxïyb ma tijc aguu, yaj'ahuaatzip ytiyc aguu.

⁹ ¿Nej ji jada' miich ajcxy nidügti co m'ung pijtzoohuipy tzajcaagy nej mmöhuipy tüg tzaaji?

¹⁰ ¿O pen ypijctzooby tüg acx nej mmöhuipy tüg tza'ñi? ¹¹ Miich ajcxy oy mjibicjäyity e mjaityp ajcxy nej m'ung m'anäg mmöhuipy je oybi. ¡Ñigi Dios Teedy tzajpjotypi möhua'ñ je oybi pinjaty pijctzoob!

¹² Tzinaaygix tiydudägy miid je mmigügtijc, pen miich ajcxy mdzojcpy co je mmigügtijc chinähuipy tudägy miid miich ajcxy; com jadu'n y'ane'my Moisés yley etz yi Dios y'ayuc najtzcapxïyb ajcxy ñecy.

Je xützpi tü'aa

¹³ Tigïygix ma yi tigiyïydac xützpi: yi tigiyïydac etz yi tü'aa hu'idibi ja'tp ca'oydactuuby mij huin yi',

e may jäy ajcxy oy ji ytiġiyiġyġy. ¹⁴ E janch je tiġiyiydac etz yi tü'aa huídibi ja'tp ma je jugy'ajtín huínixiibi, xüdz je' etz tzip naxiinyñi; janch tim hueeni jäy huídibi ji nicxiyb.

Yi jäy yhuinma'ñ mïd ñiguëxġy pen ojjäy o pen ca'

¹⁵ Nayguend'ájtigix mïd yi jäy aniġatypi huídibi ajcxy minamb co Dios ytiy'ajt yaj'ixpijcp, huídibi ajcxy huídijtp janch yung janch naxy ñaybidaaccixy nejihuïy ooy oy huinma'ñ mïdity; niġoobi ajcxy jadu'n ñaybidägyii, ymïd ajcxy jibic-huinma'ñ. ¹⁶ Miich ajcxy jëbi m'ijxcapy nejaty ajcxy mïdity chinaayin yjugy'ajtín; ca' pin caamuxy cha'm tucy ma apy quipy, e nañ jadu'n ca' pin higo tïm tucy ma jaam'apy quipy. ¹⁷ Je quipy huídibi ooy y'oyity, oy yi' ytiim'aty. Je quipy huídibi ca' y'oyity, ca' yi' oy ytiim'aty. ¹⁸ E je oybi quipy ca' huaad ytiim'aty jibic. E je quipy huídibi ca' y'oyity ca' ytiim'aty oy. ¹⁹ Tüg'óciy je quipy huídi ca' oy ytiim'aty, cixy yajpujxp je'. Chi jada' yajnögy. ²⁰ Nañ jadu'n miich ajcxy jëbi mnejhuïy jadu'n nej jäy yjäy'aty co m'ixipy nej chinäy.

Ca' nidüg'óciy jäy ajcxy ytiġihuipy ma Dios

²¹ Ca' nmïnaanım nidüg'óciy jäy ajcxy ytiġihuipy jii by tzajpjoty huídibi xyñimaaybich: “Huindzin, Huindzin”, jëda'ajty ajcxy tiġihuamb huídibi ycapxymidooyb je Dios chojcín y'ane'min. ²² Mayjäy oy mïna'na'ñ huin'it xiï huin'it tiempo: “Huindzin, Huindzin”, ti iich ajcxy ngapxhuäcxy miich m'ayuc, e mïd miich mxii

ti ñch ajcxy nyajpidzimy je ca'oybi; etz miid miich mxñ ti nduñ ñch ajcxy mij huinma'ñ. ²³ Huin'it nimähuipy: “Caminaabi miich ajcxy ti nga'ixy'adyii; huinhuäctutcih miich jibic tumbidijc ajcxy.”

Je mejtznajxpi je tiy'ajt cop

²⁴ Nidüg'óciy pinjäy huidibi xymibijcpich etz midooyb jadu'n nej ñch n'ane'myich yi' ajcxy quipxyjaty miid je jäy huidibi cohuinma'ñ huidibi ytijc ycojp ma yhuingixity. ²⁵ Co ymicpojtüy etz ycomy je mij ññ, ca' ypadyii ññgom je tijc, je' co anajty cixy je' ycojyity. ²⁶ Per yi' ajcxy huidibi midoob e ca' cuyduñ huidibi ngapxpich, je' jadu'nip nej tüg jäy huidi janch loci huidi ytijccoj ma pu' jot. ²⁷ Co ymiñ je mic poj tuu, chi ycomy je mij ññ. Chi yciday je ytijc; mij ayo'n oy yjajti.

²⁸ Co Jesús ycapxtay ymiydactay, chi je jäy ooy huinmay jadu'n nej anajty ti yaj'ixpicy. ²⁹ Com je' co Jesús anajty yaj'ixpicy nej tüg huidibi cötujcin miid, ca' yjadu'nity nej je escribas ajcxy.

8

Jesús yajtzögy tüg jibic nibützpa'mmiidpi

¹ Co Jesús oy chooni ma je cögop, chi ypagidaci mayjäy. ² Huin'it ñimiini tüg jäy jibic pützpa'mmiidpi. Chi ycojxtinay'ahuüy ma Jesús yhuinduu. Chi minañ:

—Huindzin, pen m'a'ixiyyb jëbi xyajtzögyich.

³ Huin'it Jesús nidoofñ je jäy. Chi nimay:

—Ndzojcpyich, jëbi mdzögy.

Co Jesús jadu'n nimay je pa'mjäy huin'itiy je ypützpa'm oy ytigooy. ⁴ Chi Jesús nimay:

—Ca' p̄in myajnimäy; n̄icx janchtiy ma je teedy. Min̄icx t̄üg huindzigi'ñ hūidi Moisés y'ane'my. Huin'it j̄ebi yi j̄äy ajcxy ixipy co ti m'agidägy.

Jesús yajtzögy t̄üg capitán romano ymang

⁵ Co Jesús yja'ty jim Capernaum huin'it t̄üg capitán ñimiini e ycohuan̄iy. ⁶ Chi ñimaaȳi:

—Huindzin, jim ñich t̄üg ndumbi ma ñich ndijc hūidi tim c̄ocnaayñip, ca' y'ocyücxni.

⁷ Chi Jesús minañ:

—Ñich n̄icxy nyajtzögy.

⁸ Chi je capitán y'adzooy:

—Huindzin, ca'p ñich n'oyj̄äyity, ca' yhuaadity mdiḡihuiipy ma ñich ndijc, j̄eyi miich nigoo capxy e ti anajty ñich ndumbi chögy. ⁹ Ñich nañ jadu'n ane'my n'ityich, e nañ nm̄idich soldadt̄ijc c̄'am. Co ñich nimäy: “N̄icx”, n̄icxp; e co ñich nimäy: “Min”, mimb; e co n'ane'myich je nbödumbich huen tijaty tun, ytumyb.

¹⁰ Co Jesús jadu'n m̄idooy, chi nigoōbi ycijxy ycuejty. Chi ajcxy nimay hūidi pahuidij̄t̄ip:

—Janch tiy'ajt jadu'n nej n̄imaayḡixy, ma Israelj̄äy ymiñ, ca' jadu'n ti nbaadyich hūidi oy mibicy jadu'n nej jadayaabi ȳeydijc. ¹¹ Ñich jadu'n n̄imaayb co mayj̄äy oy miinaanḡixy xīipidzimy'amy xīicidägy'amy, chi ixtäga'ñ quipxyi m̄id Abraham, Isaac etz Jacob j̄iiby ma Dios y'ane'min. ¹² Je judíoj̄äy hūidibi ixyipy ajcxy j̄ebi yjatzinäy j̄iiby tzajpjoty, je' ajcxy n̄icxamb agootztuuby, j̄iiby ajcxy yj̄ihuiipy yäxipy etz y t̄ītzmúcxipy yt̄ītqueedipy.

¹³ Huin'it Jesús nimay je capitán:

—Nícx ma mdíjc. Jadu'n nej miich xymibicyich, ti ñch yam nguyduñ.

Chi je tumbi oy chögy tim huin'it hora.

Jesús yajtzögy Pedro ymíd töxyjäybi

¹⁴ Chi Jesús ñícxxy ma Pedro ytíjc. Chi íjxy je Pedro ymíd co jim cíjx'am ycöcnäy míd je toyba'm.

¹⁵ Co Jesús cíñíxajy huin'it je toyba'm ñájxy. Chi pídígy. Chi mic'amy ní'ixíy je caayín uucín.

Jesús yajtzögy mayba'mjäy

¹⁶ Co oy chu'íyñi ycoodzíyñi huin'it yajmimiñ ma Jesús may je huídi ca'oybi míd. E míd yí' y'ayuc yjéda'ajty ypidzímday je ca'oybi, e huin'it tüg'óciy je pa'mjäy chooctay. ¹⁷ Jadayaabi je' ytuni yjajti jigix yajcuyduñ jadu'n nej je profeta Isaías mīnañ: “Yí' cí'm ajt nyuu nba'm ti xyajtzoctaayim etz yí píjcín íxín ti yajnicxtäy.”

Je píñjaty anajty panícxam Jesús

¹⁸ Co Jesús íjxy janch mayjäy anajty ti yjübigíyíi, chi nīmay co huen nájxcíxy jim'amy mejy nīnaxy.

¹⁹ Huin'it ñimiini tüg escriba. Chi nīmay:

—Huindzín, nbanícxamybích miich oy janch tim ma'amy ma anajty mnícxxy.

²⁰ Chi Jesús y'adzooy:

—Je huaax ymíd je' ajcxy yjut, e je joon ymíd je' ajcxy ype'ñ. Per ñch, je jäy huídibi tsoon jí-iby tzajpjoty, ca' nmídidyích ma nmāhuíbích ma nbócxíbích.

²¹ E jadügpí ydiscípulo ymīnañ:

—Huindzín, nícx jajíjp ndeedyích n'ocyajnaaxtigíyích huin'it nbanícxíp.

²² Huin'it Jesús y'adzooy:

—Pamiingich, ixmajtzciX yi öcpi huen ymii'öcpi yajnaaxtigiyii.

Jesús jijpcogapxiy je micpoj etz je mejy co anajty ooy ypidigy

²³ Huin'it Jesús oy ybarcotigiiyñi. Chi ypadzooni je ydiscípulos ajcxy. ²⁴ E jim anajty ytüyöy mejyhuingíxy, huin'it mic poj ñaymibidzimi. Janch mic y'ocpidicni je mejy jigo jigo je barco cayañidigoy, pero Jesús anajty chachmaab. ²⁵ Huin'it oy ymigapxyii yajmäybidigyii je' ydiscípulos ajcxy. Chi ñimaayi:

—¡Huindzin, ocyajtzoogich ajcxy! ¡Cheeby iich ajt n'ocquiniim!

²⁶ Huin'it Jesús y'adzooy:

—¿Na'amy co mdzachtzigiiygixni? ¡Miich ajcxy hueeni müdity mibijcin!

Huin'it Jesús ypidigy. Chi migapxy je poj etz je mejy. Huin'it je mejy etz je poj yhua'cxijptay. ²⁷ E je' ydiscípulos ajcxy nigooBi y'occix y'occuejtñi chachmínaangixy:

—¿Pin yëydijc jada jada', co je mejy je poj ti ycapxymidoyii?

Je Gadara jäy ajcxy huidibi anajty ca'oybi müd

²⁸ Co Jesús yja'ty ma yi nüba' ma yi Gadara ñaax ycajp, chi metz yëydijc, huidi anajty ca'oybi müd oy yjijpcoyöyiyii anajty ajcxy, ti chooñ ma je öcpi jut. Yi jäy ajcxy ooy janch ahua'n, e ca' anajty huaad jim ni pin ñaxy ma je tü'aa. ²⁹ E co anajty Jesús jim ñaxy huin'it janch ahua'n ymigapxqueeci:

—¿Ti miich mdunamyb m̄id ñch ajcxy, Jesús, miich Dios y'ung? ¿Nej ti mmiñ jayijp co xy-chaachytúngixich ma ca'ni xii tiempo paady?

³⁰ Jiguem ma anajty ajcxy je' yajpaady jim anajty may'idzim y'ojccixy. ³¹ Chi je ca'oybi yminañ:

—Pen miich xyajpidzim ñch ajcxy, xyaj'adigiiygixy xyajjottigiiygixy yi may'idzim.

³² Chi Jesús ñimay yi' ajcxy:

—Niccix.

Huin'it ññhuaatzi je yëydijc je ca'oybi. Chi oy ytigiiygixy je ca'oybi ma je idzim. Huin'it je idzim oy ññgöboyictäy. Jiiby ajcxy yjicxtäy.

³³ E je jäy ajcxy huidibi anajty idzim ycuend'ajtp, huin'it ajcxy yqueegy m̄id je tzigi'ñ. Chi co ajcxy yja'ty cajpjoty, huin'it ajcxy ytigiiy miydaacpi jadu'n nej anajty ti ytuñyii ti yjadyii. ³⁴ E huin'it choday je mayjäy ma je cajp. Chi ajcxy ninicxy je Jesús. E co ajcxy ijxpaty, huin'it ajcxy cohuaniiy co huen pidzimni ma je naax je cajp.

9

Jesús yajtzögy tüg jäy c̄imätpi tecymätpi

¹ Chi Jesús ybarcitiigiiy. Chi ñicxy jim'amy mejyñaxy. Chi oyjäty ma yci'mgajp. ² E jim yajmimiñ tüg yëydijc huidibi anajty c̄imät tecymät. Yajciiy ymiñ ma'ndzaayjoty. E co Jesús ijxy co ym̄id je m̄ibijcin, chi ñimay je pa'mjäy:

—Jotcugi' miich, ti je mbocy nhuinmeecxyich.

³ Huin'it nijëjty je escribas ajcxy, je ley yhuindzin, jot'ajti: “Jadayaabi yëydijc capxtigooyb yi' ma Dios co jadu'n ymina'ñ.” ⁴ Com Jesús ñejhuiiy

jadu'n nej anajty ajcxy je jäy tzachjot'ájtigixy, chi ajcxy nimay:

—¿Nej co ajcxy jibic mdzachjot'ájtigixy jotjoty huinma'ñyjoty? ⁵ ¿Huídibi ca' chipity, co nmíná'ñibich: “Tí yí mbocy nhuinmeecxich”, o co nmíná'nibich: “Pidíg etz tüyöy”? ⁶ Hich ndzojcpyich co miich ajcxy mhujñihuñhuip co hich tí ndzoñich tzajpjoty e paady nmíidich je cötujcin ya naaxhuiñ e jébi nhuinméecxibich pocyjäy ajcxy.

Huin'it Jesús nimay je cımätpi tecymätpi:

—Pidíg, huijtzig yí mdögy etz nicxni ma mdijc.

⁷ Chi je cımätpi tecymätpi ypidígy. Chi ñicxy ma ytijc. ⁸ E co je mayjäy jadu'n ijxy, huin'it ajcxy ooy jihuñy huinmay. Chi ajcxy ooy ojadaty yí Dios co anajty tí yecy je mic'ajtín ma mayjäy.

Jesús nimay Mateo: “Pajamgich”

⁹ Co Jesús oy chooni jim, huin'it ijxy tüg yëydijc, yxii Mateo, huídibi anajty iñaayb ma yajcogüejtac. Chi nimay:

—Pajamgich.

Huin'it Mateo ytınayígy. Chi panicxy Jesús.

¹⁰ Jadu'n ytuní yjajtí co Jesús jim ycay ma Mateo ytijc, e may nañ jadu'n ymiñ yajcogüejtpidijc etz pocyjäydijc. Chi ajcxy jim tú'ciy y'ixtactay miid Jesús etz miid yí ydiscípulos. ¹¹ Co je fariseos jadu'n ijxy ajcxy, chi nimay ajcxy je' ydiscípulos:

—¿Na'amy co yí mHuindzín ycaymucy miid je yajcogüejtpidijc je pocyjäydijc?

¹² Co Jesús jadu'n midooy huin'it nimay ajcxy:

—Ca' yajmayjaty tzoydumbi huídi ca' ajcxy ypiyyii, jëyi huídi ajcxy pijcip. ¹³ Nicx ixpijccixy nej ymiñ jaaybety ma Dios ñecy: “Hich ndzojcpyich co

miich ajcxy mïd'adïpy je pa'ayo'n, ca'ydi co mya-jhuindzigïy tijaty iyujc.” Ca' ïch ti nmiïñich ma je jïy ajcxy huïdibi ca' pocy mïdïty. ïch ti nmiïñich mïd yï pocyjïy ycïxpi co huen jothuimbijttaaygïxy ma Dios.

Amïdoogïxy Jesús mïd je' ycïxpi co jaygay y'ïjtcïxy

¹⁴ Huin'it ajcxy ymiñ Juan ydiscïpulos ma Jesús. Chi je ajcxy nimay Jesús:

—¿Na'amy co ïch ajcxy etz fariseo ajcxy ayuu'ïjtcïxy, e yï' ajcxy huïdibi xymïdhuïdijtp ca' ajcxy ayuu'ïjtcïxy?

¹⁵ Huin'it Jesús y'adzooy:

—¿Nej jëbi yaj'ayuu'aty jïy ajcxy huïdi yajpaatpi ma je pijcpi yajnixïduñyi, pen quipxyi yam yajpaady mïd je huïdibi pijcp? Minamb je xï je tiempo mina je pijcpi yajtzonïyb, huin'it janchtiy ajcxy jëbi y'ayuu'ajtcïxy.

¹⁶ Ni pin Tuc huit ca' agïyïy mïd tïg pedas jemyhuit, com nïgi je Tuc huit ñajtzcïdzïy, chi nïgi o'ctïy yajtñi. ¹⁷ Ca' pin pidägy vino nï ma tucpi cochac, ycïdzïp je', e tïg'ócïy anajty ti y'ayoodäy je vino nï mïd ñigochac. Pidägïpy ajcxy jemy vino ma jemy cochac, chi jadu'n ca' ayoohuïpy je vino, ni huïdigoyïpy je cochac.

Je Jairo ñïx, etz je töxyjïy huïdibi Jesús yhuït nïdoni

¹⁸ Ma anajty Jesús jim ycapxy ymïydägy huin'it ymiñ tïg mijjïy. Chi ñaygojxtïnay'ahuïy ma Jesús yhuïnduu. Chi ymïnañ:

—Nnïxich ti y'ögy. Nicx ma ïch ndïjc etz mgïnixajïpy, jugypïgïpy ya.

19 Huin'it Jesús ypidïgy. Chi ñicxy miid je ydiscípulos ajcxy. 20 Ma anajty ajcxy jim ytüyöy huin'it ymiñ jixci'py'amy tüg töxyjäy huidi yxii ybo' ti mi'ijtiyñi majmetz jimijt. Chi nïdoni Jesús yhuitpa'. Huin'it ñajxy je' ypa'm. 21-22 Jadu'n anajty ti yjot'adyii: “Oy Jesús jëda'ajty yhuitpa' nnidónibich, ti ich anajty n'agidäygich.” Huin'it Jesús yhuäc-huimbijty. Chi huindicxpejty je töxyjäy. Chi nimay:

—Jotcuje'at miich, ti m'agidägy jigix co xymibicyich.

E tim huin'it hora oychögy je pa'mjäy. 23 Chi Jesús oy yjäty ma je mijjäy ytijc. Chi ijxy je xuuxpidijc miid je ymigügtijc ajcxy huidi chachyaaxcixy co anajty ti y'ögy je töxy'anäg. 24 Huin'it Jesús nimay ajcxy:

—Queccix ya, yi pi'ctöxy'anäg ca' yi' ti y'ögy. Hue' yi' maab.

Huin'it ajcxy nigo nixiicy yajxiicy Jesús. 25 Co anajty je jäy ti ixquejxtäy, chi Jesús ytijectigiiy ma anajty je töxy'anäg huijtnäy. Chi majch ma yci'. Chi ypidïgy. 26 Chi je jäy oy yajnejhuïydaayñi ma je jimbi naax cajp nej anajty ti ytuñyii ti yjadyii.

Jesús yajtzögy metz jäy huintzpi

27 Ma anajty jim ti choñ huin'it metz jäy huintzpi ypamiini. Chachñimäyii jadu'n:

—¡Pa'ayoogich ajcxy, miich David y'ap y'oc!

28 Chi Jesús yajpajäty ma anajty ti yjättägy. Co ytigiiy tigoty, chi Jesús yajtiy:

—¿Nej mmibijcpy miich ajcxy co jëbi nyajhuindicxiccixy?

Huin'it je' ajcxy y'adzooy:

—Mibijcy ñich ajcxy, Huindzin.

²⁹ Huin'it Jesús ñidoñ je jäy ajcxy huintzpi ma yhuiin. Chi ñimay ajcxy:

—Jadu'n nej müich ajcxy mmibicy, jadu'n ytunib yjadiib.

³⁰ Chi je' ajcxy y'ijxigy. Huin'it Jesús y'ane'min pidacy:

—Ca' huaad pin myajnejhuigyxy.

³¹ Co je' ajcxy ñicxni, chi ajcxy ooy nigapxy nimiydacy co Jesús anajty ti yaj'ijxicigyxy.

Jesús yajtzögy tüg jäy uumbi

³² Co anajty je' jim ti chongixy, huin'it ajcxy mimiñ ma Jesús tüg yëydijc huídibi uum huídibi anajty ca'oybi müd. ³³ E co Jesús yajpidzimy je ca'oybi, chi je mayjäy ooy yciyxycuejty ajcxy. Chi ajcxy minangixy:

—Ni camina jadu'n ycayaj'ixy ya ma jada Israel naax cajp.

³⁴ Per je fariseos jadu'n yminaangixy co Jesús je' müd je ca'oybi ymic'ajt yajpidzimy ca'oybi ma jäy.

Jesús ymüd pa'ayo'n ma mayjäy

³⁵ Jesús jadu'n yhuídijty cajp cajp yaj'ixpijcy majaty tzajptijc. Yajhuingapxiy je jäy Dios y'ayuc. Etz nañ jadu'n yaj'agidacy huen ytim huídí yuu huen ytim huídí pa'mity. ³⁶ Co Jesús jadu'n ijxy je mayjäy, chi oy pa'ayooni co yi' ajcxy ca' müdity ni pin huídibi jëbi ñajtzcapxiy Dios y'ane'min. Yi' ajcxy jadu'n yajpatp nej cöbixy huídí ca müdity cuend'ajtpi. Ca' nejhuigyxy pin y'ane'mip e pin ypanicxip. ³⁷ Huin'it Jesús ñimay yi' ydiscípulos ajcxy:

—Tiy'ajt yi', janch mij je tung e hueeni je tumbidijc. ³⁸ Paady pijctzou miich ajcxy ma Dios co huen quexy tumbidijc ma yi' ytung.

10

Jesús huin'ixy je majmetz ydiscípulos

¹ Huin'it Jesús huoy je nimajmetz discípulos. Chi moy ajcxy cõtujcïn jëbi huaad yajnïhuäch je huïdi ca'oybi miïd. Etz nañ jadu'n yaj'agidägip huen ytim huïdi yuu huen ytim huïdi pa'mity.

² Jada je' je nimajmetzp yxii: Simón, huïdi nañ jadu'n yajtijp Pedro, etz ymiguëx Andrés; Jacobo etz y'uch Juan, Zebedeo ymang; ³ Felipe, Bartolomé, Tomás, Mateo, je yajcogüejtpi; Jacobo, Alfeo ymang; Lebeo, huïdi nañ jadu'n yajtijp Tadeo; ⁴ Simón, je cananista; e Judas Iscariote, je huïdi yciyejc Jesús agojix.

Jesús quejxy je' ydiscípulos ajcxy ayuccapxhuäcxpi

⁵ Chi Jesús quejxy yi' nimajmetzpi, e jadu'n najtzcapxiiy ajcxy:

—Ca' ajcxy mnicxipy ma je naax cajp ma ajcxy je jäy chinäy huïdibi ca' ajcxy Israeljäyity. Ni mgatigihuiipy ajcxy ma Samaria naax cajp. ⁶ Nigi jac'oy co ajcxy mnicxipy ma je Israeljäy huïdibi ca' nejhuïy huïdibi ca' paduñ Dios ytiy'ájtïn. ⁷ Nicx miich ajcxy capxhuäcx Dios y'ayuc co ti yhuingoni Dios y'ane'mïn. ⁸ Yaj'agidaaccixy yuujäy pa'mjäy huïdijaty pützpa'm ymiïd. Myajjugypijccixy tiibi ögy. Myajnïhuädzip huïdi ca'oybi ymiïd. Ninigoobi miich jada cõtujcïn ti myajmooygixy, nañ ninigoobi yejccixy.

⁹ Ca' ni ti meen mminicxcixy. ¹⁰ Ca' mbijty mminicxcixy tü'amgixpi. Mminicxcixy jëda'ajty yi mhuit huidi müd ma mninix. Ni mgaminicxip huingbi mgig etz mdajc; com ycopicity co je cajpjäy xyajcáaygixipy xyaj'uccixipy miich ajcxy.

¹¹ Co anajty mjäty miich ajcxy ma tüg cajp nidü yajtiu pinjäy jim tudäcyip. Jim ajcxy mhui'mipy ma je' ytijc ixti cooni ajcxy mdzoonip.

¹² Co anajty miich ajcxy mdigiy tigoty hui'nit mgapxpóxcixipy je codijc jadu'n nej tzocy.

¹³ E pen je codijc ymihuaad'ajtpy, yejccixy jim ñbocxin capxpocxin. E pen je jäy ca' ytudägyity, ñaadig'i'adip huidi anajty ti mgapxcixy. ¹⁴ E pen ca' pin xycöbigaangixy, e ni pin xycamidohuaani ajcxy m'ayuc, pidzimgix jim ma je tijc o ma je cajp. Chi ajcxy mdecy hui'nepipy, je' je' je tiy'ajt co ca' miich ajcxy ti pocy müdity. ¹⁵ Janch tiy'ajt jadu'n nej nimaaygixy co anajty je xii tiempo paady ma anajty yajtiyduna'ñ je naaxhuiñyjäy, jac nig'i yajtzaachytuna'ñ yi' ajcxy ca'ydi yi jäy ajcxy huidibi tzinaayb ma Sodoma cajp etz ma Gomorra cajp.

Ixhuidijt'in pahuidijt'in

¹⁶ ¡Ocmidoogix! Ich yam miich ajcxy nguejxyp majaty yi jäy huidi jibic-huinma'ñ müd. Jadu'n nipaady nej ich nguexyich cöbixy ma je lobi. Huijy cujc ajcxy mnaypidägiib jadu'n nej tza'ñ, per yung naxy jadu'n nej muuxy. ¹⁷ Mnayguend'adiib ajcxy je' co yi jäy ajcxy xcyiegaangixy ma ajcxy mijtungmüdpi etz myajhuobaangixy ma je judíojäy ajcxy ñaymujctac, ¹⁸ ixti xyajnicxaangixy ajcxy ma je gobernador etz je reydiyc ajcxy müd

ħch ycıxpı; e ĩm ĩch miich ajcxy xyñıgapxıpy ma je jāy ajcxy yhuinduu, e nañ jadu'n majaty anajty je jāy ajcxy huıdıbı ca' yjudıojāyıty. ¹⁹ Co anajty ajcxy xyajcıdıgıy je mıjtungmıđpı, ca' ajcxy oy mhıunmaayıpy nej m'ocnımāhuıpy. Co anajty paady je tiempo, huın'ıt ĩch miich ajcxy myajnmāhuıpy nej ajcxy mgapxıpy. ²⁰ E je ayuc huıdıbı miich anajty ajcxy mgapxpy, ca' miich anajty je' ajcxy m'ayuc'ājtıgıxy, je Dios Teedy anajty yjıhui'ñ, je Espıritu Santo, xyajcapxp miich ajcxy.

²¹ Huın'ıt yı jāy ajcxy ñaygıyegānıgıxy mıñ xyıpy tüg quęxtıjc co huen yaj'ögyıı. E je ungedeedy cıyegañ y'ung; je ung'anäg mıbıdıgañ je ytaj yteedy etz yaj'öcıp ajcxy. ²² Tüg'öcıy je jāy ajcxy ca' ajcxy xy'ıx'anıpy xychoga' nıpy mıđ ĩch nxı ycıxpı. E pın xymıbıjcpıch amumdügjot ıxtı mabaad y'ögy, yı' ajcxy y'alma tzögıpy. ²³ E co anajty miich ajcxy jāy xy'ıxhuıdity xypahuıdity ma tüg cajp, nıxcıx ma huıngbı cajp. Janch tıy'ajt jadu'n nej nımaaygıxy co ca'ni anajty mgapxhuäcxtäy ayuc tıy'ajt ma tüg'öcıy je Israelcajp co nhuımbıdıpyıch, ĩch, je jāy huıdıbı tzoön tzajpjoty.

²⁴ Tüg yaj'ıxpijcpı jac nıgı mıj'ajtın mıđdity ca'ydı je huıdı ıxpijcp, e tüg huındzın jac nıgı mıj'ajtın mıđdity ca'ydı je' ytumbı. ²⁵ Jėb jotcuıjc ıdıpy je dıscıpulo co jadu'n yajpaadıpy jadu'n nej yhuındzın, e je tumbı jotcuıjc ıdıpy nej yhuındzın. Pen jāy mıınamb co ĩch nmıđdıch ca'oybı, jac nıgı ymına'nañ co miich ajcxy mıđdity.

Pın jėbı yajtzıgıy

26 Ca' ajcxy mdzig'iy y'i jäy ajcxy. Ca' ji ni ti yüch ity nicx ycaniguéx'igy; nañ ni ti ji ycajajtuñ ayüch ameech nicx ycajajnejhu'iy. 27 Hu'idi ñich mi-ich ajcxy ayüch nyajniimaayb, capxp'idxim'gix mi-ich y'i' mayjäyjoty, e hu'idi ajcxy midooyb ameech, capxp'idxim'gix miich y'i' mic ma tüg cögop. 28 Ca' ajcxy mdzig'ihu'ip je jäy hu'idib nin'icx yaj'öcp etz ca' huaad y'i' ajcxy yaj'ögy je alma. Y'i' miich ajcxy mdzig'iygixy je Dios hu'idib pidacp je alma etz je nin'icx mijj'ijnjoty.

29 ¿Nej ca' jäy ajcxy toogy metz pi'cjoon m'id tügpi pi'cmeeñi? Per ca' ni tüg huaad ycäy naaxhuiñ, pen ca' tzocy je mDios Teedy hu'idi jii'by tzajpjoty. 30 Miich ajcxy mgöhuay ac michoy y'i'. 31 Paady miich ajcxy ca' mdzig'ihu'ipy, jac n'igi miich ajcxy mdzoubaady ca'ydi je joon.

P'injaty ca'p midzöydu'ñ Jesucristo mayjäyjoty

32 Y'i' jäy ajcxy hu'idi xymibijcp'ich etz xyñidi'y'ajty'ich ma jäy yhuinduu, nañ jadu'n ñich y'i' nidi'y'ajty'ich ma ñich nDeedy hu'idibi jii'by tzajpjoty. 33 Per je jäy ajcxy hu'idi ñich xycoyützp'ich ma mayjäy ajcxy yhuinduu, nañ jadu'n y'i' ngoyützip ma ñich nDeedy yhuinduu hu'idibi jii'by tzajpjoty.

M'id Jesús ycixpi'yjii'ity naymidzip'adi

34 Ca' miich ajcxy mhuinmay co ñich ya ti nmiñich m'id co nmöhuaangixy jotcu'jc'ajt'n ya naaxhuiñ. 35 H'ich ti nmiñich co nyajziptun'ipy'ich jäy m'id yteedy; töxyjäy m'id ytaj etz xecy m'id yxecy. 36 E jadu'n miich ajcxy mdzip'ad'iyb mg'i'mjuogy mg'i'mm'igüg.

³⁷ Yi jäy ajcxy huídibi tzojcp ytaj yteedy jac nīgi ca'ydi ìch, ca' yi' ypaadyii co njäy'adiiybich; e pín ymang o ñiix tzojcp nīgi ca'ydi ìch, ca' ypadyii co njäy'adiiybich; ³⁸ e pín ca' yci'mdzojcin y'ijxmajtztäy etz ca' ñaybidägyii ycixjot huinijot ma ìch, ca' mihuaadity nicx njäy'adiiybich. ³⁹ Pín yjugy'ajtin najtztzogiiyb, yajtigoyipy yi'; e pín yjugy'ajtin tigooyb müd ìch ycixpi, ypaadipy jugy'ajtin huinixii tzajpjoty.

Premio nganar'ajtim

⁴⁰ Pín miich ajcxy xycöbijcp, ìch yi' anajty xycöbijcp; e pín ìch anajty xycöbijcp, nañ ycöbijcpy anajty je huídibi ìch ti xyquejxyich ya naaxhuiñ. ⁴¹ Je huídibi cöbijcp je jäy huídibi Dios y'ayuc capxhuacxip, je' co yi' ymiñ müd Dios ycixpi, yi' jadu'mbi je oy'ajtin ypaadipy. Nañ jadu'n je huídi cöbijcp je oybi jäy müd co oy yjäyity, yi' jadu'mbi oy'ajtin ypaadipy. ⁴² Je huídi yaj'ucp tüg vaso ñi ma huenyimpinjäy müd co xymibicyich, janch ìch miich nimaaygixy, ypaadipy oy'ajtin.

11

Juan je Bautista yquexyöybi

¹ E co Jesús anajty ti najtzcaxiydäy je tiyy'ajt ma je nimajmetzpi ydiscípulos ajcxy, chi Jesús ñicxy yaj'ixpijcp etz ayuccapxhuäcxp majaty cajp huinduy agonbi.

² E Juan je Bautista hue' je' anajty yajpaady pujxtigoty. E co nejhuiy tijaty mijhuinma'ñ anajty Jesús ytumyb, chi quejxy metz je' ydiscípulos ajcxy ma Jesús yajpaady. ³ Chi Juan ydiscípulos ajcxy y'amidooy Jesús:

—¿Nej miich je' je Cristo hu'idibi anajty minamb o jëbi ñich ajcxy huingbi n'ahuijxcixy?

⁴ Chi Jesús y'adzooy:

—Ñicxcix miich ajcxy nimaaygix yi Juan, je Bautista, tijaty miich ajcxy m'ijxpy mmidooyb co ndumybich. ⁵ Miich ajcxy yajmïdmïydäg je Juan, jadu'n nej je huintzpi nyajhuindicxïgyich; je cïmät tecymät nyajtzoocypich; je hu'idibi jibic nibützpa'm ymïd nyajtzoocpyich; je' ajcxy hu'idibi cönat nyajmïdohuïcpyich; je öcpi ajcxy nyajjugypïcpyich; etz je ayoobtïc, je hu'idibi yung naxy yjothuinma'ñ nyajmïdmïydacypich Dios y'ayuc. ⁶ Jotcuje yi' ajcxy pinjaty xymibïjcpich amumdüjot etz ca' ni nej yjotmetzci' mïd ñich.

⁷ Co Juan je Bautista ydiscípulos ajcxy ñicxni, chi Jesús ytigïy nimïydaccoty Juan je Bautista ytung ma je mayjáy, chi ymïnañ:

—¿Ti miich ajcxy oy m'ixy jim mïjtigïduum? ¿Tüg nãhuaax hu'idibi poj xïjpi? ⁸ ¿Ti ajcxy oy m'ixy? ¿Ti oy m'ixy, tüg jáy hu'idibi ooy y'oyxöxyity? ⁹ ¿Ti miich ajcxy oy m'ixy? ¿Nej ti m'ixy tüg Dios y'ayucnajtzcaxïybi? Janch co ti m'ïjxcixy tüg jáy jac mij ca'ydi tüg Dios y'ayucnajtzcaxïybi. ¹⁰ Je' jada je jáy hu'idibi Dios nigapxy ma ñecy co Dios jadu'n ymïnañ:

Cham nguexyich ñich nguexyöyp jayïjp ma miich. Je' yaj'oyïhuïp je jáy yjot yhuinma'ñ mïd ñich ycixpi, tim jadu'n nipaady nej jïhuïy jáy tü'aa yaj'oyïy co rey ymiina'ñ.

¹¹ Co yi jáy ajcxy hu'idibi ti chinaaygixy ixti chambaad ni pin ti ca' yajpaady mij jadu'n nej Juan

je Bautista; per pinjaty ñch xymibijcp, yí jac mij naxam ma Dios y'ane'my ca'ydi Juan.

¹² Maabi Juan je Bautista ytundiğy, ixti chamni janch mayjäy amumdüğot ñejhuñhuañ Dios y'ayuc, je' co ajcxy ytighuañ ma Dios y'ane'my.

¹³ Tüg'ócxy ajcxy je Dios y'ayucnajtzcaxiıybi etz Moisés ycötujcin ñigapxy ajcxy je ané'min ixti cooni Juan oy ymiñ. ¹⁴ Pen miich ajcxy mibijcpy Moisés ycötujcin etz Dios y'ayucnajtzcaxiıybi ajcxy, Juan je Bautista je' je' je Elías huıdibi anajty miınamb. ¹⁵ Pinjaty mido'n miıd huen mido'mbigıpy ñch n'ayuc.

¹⁶ Jesús yjacminañ:

—¿Pin miıd n'ocyajtügıhuıbyıch yı jäy huıdi ajcxy cham tzınaayb? Tim jadu'n yı' ajcxy nej pi'ctıjc huıdibi ajcxy iyıyb ma mayjäy yjuygıxy ytooccıxy, miıyaaxcıxy midınaaygıxy ymiğügtıjc:

¹⁷ “Ti njayajxüxyıch flauta e ni ca' ti m'ejtzcıxy; ti ñch ajcxy öcpi njahuınyäxıch, e miıch ajcxy ca' ti myäxy.” ¹⁸ Chi Juan, je Bautista, anajty miıñ, e je' ca' ycay y'ügy. E miıch ajcxy miınaangıxy co Juan ca'oybi ymiıdıty. Jada pi'c'anäctıjc nipaady nej miıch ajcxy. ¹⁹ Chi ñch je' je jäy huıdibi tzoon tza-jpjoty nmiiñıch, e caaybıch uucpıch, e miıch ajcxy miınaangıxy: “Ijxcıx, cha tüg yëydıjc, janch cax janch vino'ucp huıdibi miğüg'ajtpy yajcuejtpıdıjc etz pocyjäyđıjc.” Je Dios tiy'ajt ji je' ñıguëxıgy.

Je cajp huıdibi ca'ycapxymıdoogıxy

²⁰ Chi Jesús ojcoty je maygajpjäy ma anajty may miñhuınmañ ti tuñ, com je mayjäy ca' anajty yjothuimbidaangıxy ma Dios. Chi Jesús ymiınañ:

21 —¡Ay miich ayoob ajcxy huídibi tzinaayb jim Corazín! ¡Ay miich ayoob ajcxy huídibi tzinaayb jim Betsaida! Co ixypy ñch ti nduñich jecy'ajty je mijhuinma'ñ mijtzög'ajtín ma je Tiro etz Sidón cajt, jadu'n nej ñch ti nduñich ma miich ajcxy, ti ixypy je Tiro jäy etz Sidón jäy nijothuimbijtcixy etz ññaaygixy sacco nijen nñcuyjam ixcuyjam, je' je tiy'ajt co ooy ytajcixy ymaygixy müid ypocy ycixpi.

22 Paady miich ajcxy yam nimaaygixy. Co anajty Dios tiyduna'ñ je naaxhuiñybi jäy, huin'it miich ajcxy Dios xychaachytuna'ñ jac nīgi, ca'ydi je jäy ajcxy huídibi jecy'ajty tzínay jim Tiro etz Sidón.

23 Miich ajcxy, Capernaum jäy, mnaybidáacigixy jadu'n nej jihuiy mdigihuaangixy jiiyby tzajpjoty. Per ca' yjadu'nity. Mdigihuam miich ajcxy ayoodactuuby. Ayo'n tzaachypi mbadaangixy. Co ixypy ñch ti nduñich jecy'ajty je mijhuinma'ñ mijtzög'ajtín ma Sodoma cajt, jadu'n nej ti nduñich ma miich ajcxy mgajt, chambaad ixypy ity yi jadu'mbi cajt, ca' ixypy Dios cayajtigooy. 24 Paady ñch miich yam nimaaygixy. Co anajty Dios tiyduna'ñ je naaxhuiñyjäy, huin'it miich ajcxy myajtzaachytuna'ñ jac nīgi, ca'ydi je jäy huídibi jecy'ajty tzínay ma Sodoma ññaaxjot.

Mingixy ma ñch e mbóocxcixipy

25 Chi Jesús ytiñy Dios mibijctzooyb, ymínañ:

—Dios Teedy, ñch miich n'ñbaatpich ngapxpaatpich. Miich müid je mij cötujcín jiiyby tzajpjoty etz ya naaxhuiñ. Com miich ti mnajtzcapxiy yi m'ixpijcín ma je ayoobtjc huídibi tzinaayb jotxeemy, e ti myüch yi m'ixpijcín ma yi ixpiçytjc co-

huinma'ñydijc. ²⁶ Jadu'n, Tat, ti mduñ, com jadu'n miich ti mdzocy ti mjäygidägy.

²⁷ Jesús yjacminañ:

—İich nDeedy ti xyajcïdigiydäyich tüg'óciy mic'ajt oy'ajt. Ni pïn ca' ijxcapy pïn je' y'ung, jëyi nDeedyich tüg'pajc. Ni pïn ca' ijxcapy pïn je' nDeedy'ájtpyich, jëyi İich, je Dios y'ung tüg'pajc, etz jacjadyii huıdibi İich, je Dios y'ung, nyajniguëxigamyich. ²⁸ Min ma İich nidüg'óciy miich ajcxy huıdijaty taj mayb myajpatp ma mjot mhuinma'ñ, İich miich ajcxy nmöhuamyb jotcuyc'ajtın. ²⁹ Cöbic miich ajcxy İich n'ane'mın İich ngötujcın, jadu'n nej huaj yuub ajcxy cöbicy ycögi'. İjxpıc ajcxy İich ndiy'ajt etz cuydun İich n'ayuc, com İich nmıdich mecxtujcın etz ca' İich amij agıx nayjihuyiijich. ³⁰ Ca' İich n'ane'mın ymicity, e İich ndung ca' nimijajajty.

12

Je discıpulos ajcxy moc cojc yajmujcp pocxxıduum

¹ Chi tög xıı Jesús yhuıdity mıd ymıgügtıjc ma tög camjot. E hue' anajty sábado xıı, je pöocxın xıı. Chi Jesús ydiscıpulos ajcxy oy anajty yubögyii. Chi ajcxy ytıgiıy trigo tım nıxajztutp etz yjıcxıy ajcxy je ypajc. ² E co je fariseos ajcxy ijxy nej Jesús ydiscıpulos ajcxy y'ıdıtzcıxy, chi ajcxy nımay Jesús:

—Oc'ix nej miich mdiscıpulos ajcxy y'ıdıch. Hue' ajcxy tumyb huıdibi ca' huaad ma sábado xıı yajtuñ.

³ Per Jesús minañ:

—¿Nej ca' miich ajcxy mgapxyñi ma Dios ñecy, jadu'n nej David etz ymīgügtijc ajcxy idich jecy'ajty co yuböccoti? ⁴ Pues yi' ajcxy tigüy ma Dios ytijc. Chi cay ajcxy je tzajcaagy huídibi anajty jäy ajcxy ti yajhuindzigüy Dios. Je' je tzajcaagy huídibi teedy ajcxy anajty paatip cayipy. ⁵ ¿Nej ca' miich ajcxy ti mgapxyñi Moisés ycötujcin necy co je teedy ajcxy jëbi ytuñ ma Dios ytijc sábado xii, e ca' nan tundigooyb je' ajcxy?

⁶ Hich miich ajcxy nimaaygixyp, jac nigü mij cötújcin nmüdidyich, ca'ydi je cötujcin huídibi je teedy ajcxy yajtuñ ma Dios ytijc. ⁷ Pen miich ajcxy ti mhuinjihuüy nej yhuimbídzimy jada Dios y'ayuc, co Dios jadu'n yminañ: “Hich ndzojcpy co miich ajcxy müd'idipy pa'ayo'n ca'ydi co ajcxy myegipy huindzigüñ.” Pen miich ajcxy ti mhuinjihuüy jada ayuc, ca' ixypy mbocy'ixy ma hich nmīgügtijc huídibi ca' ma ti ytundigooy. ⁸ Hich, je jäy huídibi tsoon tzajpjoty, nmüdich ane'min, jaydëbi nimäyich je jäy ajcxy ti jëbi tungixy sábado xii.

Je yëydijc huídibi anajty ycütüdzip

⁹ Chi Jesús choñ jim, ñicxy ma je judíojäy ñaymujctac. ¹⁰ E jilby ma je naymujctac anajty tüg yëydijc huídibi ycütütz. Je fariseo ajcxy xihuamyb Jesús, paady ajcxy y'amidooy, yminañ:

—¿Nej jëbi tüg pa'mjäy chögy sábado xiiji?

¹¹ Chi Jesús y'adzooy:

—Pen ya ma miich ajcxy ji tüg jäy huídibi cöbixy yjutcögäy sábado xii, ¿nej ca' je' nicxy yajpidzimy mic'amy? ¹² Nigü tzobaatp tüg yëydijc ca'ydi tüg

cöbixy, paady Moisés ycötujcin ca' capx'aducy co tüg oy'ajtín nduunim sábado xii, je pooxçin xii.

¹³ Chi Jesús nimay je yëydijc:

—Xajtiu yi mgi'.

¹⁴ Co xajtiy yci', chi choocy, e hui'my quipxyjaty mïd je yci' oybi. Chi je fariseos ajcxy yjotmätcoty, yhuinmañ ixtaaygixy ajcxy nej huaad Jesús ocyaj'o'ccixy.

Tüg ayucnajtzcaxiïn mïd Jesús yciïpi

¹⁵ E co Jesús nejhuïy nej yi' ajcxy yhuinmañ mïdity, chi jim choñ. E ooy mayjäy ypanicxi Jesús, Jesús yajtzoocy anajty tüg'óciy pinjaty pa'm mïd.

¹⁶ Jesús ane'my je pa'mjäy ajcxy co ca' huaad nigapxy nimiydägy co yi' je' je Cristo. ¹⁷ Jadu'n Jesús ane'my je pa'mjäy jigix yciïpy yca'pxipy je ayuc huïdibi je profeta Isaías yjaay jecy'ajty, co Dios jadu'n ymïnañ:

¹⁸ Jada je' ïch ndumbi huïdi ti nhuin'ixyich.

Yi' ïch ooy ndzocyich njihuïyich etz ooy njotcujcich mïd yi'. ïch yi' nmöhuamybich ïch njihuïñ mic'ajt. Yi' capxhuäcxip ïch n'ayuc jadu'n nej ndzaachytuna'ñich naax-huïñjyäy ajcxy mïd ajcxy ypocy yciïpi.

¹⁹ Yi' ni ymïgügtijc ca' oja'ñ, ni ycayäxa'ñ, ni ycatinähua'ñ, ni pin ca' mïdoohuïpy ma cajp cujc.

²⁰ Ca' yi' tzaachytuna'ñ ayoobitijc etz huïdibi ayo'ndumb ijtp. Etz nañ ni ca' yajtigoya'ñ huïdibi ayoobitijc yco'ögy'ungdijc yjïp'ijxpy. Jadu'n nej jäy cayajhuindigoy tzajcapy huïdi huïdyip etz ni cayajpich je mecha

huidibi uuxy uuxy t̄icxp. Ixti mabaad
 anajty yajcopicy y'ane'min tudägypi.

21 E yi' mayjäy ooy yjijp'ixa'ñyii.

Xigixy Jesús co m̄idity mujcu' ymic'ajt

22 Chi m̄id miiñ ajcxy ma Jesús t̄üg jäy huidibi
 huintzip etz uum. Je' anajty m̄id ca'oybi. Chi Jesús
 yajtzoogy, e chi y'ixigiy etz ycapx̄igy. 23 Co Jesús
 jadu'n tuñ, chi je mayjäy ytiḡiy huinmay'ahuidijt,
 chi ajcxy ym̄inañ:

—¿Nej jada je', je David y'ap y'oc huidibi
 rey'adam?

24 Per co je fariseos ajcxy nejhūiy nej je jäy
 huinmay, chi ajcxy ym̄inañ:

—Jadaabi ȳedyjc yajpidzimy ca'oybi m̄id je mu-
 jcu' huindzin ymic'ajt (ca' yi' yj̄jity je Cristo).

25 Per Jesús ñejhūiyb anajty ti je fariseos ajcxy
 yhuinmaayb, chi ym̄inañ:

—Pen t̄ügpic̄y tungm̄idpī ixyipy ñaybijc-
 huäcxigixy, etz ñaymidziptzoonigixy ixyipy ac
 j̄eyi, pues cixipy yi' ajcxy y'ane'min. Pen t̄üg cajp o
 t̄ügpic̄y jugymiḡüg ixyipy ñaybijc-huäcxigixy, pues
 ca' ajcxy y'idaangixy t̄ügmucy. 26 Pen Satanás, je
 ca'oybi huindzin, yajpidzimy ixyipy ca'oybi ma
 je jäy ajcxy, chi c̄'m ixyipy je ca'oybi ti ñaybijc-
 huäcxigixy, e je Satanás ymic'ajt ca' y'idañ.

27 Miich ajcxy m̄inamb co ñch nyajpidzimyich
 ca'oybi m̄id je ca'oybi huindzin, je Beelzebú
 ymic'ajt. Pen tiy'ajt jadu'n nej miich ajcxy m̄inañ,
 je jäy ajcxy huidibi xymijn̄icxpejt miich ajcxy,
 ¿nej yi' ajcxy paady mic'ajt ma je mujcu' co ajcxy
 yajpidzimy ca'oybi ma je pa'm jäy? Pues ca', paady
 yi' ajcxy tiy'ajt yejcp co miich ajcxy ti mgapxtigoy

co ymínaangixy co ñch nyajpidzimyich ca'oybi mïid Satanás ymic'ajt. ²⁸ Per ñch nyajpidzimyich ca'oybi ma pa'mjäy mïid Dios yjihui'ñ ymic'ajt. Paady miich ajcxy nejhuïyb co ti ymiiñ yjäty je Dios y'ane'min ma miich ajcxy.

²⁹ (Dios ycötujcin jac mic ca'ydi je ca'oybi ycötujcin, paady jëbi nyajpidzimyich ca'oybi.) ¿Nej jëbi tüg jäy ytigüy ma tüg micpi jäy ytijc etz pigaani tijaty yí ymïid, pen ca' jayijp yci' ytecy xojtzity? Pues ca'. Cooni jayijp yci' ytecy xojtzity, huin'it jëb pijcip tijaty ymïid. ³⁰ Pinjaty ca' xymijnicxpetyich, xymidzipich yí. Pinjaty ca' tuñ mïid ñch co jäy nyaj'ixpicyich, hue' je' ajcxy jäy yajhuinma'ñyidigooyb.

³¹ Janch ñch miich ajcxy nimäy co Dios jëbi huinmecxip tüg'óciy pocy huidibi jäy ytungixp etz tüg'óciy jibicpi huidibi jäy ycapxcixp. Jëyi janchtiy co pinjaty capxtigooyb mïid je Espíritu Santo, je Dios yjihui'ñ ymic'ajt, ca' Dios huinmecxip nimina.

³² Pinjaty jibic xyñigapxpich xyñimiydaccpich, je' huinmecxam. Per je huidibi jibic ñigapxpy je Espíritu Santo, je' ca' huinmecxa'ñ ni jadachambi tiempo, etz ni camina xii.

Yi quipy yí ytiim yí mïid yaj'ijxcapy

³³ Pen miich ajcxy mnejhuïhuamy je quipy pen oy quipy, o pen ca', jëbi mnejhuïhuipy co je quipy nicxy ytiim'aty. Pen oy je ytiim, miich mina'nip co oy je quipy. E pen ca' oy ytiim'aty, huin'it miich ajcxy mina'nip co ca' y'oyity je quipy. ³⁴ Jibic jäy miich ajcxy, jadu'n nipaady nej jihuïy ahua'n iyujc xy'ung'ajtp. Pen miich ajcxy jibic jäy'ajtp, ¿nej jëbi miich ajcxy oybi ayuc mgapxipy? Jadu'n

nej jäy ajcxy yjot yhuinma'ñ m'iidity, ac tim jadu'n ajcxy ycapxy. ³⁵ Je jäy huidibi oy ayuc ycapxy, ym'iid oyjot oyhuinma'ñ paady oy ayuc capxy. Je jäy huidibi jibic ayuc capxp, ym'iid jibic jot jibic huinma'ñ, paady jibic ayuc capxy. ³⁶ Ich mi-ich ajcxy nimay co anajty paady je xii je tiempo mina Dios tiyduna'ñ je naaxhuiñyäj, huin'it ajcxy y'adzohuipy m'iid huen tim huidibi ayuc huidibi anajty ajcxy ti mgapxy. ³⁷ Com nejaty miich anajty ajcxy ti mgapxy je m'ayuc jadu'n miich ajcxy Dios xytiydunip. Com m'iid yi mgi'm ayuc yi' m'iid m'oybidzimipy mhuätzpizimipy. E nañ jadu'n m'iid yi mgi'm ayuc yi' m'iid mbocycähuipy.

Jibicjäydijc ajcxy pijctzoogixy tüg ijxpejt m'ijhuinma'ñybi

³⁸ Chi nijëjty fariseos ajcxy etz escribas ajcxy Jesús nimayi:

—Huindzin, n'ixamy ich ajcxy miich tüg m'ijxpejt.

³⁹ Chi Jesús y'adzooy:

—Yi jibic jäydijc ajcxy etz ajcxy huidibi ca' mibiga'ñ Dios ypijctzooyb tüg ijxpejt huidibi tzomb tzajpjoty. Per Dios ca' yega'ñ jadüg ijxpejt. Ti Dios yecy tüg ijxpejt ma Jonás. ⁴⁰ Com jadu'n nej Jonás jecy'ajty ijxpejt yecy co y'ijty tugüg xii tugüg tzuum mejyjoty ma acx ymoxac, nañ tim jadu'n ich, je jäy huidibi tsoon tzajpjoty, nyegamy ijxpejt jadachambi tiempo co n'idipyich tugüg xim etz tugüg tzuum naaxjoty. ⁴¹ Je mayjäy huidibi anajty tzinaayb ma Nínive cajp, ti jothuimbijtcixy etz ti ixmach ajcxy huidijaty jibicpi ajcxy ytumyb co Jonás capxhuäcxy Dios y'ayuc ma yi' ajcxy. Cha

ich ngapxhuäcxyich Dios y'ayuc ma miich ajcxy, etz jac nigí cötujcin nmídidyich, ca'ydi Jonás; e ca' miich ajcxy mjothuimbity. Paady co anajty Dios tıyduna'n je naaxhuiñyäj, je Nínive jäy miich ajcxy xyajpocycähuam. ⁴² Nañ jadu'n je töxyjäy reina huidibi tzınay jecy'ajty ma madza'cruudz ypidzımy, yi' je' xidähuam je jäy ajcxy huidibi tzınaayb jadachambi tiempo, etz yajpocycähuiib ajcxy. Je reina tzoön jıguëgy nicxy co amıdo'ıda'n je rey Salomón ma capxhuäcxi Dios y'ayuc. Ji naaxhuiñ jadachambi tög Dios ytıy'ajtmıdpi jac nigı ymıjıty, ca'ydi Salomón anajty, e ca' je jäy ajcxy mıjpidäga'n.

Je jıbic espıritu co jadüg'oc yhuimbity

⁴³⁻⁴⁴ Yi jäy ajcxy huidibi cham tzınaayb, quıpxy-jaty ajcxy mıd je ca'oybi. Co je ca'oybi ypidzımy ma je jäy, chi je' ñıcxy jim mıjtıgıduum y'ıjxtacy. Co ca' paty ypocxtac, huın'ıt ymına'n: "Huım-bıdaambıch ma je jäy yjot yhuınma'n ma ich tı n'octzombı." Co je ca'oybi yjäty ma anajty tı chinäy, chi paty je jäy yjot yhuınma'n ooy yhuätzıty etz yajxon ypedıgıty oy oyduñ. ⁴⁵ Chi je ca'oybi ñıcxy oy yajtzoön jahuıxtujc ca'oybi jac jıbicpi ca'ydi je'. Chi ajcxy ytıgııy ma je jäy yjot yhuınma'n, e chinay ajcxy jııby. Huın'ıt je jäy jac'öctıy oy yjajtnı, ca'ydi jadu'n nej anajty jayıjp'aty.

Jesús ytaj etz y'uch mıguëx ajcxy

⁴⁶ Jesús yaj'ıxpıjcpy anajty je mayjäy, co oy yja'ty je' ytaj etz y'uch mıguëx ajcxy. Hue' ajcxy yhuı'my tıba'y. Je' ajcxy anajty ymıgapxamy Jesús. ⁴⁷ Chi jäy yajnimay Jesús:

—Yi mdaj etz m'uch miiguëx ajcxy, chiiby ajcxy tiba'y, miich xyjamigapxamb.

⁴⁸ Jesús y'adzooy, nimay je jäy huidibi ytaj y'ayuc yajnaxi ma yi':

—¿Pin jäy miich ajcxy mdijy co ñch ndaj'adyii etz ñch n'uch'adyii nmigüg'adyii?

⁴⁹ Huin'it Jesús nitziihuüy je' ydiscípulos ajcxy e yminañ:

—Jada ñch ndiscípulos ajcxy jadu'n nipaady nej ñch ndaj etz ñch n'uch nmiguëx. ⁵⁰ Huen ytimpinity huidibi ytumyb ñch nDeedy chojcin, huidibi jüby tzajpjoty, pues jadu'n yi' ajcxy nipaady nej ñch ndaj etz ñch n'uch miiguëx.

13

Je ayuccapxhuäcxpi y'ijxpejt (niipi ijxpejt)

¹ Je huin'it xii Jesús choñ ma je tijc. Chi ñicxy ma je mejypa' jim oy y'ñay'ihuüy. ² E co mayjäy ooy ñaymujci jim ma anajty Jesús ñay, chi Jesús ytigiy barcojoty. Per tüg'óciy je mayjäy yhui'mday ma mejypa'. ³ Jesús ytigüy jäy yaj'ixpijcp miid jihuimbit ayuc, yminañ:

—Tüg jäy choñ trigotim huijp. ⁴ E ma anajty jim ytimhuijy, huin'it je ytim oy naagity ycäy ma tü'aa. Chi jada' je joon ajcxy oy ymiiñ etz ypiihuügy je tim. ⁵ Nijëjity ytim ycäy ma tzaanïcx ma anajty hueeni naax. Jada tim tzojc ymujxy. ⁶ Com hueeni anajty je naax ma je tzaanïcx, chi co oy xii'an ypadyii, chi ytütztay, com ca' anajty je ytictz yeegity. ⁷ Nijëjity tim oy ycäy ma ujtz'aayjot ma apyjot, e ujtz'öctay je trigo mang. ⁸ Per je tim huidibi ca'u ma oy ñaax, je' yon yajxon e tim'ajt

may'amy; tüg ypi'cpajc iipxmajc oy yco'ity, jadüg pi'cpajc tug'px oy yco'ity, jadüg pi'cpajc migo'px oy yco'ity. ⁹ Pinjaty mido'n müd huen mido'mbicy jada ayuc.

Ti ycxpi je ijpajt

¹⁰ Chi je' ydiscípulos ajcxy nimijhua'cy Jesús, chi ajcxy yajtäy:

—¿Na'amy co myajtuñ jihuimbit ayuc co myaj'ixpicy je mayjäy?

¹¹ Chi Jesús y'adzooy, ymíñañ:

—Miich ajcxy jaydéb mnejhuíhuipy huídibi Dios ñigapxyp ñimíydacpy coyüch'amy ma y'ane'mín. Jacjadyii jäy ca' ajcxy huinjihuíhuipy. ¹² Pinjaty ymíid yajmóhuip ñigi, pinjaty hueen müd yajpigipy ñigi, oy ixypy hueen jadím müdity. ¹³ Paady jihuimbit'amy nyajnímaayich; jaydébí pinjaty ijxcixy, ñipatpy nejhuíy ca' tí ijxcixy; etz co ajcxy midoogixy, ca' ajcxy huinjihuíy, ñipatpy nejhuíy ca' tí midoogixy. ¹⁴ Jadayaabi ytunyíi yjadyíi jadu'n nej je profeta Isaías jaaybejty yajhui'my ma jadu'n ymíñañ:

Miich ajcxy midohuamy, per ca' mhujihuíhuangixy. Miich ajcxy m'ixamy, nañ ca' mhujihuíhuaangixy huídibi tí m'ijxcixy.

¹⁵ Com jadayaabi jäy ooy ajcxy yjot yhuinma'ñ tí y'ahuimbity juuñ. Nej ajcxy yjamídooy, ca' ajcxy ymidohuí'mgixy. Nej ajcxy ja'ixy, ca' y'ijxhuí'mgixy. Nej ajcxy yjahujihuíygyxy, per ca' yhuinjihuíy ma yjot yhuinma'ñ. Yí' ajcxy ca' yjothuimbidaangixy ma ích, jaydéb nyajnídzögíibich ajcxy.

16 Per jotcuyc miich ajcxy, co miich ajcxy ijxhu'my mïd mhuiin huïdibi ndumybich, e mmïdo'mbicy ajcxy ïch n'ayuc. 17 Janch tiy'ajt jadu'n nej ïch miich nïmaaygixy. Janch tiy'ajt co may profetas ajcxy etz tudägy jäy ajcxy huïdibi tzïnaayb jecy'ajty, ooy ajcxy ja'ixañ huïdibi miich ajcxy m'ijxyp cham, per ca' ajcxy ixy. E ooy ajcxy jamïdohuañ je ayuc huïdibi miich ajcxy mïdooyb cham, per ca' ajcxy mïdoy.

Jesús najtzcaxïy je ijxpejt ma je niipi

18 Amïdo'it miich ajcxy, jadu'n nej yhuimbïdzïmy jada jïhuimbit ayuc maabi je tïim huïjpi. 19 Je jäy ajcxy huïdibi amïdo'ijtp Dios y'ayuc, e mic'amy je ca'oybi yajpidzïmy Dios y'ayuc ma ajcxy yjot yhuinma'ñ, jadu'n ajcxy nipaady nej trigo tïim huïdibi cäb tügujc, e je joon ajcxy mic'amy ypiimujctay. 20-21 Je jäy ajcxy huïdibi amïdo'ijtp Dios y'ayuc janch jotcuyc, per co agapxiyb paady, co tzaachypi mïnaxy yajnaxy mïd Dios y'ayuc ycixpi, chi mic'amy ajcxy ixmajtznï Dios y'ayuc, jadu'n ajcxy nej je trigotïim huïdibi ti ycäy ma tzaanïcx, huïdibi ca' oy ytictz mïdity. 22 Je jäy ajcxy huïdibi amïdo'ijtp Dios y'ayuc, e co ñïcxni, chi jäy dïgooyñï Dios y'ayuc mïd jotcuyc'ajtin tzïnaayïn, comeeñ'ajtin etz adzojcïn. Jadu'n ajcxy nipaady nej trigotïim huïdibi ti ycäy ujtzjoty, e ca' ytïim'aty mïd co oy y'ujtz'ögy. 23 Je jäy ajcxy huïdibi amïdo'ijtp etz cöbijcp yajxon Dios y'ayuc amumdügjot etz Dios y'ayuc ytumyb ma ajcxy yjot yhuinma'ñ, jadu'n ajcxy nipaady nej je tïim huïdibi ti ycäy ma oy ñaax etz ti ytïim'aty may'amy. Tüg pi'cpajc iipx majc oy yco'ity, etz

jadüg pi'cpajc tugì'px oy yco'ity, etz jadüg pi'cpajc migo'px oy yco'ity.

Je ijxpejt co je jìbìc ujtz ymuxy ma je trigo cam

²⁴ Chi Jesús yaj'ixpijcy jadüg jìhuimbit ayuc, ymìnañ:

—Je Dios y'ane'mìn jadu'n nipaady nej tüg yëydìjç huìdìbì trigo tìm huìjp ma je' ycam. ²⁵ Per co ajcxy yma'òctay nidüg'òciy je cogam, chi ytìgìy tüg ymìdzip ma je ycamjot. Chi je mìdzip jìbìc ujtz tìm oy huìjy ma je trigo cam. Chi ñìcxñì. ²⁶ E co je trigo oy yooñ, chi ypìjy. Nañ jadu'n je jìbìc ujtz oy yooñ. ²⁷ Chi je ytumbìdìjç oy yhuìndzìn yajnimay: “Huìndzìn, ¿nej ca' tì mnìpy ac trigotìm? ¿Nej co jìm nañ jadu'n jìbìc ujtz yajpaady?” ²⁸ Chi je cogam ymìnañ: “Huen jada' nmìdzipìch jadu'n tì y'idìch.” Chi je tumbìdìjç y'amìdoohuì: “¿Nej mdzojçpy co ñìch ajcxy nhuìjxìgìbìch je jìbìc ujtzi?” ²⁹ Chi je cogam ymìnañ: “Ca'. Pen miìch ajcxy mhuijxìçpy je jìbìc ujtz, ca' jecyity co m'ahuijxmugìpy nañ jadu'n je trigo. ³⁰ Ixmatz, huen je jìbìc ujtz yeegy tüg mucy mìid je trigo, ixtì coonì anajty ypidìgy je cosecha. Co cosecha paty, huìn'it nguexa'ñìch je ndumbìdìjç co huen jayìjp pujxìgy je jìbìc ujtz etz axotzìpy etz nögìpy. E co yajpidìctay je jìbìc ujtz, chi yajpidìgìpy je trigo e pidägìpy ma je tze'x.”

Je ijxpejt ma je mostazapajc

³¹⁻³² Nañ jadu'n Jesús yaj'ixpijcy jadüg jìhuimbit ayuc, ymìnañ:

—Je Dios y'ane'mìn jadu'n nipaady nej tüg mostazapajc huìdìbì tüg jäy ñìip ma je' ycam. E je mostaza ytìm je' jac tìm mutz ca'ydi ni huìdìbì

ujtz t̄im. Per co je mostaza yt̄im ymuɟx etz yoñ, chi y'ahuimbijty jac m̄ij ca'ydi jacjadyi ujtz. E hue' n̄icxy yjaty janch m̄ij, ixti joon ajcxy oy yqueec m̄iñ yqueec x̄ijpy j̄im, p̄id̄ägy je ype'ñ ma je mostaza y'aacx.

Je ijxpejt ma je levadura hūidibi ca' y'oyity

³³ Nañ jadu'n Jesús yaj'ixpijc jadüg j̄ihuimbit ayuc, ym̄inañ:

—Je Dios y'ane'm̄in jadu'n nipaady nej levadura hūidibi t̄üg t̄oxyjäy yp̄idacpy m̄iid je harina, jiḡix je harina oy yp̄id̄igy.

Nej anajty Jesús yajtuñ je ijxpejt

³⁴ T̄üg'óciy Jesús yaj'ixpijc je mayjäy, j̄ihuimbit'amy yaj'ixpijc, e ni ti ca' jäy yaj'ixpijcy cayajnim̄äy j̄ihuimbit ayuc. ³⁵ Jadu'n Jesús ytuuñ, jiḡix yajcuyduñ je ayuc hūidibi je profeta Isaías yjaayhui'm̄ jecy'ajty, co jadu'n ym̄inañ:

ƒich ngapxamyich ac tim j̄ihuimbit ayuc. ƒich ni-gapxamybich tijaty hūidibi ca' p̄in nejhūiy, mabaad Dios oga'n yajcojy je naaxhuiñybi.

Jesús capxticxni nej yhuimb̄idz̄imy je j̄ib̄ic ujtz ma je trigo cam

³⁶ Chi Jesús capxycijxy m̄iid je mayjäy, chi ñicxy ma t̄üg t̄ijc. Chi yt̄igiy t̄igoty m̄iid je' ydiscípulos ajcxy. Chi Jesús ydiscípulos ajcxy nim̄ijhua'cy Jesús, ym̄inañ ajcxy:

—Tun may'ajt ƒich ajcxy xyajhuinj̄ihūiyg je j̄ihuimbit ayuc co ti mn̄igapxy je j̄ib̄ic ujtz ma je trigo cam.

³⁷ Chi Jesús yajnim̄ay:

—Ich, je jäy huídibi tsoon tzajpjoty, jadu'n ich nipaady nej je jäy huídibi niip je oybi tím ma je ycam. ³⁸ Je cam jadu'n nipaady nej tüg'óciy naaxhuiñjáy. Je oybi tím jadu'n nipaady nej je jäy ajcxy huídibi cöbijcp Dios y'ane'min. Je jibic ujtz jadu'n nipaady nej je jäy ajcxy huídibi cöbijcy ajcxy je mujcu' y'ane'min. ³⁹ Je jäy huídibi niipy je jibic ujtz, jadu'n yi' nipaady nej je ca'oybi. Je jibic ujtz cosecha, jadu'n nipaady nej je tiempo co anajty je naaxhuiñ ycixy ytigoy. Je ajcxy huídibi yajpidic je cosecha, nipaady nej je ángeles ajcxy. ⁴⁰ Jadu'n nej je jibic ujtz oy yajpujxigy etz yajpidacy jinjoty, nañ tím jadu'n nicxy yjaty mhid je jäy ajcxy huídibi cöbijcp je mujcu' y'ane'min co anajty je naaxhuiñ cixy ytigoy. ⁴¹ Co anajty je naaxhuiñ ycixy ytigoy, chi ich, je jäy huídibi tsoon tzajpjoty, nguexamyich n'ángeles huen yajmujctäy je jäy huídibi je ymigüg yajtundigooyb, etz yi huídibi ajcxy jibic-huinma'ñ tumb. ⁴² Co yajmujctähuipy je jibicjäydijc, chi ajcxy yajpidägipy mijjinjoty, jiiby ajcxy yäxa'ñ etz ytitzmucxy ytitzqueecy mhid je ayo'n ycixpi. ⁴³ Per je jäy ajcxy huídibi cuydumb Dios chojin, idam ajcxy mhid Dios Teedy jiiby tzajpjoty. Ymhidamy ajcxy tüg oy'ajti, jadu'n nipaadip nej je xii ytixxin yjajin. Pen miich ajcxy mido'n mhid, mido'mbijc ajcxy ich n'ayuc.

Je y'ixpejt je meeñ huídii yüchip

⁴⁴ Je Dios y'ane'min jadu'n nipaady nej meeñ huídibi yüch ijtp ma tüg cam. Per co tüg jäy paady je meeñ, chi mic'amy jadüg'oc yüdz tigach. Chi ooy yxondägy. Chi ñicxy etz tooctäy tüg'óciy huídibi ymhid etz juy je naax.

Je y'ijxpejt je perla huidibi tzoohuip

⁴⁵ Nañ jadu'n Dios y'ane'min jadu'n nipaady nej tüg ajuuyb adoocpi huidibi ijxtaayb tüg oybi perla huidibi tzoobatp. ⁴⁶ E co anajty paady tüg perla huidibi janch tzou, chi ñicxy tooctigoydäy tüg'óciy huidibi ymüid etz juy je perla.

Je acxmadzi'ñ y'ijxpejt

⁴⁷ E nañ jadu'n Dios y'ané'min jadu'n nipaady nej tüg acxmadzi'ñ huidibi jäy müid ycojibüby mejyoty. Chi jüby ytigiy huen ytim huidibi acxity. ⁴⁸ E co anajty je acxmadzi'ñ y'uch müid je acx, chi je jäy ajcxy yajpidzimy ma mejypa'áy. Chi ññay ajcxy jim mejypa'áy etz huin'ijxy ajcxy je oyjatypi acx etz pidaaccixy ma ycach. Je acx huidijaty ca' y'oyity, je' ajcxy y'ixjibijp. ⁴⁹ Tim jadu'n nej ti yjaty müid je acx, nañ jadu'n jada'ñ, co anajty ycixy ytigoy je naaxhuiñ. Huin'it je ángeles ajcxy ñicxa'ñ huindu'my naaxhuiñ huin'ixa'ñ je jibic jäydijc e pidäga'ñ ajcxy abicy, nañ jadu'n huin'ixa'ñ je oy jäydijc, e pidäga'ñ ajcxy nañ jadu'n abicy. ⁵⁰ Chi je ángeles ajcxy pidäga'ñ je jibicjäydijc mij jünjoty. Jüby jünjoty ajcxy yäxa'ñ ytinähua'ñ etz ytützmucxaangixy ytützqueedaangixy müid je ayo'n müid je tzaachypi ycixpi.

Je jäy huidibi jajtp nej oybi etz nej jibicpi yajpidzimity

⁵¹ Chi Jesús y'amidooy ajcxy:

—¿Nej mhujnhuüyb müich ajcxy tüg'óciy huidibi üich ti ngapxich?

Chi ajcxy y'adzooy:

—Huindzin, ti nhujnhuüy üich ajcxy.

⁵² Chi Jesús ajcxy nimay:

—Nidüg nidüg escriba co ti ixpicytäy tüg'óciy Dios yti'y'ajt y'ane'm'in huídibi tzajpjoty tzoon, hue' jadu'n nipaady nej tüg codijc comeeñybi huídijaty ymüid yjajty nej yajpidzimipy jemybi etz tucpi.

Jesús yajpaady jim Nazaret

⁵³ Co Jesús yaj'ixpijctay jada jihuimbit ayuc, chi chooñ jim. ⁵⁴ Co Jesús chooñ jim, chi ñicxy ma yci'mnaax yci'mgajp. Chi Jesús yti'giiy ma je judio ñaymujctac, e yti'giiy yaj'ixpijcp. Chi je mayjäy jii-iby ooy jihuüy huinmay nej yi' yaj'ixpicy, ymüinañ ajcxy:

—¿Ma jada' jada yëydijc ti paady jada ixpijcín? ¿Ma mic'ajt paady co ooy mijhuinma'ñ tzachtuñ? ⁵⁵ Jadayaabi yëydijc hue' yteedy'ajtpy je tzejtzpi, etz ytaj'ajtpy María. E ñch ajcxy n'ix'ajtpyich je y'uch ajcxy; Jacobo, José, Simón, etz Judas. ⁵⁶ Nañ jadu'n ya chinay ma ñch ajt je' y'uch ajcxy töxyjäy. ¿Ma oy ti paady jada ixpijcín jada mic'ajtin?

⁵⁷ Paady je maycogajpi ajcxy ca' ytunicuend. Paady Jesús ajcxy nimay:

—Huen ma'amyity tüg'óciy je mayjäy ajcxy ooy yajmij'aty yi jäy ajcxy huídibi najtzcapxiyb Dios y'ayuc, ca'ydi huídibi y'ayucnajtzcapxiyb ma yci'mnaax yci'mgajp yci'mjin yci'mdijc.

⁵⁸ Ma yci'mnaax yci'mgajp Jesús ca' jaty nej mijhuinma'ñ tunip anajty, müid co je jäy ajcxy ca' mijpidägyii.

14

Juan el Bautista co y'ögy

¹ Je huin'it tiempo Herodes hu'idibi anajty ane'mb jim Galilea t'iy'ajt paty nej Jesús ytuñ.

² E yi' nimay je ymidungmüdp'idijc:

—Yijibi jäy hu'idibi tzachtumb mijhuinma'ñ, yi' je' je Juan, je Bautista. Juan ti jugypicy jadüg'oc ma anajty ti y'ögy, paady mic'ajt müd jaydeb mijhuinma'ñ tuñ.

³ Herodes ti anajty ni'ane'md'iy co Juan huen yajmach, e yajpidägipy pujxtigoty. Jadu'n Herodes tuñ müd Herodías ycixpi. Je Herodías je' anajty müd jayijp'aty ti y'icy Felipe, je Herodes y'ajch, chi ti ixmajch Felipe, chi y'icy müd Herodes. ⁴ Juan ti anajty nimäy Herodes co ti ytundigooy co ti picy müd Herodías.

⁵ Je rey Herodes ooy anajty jayaj'öga'ñ yi Juan, per tzigüyb anajty müd je mayjäy. Com je mayjäy ti anajty mibicy ajcxy co Juan hue' anajty tugi Dios t'iy'ajt müdpi, tüg profeta. ⁶ Co Herodes yjimjtpejty, chi anajty ñayñixiduñyii, e chi Herodías ñix ñicy ejtzip ma Herodes yhuinduu. Je rey ooy jäygidacy nej anajty Herodías ñix y'ejch. Paady Herodes Herodías ñix nimay:

⁷ —Dios ich yam ngapxpatpy co nmöhuamyb ti mdimypijctzooyb.

⁸ Chi Herodías nimay je' ñix co huen pijctzoohui je Juan, je Bautista, ycohuajc ma tüg texy. Chi Herodías ñix je rey nimay:

—Ndzojcypich co müch xymöhuip Juan, je Bautista, ycohuajc ma tüg texy.

⁹⁻¹⁰ Co jadu'n midooy je rey, chi ytigüy tajp maybi mij cajee. Per co ti anajty Dios capxpaatni, yminaaní mayjäy yhuinduu co ymöhuamyb tijaty ypijctzooyb. Paady ane'my tüg soldado co

huen nícxy yajtzoñyí Juan ycohuajc, e möhuípy Herodías ñíx. ¹¹ Huin'it je soldado oy je Juan ycohuajc yajminajci jíby pujxtigoty. Chi moy je töxy'anäg, e je töxy'anäg yejcnaixni ma ytaj.

¹² Huin'it xí je Juan ydiscípulos ajcxy yja'ty. Chi ajcxy oy yajnaaxtigíy je Juan ñinícx. Chi ajcxy oy Jesús yajnimäy.

Jesús yajcay migoox mil jäy

¹³ Co Jesús nejhuy ti anajty ti ytuñyí ti yjadyí míd Juan, chi ytigíy ma tüg barco naydüg, e nícxni ma tüg it ma ca' pín chinäy. Co je mayjäy nejhuy co Jesús ti ñícxy, chi ajcxy choday canaag agajp, nícxy ajcxy ma Jesús yajpaady, hue' tecygi'm ajcxy nícxy. ¹⁴ Co Jesús ypidzimy barcojoty, chi ijxy mayjäy. Jesús ooy pa'ayoy je mayjäy, e yajtzoocy je pa'mjäy huídibi anajty ajcxy jim ymíd miiñ. ¹⁵ Com ti anajty chuu'íñi, paady je' ydiscípulos ajcxy nimíjhua'cy Jesús, e nimay ajcxy:

—Ti chuu'íñ, e ca' ya pín china'y, paady capxcíxy míd jada mayjäy ajcxy, jaydéb ajcxy nícxy ixtäy ycaayín y'uucín ma yí mutz cajp ajcxy huingonbi.

¹⁶ Chi Jesús ymíñañ:

—Ca' ycopicyíty co ajcxy nícxy jíxy ixtäy. Miich ajcxy möhuíp caayín uucín.

¹⁷ Chi je' ajcxy ymíñañ:

—Per ích ajcxy jéyí yeeby nmídity migoox tzaj-caagy etz metz acx.

¹⁸ Chi Jesús ymíñañ:

—Mimiingix yam'amy.

¹⁹ Chi Jesús nimay je mayjäy co huen íñay'íhuíydaaygíxy ma pí'cmíy'ung nícx. Huin'it Jesús je migooxpi tzajcaagy conígy etz je metzpi

acx. Chi ypa't'ijxy jiiby tzajpcíxy, e yajnajxy Dioscojuyipy. Chi tujc-huäcxy je tzajcaagy etz moy je' ydiscípulos ajcxy, co huen yajhuäcxcíxy ma je mayjäy. ²⁰ Nidüg'óciy je mayjäy ajcxy ycaay cüxyi. Co je mayjäy ycaayday, chi je discípulos ajcxy yajmujcy je cayduc jicxtuc, e yaj'ujch ajcxy majmetz cach. ²¹ Migoox mil anajty ajcxy je yëydijctijc huidibi cay uuc. E ca' ajcxy michoy je töxyjäydijc ajcxy etz je y'ung y'anäg ajcxy.

Jesús yöy nãhuingíxy

²² Chi Jesús ane'my yi' ydiscípulos ajcxy co huen barco tigüygíxy mic'amy, jigix ñicxípy ajcxy jim mejy nãnaxy. Nami yi' ydiscípulos ajcxy choñ barcojoty, Jesús ycapxycíjxy mïd je mayjäy huen nícxcíxni. ²³ Co anajty Jesús ti ycapxycíxy mïd je mayjäy, chi ñicxy naydüg ma tüg cögop Dios mibijctzoobi. Co ycoodzïñ Jesús naydüg anajty yajpaady. ²⁴ Co ycoodzïñ, mejy cujc anajty je barco cujc nícxy. E je nã ooy anajty ymijjëtzpety ma je barco, je' co ooy anajty mic yjanchpojy. ²⁵ E co oy ymoñiy, huin'it Jesús ymijhua'cy ma je' ydiscípulos ajcxy, ñicxy adüyöyb mejyhuingíxy. ²⁶ E co je discípulos ajcxy ijxy co Jesús anajty ymiiñ mejyhuingíxy, chi ajcxy ooy ñay'adzigiíy. Ooy ajcxy yaaxqueecy ymïnañ ajcxy:

—Hue' ñch ajt ijxmaníyim.

²⁷ Chi Jesús mic'amy ymigapxy ajcxy etz nïmay:

—Huinmic jotmic naybidáacígíxy, ñch yi'. Ca' mdzigíygyxy.

²⁸ Chi oy Pedro Jesús ymigapxyii, nïmaayi:

—Huindzin, pen janch miichity, ane'mgich co huen ich miich ninicxip adüöyöp mejyhuingíxy.

²⁹ Chi Jesús Pedro nimay:

—Min.

Huin'it Pedro yminajcy ma je barco etz ñicx ma Jesús adüöyöp mejyhuingíxy. ³⁰ Per co Pedro jihui'ñybicy jadu'n nej anajty ooy mic yjanchpojoy, chi ooy chigiy, chi oy oga'n ytigíyñi quimbi, chi yaaxqueecy, yminañ:

—¡Huindzin, ich yajtzóocigich!

³¹ Huin'it Jesús oy yci' mimajtzi, chi nimay:

—Miich, janch hueeni mmibijcin. ¿Nej co ca' yajxon xymibicyich?

³² Co Pedro etz Jesús ytigíy barcojoty, huin'it je mic poj ñajxy. ³³ Huin'it je' ajcxy jiiby barcojoty ycojxtinay'ihuیداay ma Jesús yhuinduu. Chi yminañ ajcxy:

—Janch tiy'ajt co miich Dios xy'ung'adyii.

Jesús yajtzoctay je pa'mjäy ajcxy jim Genesaret

³⁴ Co ajcxy ymejyñajxtay, chi ajcxy oy ja'ty ma je Genesaret naaxjot. ³⁵ E co je jäy ajcxy nejhuüy co Jesús ti yjäty ma yi' ajcxy naaxjot, chi ajcxy tiy'ajt quejxy ma tüg'óciy cajp etz rancho huinduy agonbi co Jesús yjimity. Chi je mayjäy mñd miñ tüg'óciy je pa'mjäy ma Jesús. ³⁶ Chi ajcxy cohuanüy Jesús, pen jeb je pa'mjäy ñidoñyii je yhuít. E tüg'óciy je huidijaty ñidonip je' yhuít, je' ajcxy chooctay y'agidactay.

15

Huidi jäy yaj'ahuimbijty janch jibic

¹ Chi ymiiñ ma Jesús nijëjity fariseo jäy ajcxy, je huindzindijc huidibi tzachpadumb judío ycostumbre. Nañ jadu'n miiñ nijëjity escribas, je huindzindijc huidibi ajcxy nijaydutr anajty Dios ñecy. Je fariseos etz escribas ajcxy ti choongixy anajty jim Jerusalén, chi ajcxy y'amidooy Jesús:

² —¿Na'amy co miich mdiscípulos ajcxy ca' cuydungixy judío ñi'ap costumbre? Yi' ajcxy ycaaygixy y'uuccixy, e ca' jayijp ycibujcixy, ca' ixpujcixy ixjëtzcixy ypocy.

³ Chi Jesús y'adzooy, yajtiy:

—¿Na'amy co miich ajcxy mgapxycömidodägy Dios? Mdzachcuydungixy mgi'ngostumbre ma yjapadyii mguydungixy ixyipy Dios ycötujcin.

⁴ Com Dios ti y'ane'my ma ycötujcin: “Yajmij'at mdaj mdeedy, e pinjaty jibic nigapxy ni'ojyib ytaj yteedy, ögipy yi'.”

⁵ Per miich ajcxy minamb co tüg je yëydijc jëbi nimäy ytaj yteedy: “Ca' ñich miich ajcxy nbubedañ, com ti n'ahuanñyich ma Dios tüg'óciy tijaty nmüdich.”

⁶ Chi huen ytimpinity jadu'n minamb, ca' ocpubedaanip ytaj yteedy, e jadu'n miich ajcxy myajtigoy Dios y'ane'min com tzachtunaangixy mgi'ngostumbre. ⁷ Miich ajcxy naybidaacip jadu'n nej jihuñy tudägy jäy, e ca' yjanchity. Janch tiy'ajt jadu'n nej jecyip Isaías jaaybejty yajhuim'y co Dios jadu'n yminañ:

⁸ Jadayaabi jäy xyajmij'ajtpich ahuac aguy, per ca' ajcxy xyajmij'atyich cixyjot huinijot.

⁹ Naadigi' co ajcxy xyhuin'ñygixyich xyhuinyáxcixyich. Mnayyaj'ixpijcigixy ayuc tiy'ajt huidibi jäy ajcxy ti cojy ti maacxy.

10 Huin'it Jesús huomujctay je mayjäy, ymĩnañ:

—Amĩdoo'ijtcixy iich n'ayuc etz mhujnjhuĩygiixip. 11 Ca' ji ni ti jicxy huĩdi jäy ypidacpy ma y'ahuac nicxy yajpocycäyii. Yi' janchtiy je jibic ayuc huĩdibi pidzim ma jäy ajcxy y'ahuac, yi' ajcxy yajpocycähuĩb.

12 Chi ymĩñ ma Jesús je' ydiscĩpulos ajcxy, chi ajcxy ñĩmaayi:

—¿Nej miich mnejhuĩyb co je fariseos ajcxy ñijotma'tpy co ajcxy midoy je ayuc jadu'n nej miich mĩnañ?

13 Chi Jesús y'adzooy, ymĩnañ:

—Huen tim huĩdibi ane'mĩn huĩdibi ca' Dios ti pidägy, Dios yajtigoyam, tim jadu'n nej jäy ajcxy huijxiygy ujtz huĩdibi ca' y'oy'ujtzity. 14 Ixmajtzicx yi fariseos etz escribas ajcxy. Ca' ajcxy hujnjhuĩy Dios yti'y'ajt. Jadu'n ajcxy nipaady nej jäy huintzpi, e co tũg huintzpi huijtzhuĩdity jadũg huintzpi, chi nimetz nicxy yjutcögägiy.

15 Huin'it Pedro nimay Jesús:

—Yajhujnjhuĩygy iich ajcxy jada jihuimbit ayuc.

16 Chi Jesús ymĩnañ:

—¿Nej miich ajcxy nañ jadu'n ca' mhujnjhuĩy jada jihuimbit ayuc? 17 ¿Nej ca' miich ajcxy mnejhuĩy co tũg'ócicy huĩdibi tigiĩyb ma miich ajcxy m'ahuac, je' nicxp ma miich ajcxy mjot etz ypidzĩmy ma ajcxy mnĩnicx? 18 Per je jäy huĩdibi jibic capxp, capxp je' je jibic ayuc huĩdibi ymĩd ma yjot yhuinma'ñ. Jada jibic ayuc yajpocychimĩcp je jäy. 19 Yi' jibicpi huĩdibi tzomb ma jäy ajcxy yjot yhuinma'ñ, yi' je' jäyyaj'ögĩ huinma'ñ, je töxyjäy migapxtigoyĩ huinma'ñ, meedzi huinma'ñ,

je indägüi huinma'ñ, je piitz capx huinma'ñ.
 20 Yijadu'mbi jibic-huinma'ñ yajpocycäb jäy ajcxy
 ma Dios. Per co jäy ajcxy ycaay y'ügy, ma ca'ni
 ajcxy pocy ixpujcixy jayijp, ca' je' ypocycäy ajcxy
 ma Dios.

Tüg töxyjäy huidibi ca' judíojäy mibijc Jesús

21 Chi Jesús jim chooñ, nicxy ma je Tiro etz Sidón
 naaxjot. 22 Jim anajty tüg töxyjäy chinäy. Jada
 töxyjäy hue' anajty cananeajäy, canan judíojäy. Chi
 yi' nimiiñ Jesús, chi nimay:

—Huindzin, David y'ap y'oc, pa'ayoogich. Ich
 nmüdich tüg nix huidibi ymüd ca'oybi etz oy tza-
 achypa paady.

23 Per ca' ni nej Jesús y'adzoohui. Huin'it je'
 ydiscípulos ajcxy miiñ ma Jesús, e ycohuanüy,
 minañ ajcxy:

—Capxycix müd jada töxyjäy, com nigo xy-
 payaax xypadinaayim.

24 Chi Jesús yminañ:

—Dios ich ti xyquexyich jeda'ajty ma je israeli-
 tasjäy huidibi y'alma tigoyam.

25 Chi je töxyjäy ymijhua'ci ma Jesús, e yco-
 jxtinay'ihuüy ma je yhuinduu, chi yminañ:

—Huindzin, tun may'ajt pubejtich.

26 Chi Jesús yminañ:

—Ca' jadu'n y'oyity co n'ixmadzipich je israeli-
 tasjäy (Dios yjäy), e nbubedipich müich ajcxy. Co
 jadu'n ndunipich, jadu'n nipaadip nej jäy ajcxy
 y'idich co ajcxy pijci je ajcxy y'ung ycaagy, e möy
 je uc.

27 Huin'it je töxyjäy y'adzooy:

—Janch tiy'ajt jadu'n nej miich mīna'ñ, per ixti ycaayb je uc je tzajcaagy y'abu'x hu'idibi cāb ma yhuindzin mesa.

²⁸ Chi Jesús je töxyjäy nimay:

—Janch mij mmibijcin. Ich ndunaamybich jadu'n nej miich mdzocy.

Huin'it hori je töxyjäy ñix choocy.

Jesús yajtzögy mayba'mjäy

²⁹ Chi Jesús jim chooñ. Chi ñajxy ma Galilea mejypa'. Chi ypejty ma tüg cögop, jim ñay'ihuüy.

³⁰ E huin'it oy mayjäy m̄dmiiñ pa'mjäy hu'idibi huintz, uum, c̄mucy tecymucy, etz huen tim hu'idibi pa'mjäy. Pidacy ajcxy je pa'mjäy ma Jesús yhuinduu, e yi' yajtzoctay. ³¹ E je mayjäy ooy tzachjihuiy tzachhuinmaay ajcxy co anajty je uumbi ti capx̄igy, je huintzpi ti y'ijx̄igy, je c̄mucpy tecymucpyi ti yöȳigy. Chi je mayjäy ytiḡiyy ñbaady capxpaady Dios, je Dios hu'idibi je Israel jäy ym̄jpidacpy.

Jesús yajcay m̄daax mil jäy

³² Chi Jesús mijhuoy je' ydiscípulos ajcxy, nimay:

—Ooy nba'ayooyich jadayaab jäy ajcxy. Com cujc m̄duḡig x̄i ijtc̄ixy ya m̄d ñch etz ca' ajcxy m̄d̄ity ti ycaayipy. Ca' nguexhuimbida'ñich ajcxy ayuu ma yt̄ic, ca' yjetyity yajpa'mgojip ajcxy tü'am.

³³ Chi je' ydiscípulos ajcxy m̄nañ:

—¿Per ma n'ocpatim ti jada jäy ajcxy ycaayipy yj̄icx̄ipy ya ma jada abac it ma ca' pin chinäy? Co ooy mayjäyity.

³⁴ Chi Jesús yajtiy:

—¿Naag jiiby tzajcaagy miich ajcxy m̄jacm̄d̄ity?

Chi ajcxy y'adzooy:

—Jëyi huixtujc tzajcaagy etz hueen acx.

³⁵ Chi Jesús nimay je mayjäy co huen iñay'ihuiydaaygixy naaxcíxy. ³⁶ Chi Jesús conigy je huixtujcpi tzajcaagy etz je hueenip acx, e yajnajx Dioscojuyip ma Dios. Chi tujc-hua'cx etz moy je' ydiscípulos ajcxy. E yi' ajcxy yajhua'cx je jicxy picy ma je mayjäy. ³⁷ Chi je mayjäy nidüg'óciy ycaý cüxi. Jesús ydiscípulos ajcxy yajpidigy huixtujc cach cayduc uuctuc tiibi anajty yconaxy. ³⁸ E je huídibi ajcxy cay hue' anajty naybáatigixy nimidaax mil, abicy je töxyjäydijc etz pi'ctijc ajcxy. ³⁹ Chi Jesús ycapxycíxy miid je mayjäy huen ajcxy nícxcixyñi ma ytijc. Chi Jesús ytigiiy barcojoty etz ñicxni ma Magdala naax jot.

16

Je fariseos etz je saduceos ajcxy pijctzoogixy tüg ijxpejt mijhuinma'ñybi

¹ Chi je fariseos etz saduceos y'oy ajcxy ixty Jesús. Yi' ajcxy ijxta'n octunaangixy miid Jesús, paady ajcxy pijctzoy co Jesús huen yaj'ixyii ajcxy tüg ijxpejt huídibi tzomb tzajpjoty. ² Chi Jesús y'adzooy je' ajcxy:

—Co miich ajcxy m'ixy tzuu yi' tzajp tzaptz, chi miich ajcxy mina'ñ com jabom oy tiempo yajpada'ñ. ³ Per co miich ajcxy m'ixy jopy je tzajp tzaptz etz huimbicy, chi ajcxy mina'ñ co ca' y'oyity yi' tiempo. Miich ajcxy ooy mnaybidägyii nejihuüy ooy m'ixpicity ma Dios ytiy'ajt, e ca' yjanchity. Miich ajcxy jëbi yi' tzajp myajcapxy, per ca' mnejhuüygy nej yhuimbizimy yi' mijhuinma'ñ

ijxpejt huídibi Dios ytumyb ma jadachambi xii tiempo. ⁴ Yi jäy ajcxy huídibi cham tzinaayb, ooy yjibicjäyity ajcxy, ca' ajcxy capxymidoy Dios. Yi' ajcxy chojcpy co nyaj'ixipyich tüg ijxpejt mijhuinma'ñ huídibi tzomb tzajpjoty. Ca' Dios yaj'ixa'ñ ajcxy jadüg mijhuinma'ñ, com miid miich ajcxy jaybetyity je mijhuinma'ñ ijxpejt huídibi Dios ytuun miid Jonás jecy'ajty.

Chi Jesús ixmajch je fariseos etz saduceos ajcxy, chi ñicxni.

Fariseos jäy ajcxy y'ixpijin

⁵ Co Jesús etz ydiscípulos ajcxy yja'ty ma jadüg nñiba', chi je' ajcxy yjäydigoy je tzajcaagy. ⁶ Chi Jesús yminañ:

—Naygüend'ájtigix miid yi fariseos etz saduceos ajcxy, ca' mijpidaaci yi' ajcxy y'ayuc ytiy'ajt, com jadu'n yi' nipaady nej levadura.

⁷ Chi Jesús ydiscípulos ñayñimáayigixy miñ xyipy:

—Paady jadu'n yminañ, je' co ti ñch ajt je tzajcaagy njäy digooym.

⁸ Jesús nejhuiy nej ajcxy nayñimáayigixy miñ xyipy, chi nimay ajcxy:

—¿Na'amy co miich ajcxy mīnaangixy co ca' ajcxy tzajcaagy miidity? Janch hueeni miich ajcxy mmibijcin. ⁹ ¿Nej ca'ni miich ajcxy mhuinjihuiyi? ¿Nej ca' mjäymechyii co ñch migoox tzajcaagy nyajhuäcxy etz ni migoox mil je yëydijctijc ana-jty huídibi ajcxy cay? ¿E ni mga'ajihuiyii ajcxy naag cach cayduc uuctuc ti myajpidigy? ¹⁰ ¿E ni mga'ajihuiyii ajcxy co huixtujc tzajcaagy nya-jhuäcxyich ma nimidaax mil yëydijc ajcxy huídibi caay etz naag cach cayduc uuctuc myajpidigy

ajcxy? ¹¹ ¿Nej co ca' miich ajcxy mhuinjihuïy, co ca' ñich yam nigapxy yi tzajcaagy huïdibi miich ajcxy ti mjäydigoy, co ti nyajnimaaaygixy je levadura huïdibi je fariseos etz saduceos ajcxy ymiid?

¹² Huin'it Jesús ydiscípulos ajcxy huinjihuïy co Jesús ca' anajty je' ti yajnimäyïi ajcxy co huen naygüend'ájtigixy miid tzajcaagy levadura. Hue' janchtiy Jesús yajnimay ajcxy co huen naygüend'ájtigixy miid je fariseos etz saduceos ajcxy y'ixpijcïn.

Pedro nidiy'aty co Jesús yi' je' je Cristo

¹³ Co Jesús yja'ty ma Cesarea Filipo naaxjot, chi Jesús y'amidooy je' ydiscípulos ajcxy:

—¿Nej jäy ajcxy ymina'ñ, pínic ñich?

¹⁴ Chi ajcxy ymina'ñ:

—Nijëjity jäy ymina'ñ co miich je' Juan je Bautista. Nijëjity jäy ymina'ñ co miich je' Elías, e nijëjity ymina'ñ co miich je' Jeremías o jadüg profeta (huïdibi tzïnay jecy'ajty).

¹⁵ Chi Jesús ymina'ñ:

—¿E miich ajcxy nej minaangixy, pïn ñich?

¹⁶ Huin'it Simón Pedro y'adzooy:

—Miich je' je Cristo, je Dios y'ung.

¹⁷ Chi Jesús y'adzooy:

—Jotcuje miich Simón, Jonás y'ung, je' co ni pïn xycayajnimäy jada tiy'ajt, tügpajc je Dios Teedy nDeedyich huïdibi jüby tzajpjoty, yi' ti xyajne-jhuïy jada tiy'ajt. ¹⁸ ñich miich nimaayb co miich mxii'adiyb Pedro, e hue' yhuimbïdzïmy tzaa (hue' je', je tzaa tija'ñ je ayuc huïdibi Simón ycapxy co je Cristo hue' je' anajty Dios), e ma jada tzaa ji ngoja'ñich ñich ndzajptijc (hue' yhuimbïdzïmy, ma

ich n'ane'min chondäga'ñ), e ni ca' oybi ymic'ajt ycamimadägiipy. ¹⁹ Ich miich nmöhuamyb je cötujcin jadu'n nipaady nej tüg ahuaast huidibi müd myaj'ahuädziipy Dios y'ayuc ytiy'ajt. Tüg'óciy huidibi miich mgapx'adujcipy ya naaxhuiñ, Dios nañ jadu'n capx'adugipy jiihy tzajpjoty, e huidibi miich ya naaxhuiñ ca' capx'aducy, Dios nañ ca' capx'adugipy jiihy tzajpjoty.

²⁰ Huin'it Jesús nimay je' ydiscípulos ajcxy, co ca' huaad ni pin nimäy co yi' je' je Cristo.

Jesús nigapxy je' y'öcin

²¹ Ixti huin'itni Jesús ytigiy yajnimay je' ydiscípulos ajcxy co nicxamb jim Jerusalén etz co jim ooy y'ayoohua'ñ. Jim Jerusalén je judío mijjädijc, je teedytjic huidibi tungmüdpi, etz yi escribas ajcxy ooy chaachytuna'ñyii etz yaj'öga'ñyii. Per codugig xi huin'it yjugypiga'ñ jadüg'oc. ²² Huin'it Pedro müdnicy Jesús ahuingujc, e oy ogy, yminañ:

—Huindzin, ca' Dios tzocy nicx jadu'n mjaty. Müd miich ca' jëbi jadu'n mjadipy.

²³ Per Jesús yhuäc-huimbijty, chi nimay Pedro:

—Huinhuäctuutcih Pedro, je mujcu' miich jadu'n xyajcapxp. Ca' nigoo xy'adziyich. Ca' miich mhuinma'ñybidägy nej Dios tzocy. Yi' janchtiy miich mhuinma'ñ'ajtpy nej jäy ajcxy tzocy.

²⁴ Huin'it Jesús je' ydiscípulos ajcxy nimay:

—Pen je pinjaty xypamina'ñich, huen yci'mdzojcin ixmajtztäy etz huen yhuinma'ñypidägy co ayoohuipy müd ich ycipi, ixti mabaad y'ögy. ²⁵ Huen pinjäy huidibi ca'

ayoohua'ñ m̄id ñch yc̄ixpi, hue' je' yajtigoyamy yí' yjugy'ajtin. Per pinjaty xypanicxpich oy nej ytimyjadipy, hue' je' ypadamyb yjugy'ajtin huídibi ca' yc̄ixipy ytigoyipy nimina. ²⁶ ¿Ti jäygidaacin yí' co t̄üg jäy y'ocnayyajpad̄iyb yí' meñ etz mic'ajtin huindu'my ñaaxhuiñybi, e yjugy'ajtin c̄ixipy tigoyipy tücc̄i'y? ¿Jadu'ñyi jēbi jäy y'alma yjugy'ajtin occojuyí? N̄igi choohuity jäy ajcxy y'alma yjugy'ajtin, ca'ydi jac ni ti. ²⁷ H̄ich, je jäy huídibi t̄zoon tzajpjoty, miinaambich jadüg'oc ya naaxhuiñ m̄id je ángeles ajcxy etz m̄id nDeedyich y'oy'ajtin. Huin'it micuejt̄ahua'ñ t̄üg'óciy je jäy nej anajty ti ytuungixy, pen oy, o ca' y'oyity. ²⁸ Janch tiy'ajt jadu'n nej nimaaygixy co ji ya naagity huídibi ca' y'öga'ñ ixti cooni xy'ixipyich jadüg'oc co ñch anajty nm̄iñ ane'mbi.

17

Co Jesús ñin̄icx yajtigach

¹ Codudujc x̄i huin'it Jesús m̄idnicxy Pedro, Jacobo, etz y'uch Juan ma t̄üg mijcop, ma t̄üg cop huídibi ooy yc̄ixity. ² E j̄im copc̄ixy Jesús ñin̄icx ñaygojtigajtzi ma Pedro, Jacobo etz Juan ajcxy yhuinduu. Jesús yhuiñyj̄ip ytiḡiy ad̄icxp nej je x̄i yt̄icxin. E Jesús yhuit y'ahuimbijty janch poob jadu'n nej t̄üg t̄icxin. ³ E t̄imetiini oy ijxcixy Moisés etz Elías ycapxy miydägy anajty m̄id Jesús. ⁴ Chi Pedro n̄imay Jesús:

—Huindzin, oy y'oyity co ñch ajt ya. Pen miich mdzojcpy jēbi ñch ajcxy nyaj'oȳy tuḡig t̄ijcquemy. T̄üg miich mje', t̄üg Moisés yje', etz t̄üg Elías yje'.

⁵ Pedro capxp anajty, tim huin'ítiy tüg joc yajñidigoyday je' ajcxy huídibi ooy adicxp anajty. E ma je joc yajmidoy tüg ayuc huídibi yminañ:

—Jadayaabi yëydijc ich je' n'ung'ajtpy huídibi ooy ndzocy njihuüyich etz yi' ich miid njotcuçity. Amído'o'it miich ajcxy yi' y'ayuc.

⁶ Co Pedro, Jacobo, etz Juan jadu'n midooy je ayuc chooñ jocjoty, chi ajcxy ooy chigüy etz ñayñitziitcidaaci ajcxy.

⁷ Huin'it ajcxy Jesús ñimiini etz nidoñ ajcxy, e yminañ:

—Pidicix, ca' mdzigüygixy.

⁸ E co ajcxy y'ixügy, ca' anajty jim Elías etz Moisés. Naydügpajc Jesús yjac-hui'my miid je' ajcxy. ⁹ E co ajcxy yminajcy ma je cop, chi ajcxy Jesús nimay:

—Ca' ni pin miich ajcxy nyajnimähuiipy jadu'n nej ti m'ijxcixy cham, ixti cooni ich anajty ti njugyicyich jadüg'oc ma anajty ti n'ögich.

¹⁰ Huin'it je' ydiscípulos ajcxy yajtiy Jesús:

—¿Nej co yi' escribas, yi' ajcxy huídibi nijaydutr etz yajñigüeyp Dios y'ayuc, yminaangixy co Elías yi' miinaam jayijp etz axam je Cristo?

¹¹ Chi Jesús y'adzooy:

—Janch tiy'ajt co Elías ymiinañ etz yaj'oyiydähuamy tüg'ócüy miid Dios ycixpi. ¹² Per ich miich ajcxy nimaayb co Elías ti y'oy. E je jäy ajcxy ca' nejhüy pin yi', e ooy jibic tuuñ ajcxy, nej tim tzojccixy. E nañ jadu'n ich, je jäy huídibi tzoon tzajpjoty ayoohuaambich ma yi' ajcxy.

¹³ Huin'it je' ydiscípulos ajcxy huinjihuüy co Jesús hue' anajty ñigapxyp je Juan, el Bautista.

Jesús yajtzögy tüg jäy mo'tpa'mmüdpí

¹⁴ Co Jesús, Pedro, Jacobo etz Juan yjäty jim ma je mayjäy ajcxy, chi ñimiini tüg jäy. Chi je jäy ycoxtinay'ihuiy ma Jesús yhuinduu, chi yminañ:

¹⁵ —Huindzin, ich nmang pa'ayoohuic. Je' co ymüd mo'tpa'm etz oy yaj'iyoooyi. Canaag'oc ti ycäy jinjoty ñijoty. ¹⁶ Paady ich ti nmüdmiiñich ma miich mdiscípulos ajcxy, per ca' ajcxy ymadacy yajtzögipy.

¹⁷ Chi Jesús y'adzooy:

—Miich ajcxy huüdibi jugy'ajtp jadachambi xü tiempo, ca' miich ajcxy mmibiga'ñ Dios, ca' miich ajcxy mgapxymidoohua'ñ Dios. ¿Naag xü naag tiempo ich miich ajcxy njacmimexxtugipy? Yajmiingix yi yeeg'anäg.

¹⁸ Co je yeeg'anäg yajmüdja'ty ma Jesús, huin'it Jesús ane'my je ca'oybi co huen pidzim ma je yeeg'anäg. E mic'amy je' chögy.

¹⁹ Jac co hueeñi, je' ydiscípulos ajcxy müdmüydac Jesús ahuingujc, chi ajcxy yajtiy ma Jesús:

—¿Nej co ich ajcxy ca' ti nmadägy nicx nyajpidziimgixyich je ca'oybi ma je yeeg'anäg?

²⁰ Chi Jesús yminañ:

—Je' co miich ajcxy hueeni mmibijcin. Janch tiy'ajt jadu'n nej nnimaaygixy, co ixypy miich ajcxy xy'ocmibicyich, ooy ixypy jëda'ajty jadu'n nej je jac mutzpi ujtz tim, huin'it jëbi ixypy mnimäy jadayaabi cop co huen jühuäcy ya etz huen nicxy huingduum, chi ñicxip je cop. Ni ti ji ycatzipity pen janch miich ajcxy müdity mibijcin. ²¹ Jadayaabi picy ca'oybi pidzimipy co

Dios nmibijctzoohuim mictägy etz ayuu'ijt, ca' jac ti huinma'ñ.

Jesús nigapxy jadüg'oc y'öc'in

22-23 Co anajty ajcxy yhuidity tügmucy jim ma Galilea y'it, chi Jesús nimay je' ydiscípulos ajcxy:

—Ich, je jäy huídibi tzoon tzajpjoty, yajciyegipyich ma jäy. E yi' ajcxy xyaj'ögibich etz codugüg xii njugypigipyich jadüg'oc. Co je' ydiscípulos ajcxy jadu'n midooy, chi ajcxy ooy yjotmaybaty.

Je cogüejt'in ma je tzajptijc

24 Co Jesús yja'ty müd je' ydiscípulos ajcxy jim ma je Capernaum cajp, chi huídi anajty ajcxy meeñ yajmujcp müd tzajptijc ycixpi, oy ajcxy ijxcixy je Pedro, chi ajcxy y'amidooy:

—¿Nej müch mhuindzin ycuejcpy meeñ müd tzajptijc ycixpi?

25 Chi Pedro y'adzooy:

—Cuejtpy.

E huin'it hora co anajty Pedro ytigüy tigoty, chi Jesús jayijp ymigapxy, ñimay:

—Simón, ¿nej mmina'ñ? ¿P'in je rey ajcxy yajcuejcpy? ¿Yi' yjäy o huingjäy?

26 Chi Pedro y'adzooy:

—Ma huingjäy huídibi ane'my ijtp.

Chi Jesús y'adzooy:

—Ah, ca'tz yi' yjäy huaad ti cuejtcixy. 27 Per ca' ndzocyich co je cogüejtpi nyajcapxmayiim, nicx müch ma yi' mij laguun e cohuidzi' jiiiby mxu'ñ, e je acx huídibi anajty jayijp huomb, je' myajpidzimipy, e ma y'ahuac jiiiby mbaadipy tüg

meeñ, yajpidzim je meeñ e nicx cuet miid ich ycipi etz miid miich ycipi.

18

¿Pin je' jac nig mijip?

¹ Je huin'it hora je' ydiscípulos ajcxy ymijhuactay Jesús etz yajtiy:

—¿Pinjäy je'jac nig ymiid je mij'ajtín ma Dios y'ane'my jiiiby tzajpjoty?

² Chi Jesús mijhuoy tüg je pi'c'anäg. Chi pidacy je pi'c'anäg cujc'amy ma yi' ajcxy. ³ Chi Jesús ymínañ:

—Janch tiy'ajt ich miich ajcxy nimäy, pen ca' miich ajcxy jothuimbijtcixy etz naybidaaccixy mhuinmañ jadu'n nej jada pi'c'anäg huinmañ miid, pues ca' mdigihuipy ma Dios Teedy y'ane'my jiiiby tzajpjoty. ⁴ Paady, pinjaty miid yhuinmañ yung nax jadu'n nej jadayaabi pi'c'anäg miid yhuinmañ yung nax, je' je' je huidiib jac nig mij'ajtín ymiid jiiiby ma Dios y'ane'my.

⁵ Hueñypinity huidibi miid ich ycipi cöbigipy etz tzogipy tüg pi'c'anäg, jadu'n nej jada pi'c'anäg ti ndzocyich ti ngöbicyich, hue' jadu'n nipaady nej jihuüy ti xycöbicyich ti xychocyich.

Je huidibi ooy ycojotmayity co nbocycähuim

⁶ Hueñypinity huidibi jibic-huinmañ ymibidzimy, e yajpocycäy yi' jadu'mbi pi'ctijc huidibi ajcxy xymijnicxpejtpich, jac'oy ixypy co yi' jadu'mbi jäy ytimyñayyöcxodziyi tüg paandzaa etz ñayñajtzihibihuipy meyjoty. ⁷ Ooy ayo'ñity ooy jibicity co ji naaxhuiñybi yajpaady tijaty huidibi yajtundigooby jäy ajcxy. Ni mina xii ca' tigooy y'idipy tijaty huidi yajtundigoy je jäy ajcxy. Per mij

ayo'n pada'ñ m̄id ȳi Dios pinjaty cojp tundigooȳi.
⁸ Pen miich m̄gi' o miich mdecy xyajtundigooyb,
 jac'oy ixyipy co m̄im'ixpuxy etz ixjibipy jiguem.
 N̄igi oy co m̄diḡihuipy c̄iduc tecytuc jiiby tzajpjoty
 etz ca'ydi co m̄diḡihuipy m̄id metz m̄gi' etz metz
 mdecy m̄ij̄ijnjoty hūidibi nim̄ina ycapich. ⁹ E pen
 ȳi mhuiin tug xyajpocyc̄ahuamb, t̄im yajpidz̄im
 etz ixc̄ätz jiguem. Com jac'oy m̄diḡihuipy m̄id
 t̄üg mhuiin ma jugy'ájt̄in hūinix̄ibi, ca'ydi co
 m̄diḡihuipy m̄id metz mhuiin ma ȳi j̄in hūidibi
 cam̄ina x̄i ycapich.

Je y'ijxpejt, je c̄öbixy hūidibi t̄igooy

¹⁰ Ca' m'ixtijc̄ixy ni t̄üg pi'c'anäg hūidibi
 xym̄ibjcp̄ich. Ȳi' ajcxy je' y'angeles t̄im ijt̄ib jiiby
 tzajpjoty ma Dios Teedy, ñch nDeedy yhuinduu.
¹¹ ñch je jāy hūidibi t̄zoon tzajpjoty, t̄i nm̄iñich ya
 naaxhuiñ, je' co nyajnitzōga'ñich je jāy ajcxy
 y'alma hūidibi t̄igoyam. ¹² ¿Nej miich ajcxy
 m̄ina'ñ? Pen t̄üg jāy ym̄id m̄igo'px c̄öbixy, etz pen
 yöȳdigooyb nid̄ügt̄i c̄öbixy, ¿nej ca' j̄ebi ixmach je
 nim̄ida'px majmocx m̄idaax c̄öbixy etz ñicxy ixt̄ay
 je jad̄ügp̄i hūidibi yöȳdigooy? ¹³ E pen ypatpy je
 t̄ügp̄i hūidibi yöȳdigooyb, chi ooy xondägy m̄id co
 anajty t̄i paady hūidibi anajty t̄i yt̄igooy, ca' jadu'n
 yxondägy m̄id je nim̄ida'px majmocx m̄idaax
 hūidibi ca' anajty t̄i yöyt̄igooyḡixy. ¹⁴ T̄im jadu'n
 nipaady m̄id Dios Teedy jiiby tzajpjoty, ca' tzocy
 co ni t̄üg jāy y'alma t̄igoyipy.

Nej huaad t̄üg mm̄iḡüg nhūinmeec̄xim

¹⁵ Pen miich mm̄iḡüg xytuñ j̄ibic, m̄idm̄iydac
 ahuingujc e yajhūinj̄ihu' ma t̄i ytundigooy, pen

xy'ayuchuinjihuiyb ti anajty mminaymigügpiigyii je mmigüg. ¹⁶ Pen ca' xy'ayuc-huinjihuiy, chi huominipy tüg o metz mmigüg huidibi jébi nidiy'ajt'adipy miich m'ayuc. ¹⁷ E pen nañ ca' je' ajcxy ayuc-huinjihuihua'ñ, mïdnicxip ma mibijcpidijc yöymujctac e jim ajcxy myajnaxipy jadu'n nej tüg huidibi ca' Dios mibicy etz jadu'n nej tüg yajcogüejtpi huidibi ooy pocymïdity. ¹⁸ Janch tiy'ajt ñch miich ajcxy nimäy, tüg'ócity huidibi miich ajcxy mgapx'adujcipy ya naaxhuiñ, Dios nañ jadu'n capx'adugipy jüby tzajpjoty, e huidibi miich ajcxy ya naaxhuiñ ca' capx'aducy, Dios nañ ca' capx'adugipy jüby tzajpjoty. ¹⁹ E nañ jadu'n ñch miich ajcxy nimäy, pen ya naaxhuiñ miich ajcxy nimetz mnaygápxigixy co tijaty mmibijctzohuaangixy ma Dios, Dios, ñch nDeedy huidibi jüby tzajpjoty, xymöhuiipy huidibi ajcxy mbijctzooyb. ²⁰ Com ma miich ajcxy nimetz o nidugig naymüjigixy, jim ñch n'ity cujc'amy ma miich ajcxy.

²¹ Chi Pedro y'amidooy Jesús ymïnañ:

—Huindzin, ¿naag'oc huaad nhuinmeecxyich yi' ajcxy huidibi xymidundigooybich? ¿Nej nméecxibich ixti cooni huixtujc'oci?

²² Chi Jesús y'adzooy:

—Ca' yhuixtujc'ócity, hue' meecxipy mïdaax migo'px jamïda'px majmocx mïdaax'oc.

Je tumbiy'ijxpejt huidibi ca'pymigüg huinmeecxy

²³ Dios y'ane'min jüby tzajpjoty jadu'n nipaady nej tüg rey huidibi huijtz'oyñyb mïd je ytumbidijc jajadu'ñi ajcxy yjacminucxy'adyii. ²⁴ Je rey ytimyhuijtz'oyñychondacyñi anajty cuentas, co

oy yjädý tüg ytumbi huídibi anajty minuucxy'ajtíp canaag millón. ²⁵ Com je' ytumbi ca' anajty miiđity ti miiđ migüediib je' yhuindzin. Huin'it je huindzin ane'my co huen je' ytumbi yajtoocnax quipxyi miiđ y'ungdöxyijc etz tüg'óciy tijaty ymiiđ, jaydëb ñuucxy y'adujctähuipy. ²⁶ Huin'it ytumbi ycoxtinay'ihuüy ma yhuindzin yhuinduu etz nimay: “Huindzin, pa'ayoogich, etz ich miich nmigüejtähuipy.” ²⁷ Chi je tumbi yhuindzin yajtuñ pa'ayo'n, chi huinmeecxip je nuucxy, e yajpidzimy pujxtigoty. ²⁸ E mic'amy co je' ypidzimy pujxtigoty, chi yminaybati tüg ymigüg huídibi anajty miiđ quipxyi ti ytuñ. Je' anajty minuucx'ajtíp tim hueeni, chi je' yöcmimadziiy je' ymigüg huídibi miiđ ytuñ, chi nimay: “Cuet huídibi mnuucx'ajtpy ma ich.” ²⁹ Huin'it ymigüg ycojxtinay'ihuüy ma je' yhuinduu. Chi minuucx'taacy nimay: “Pa'ayoogich. Ich miich nmigüejtähuipy.” ³⁰ Chi je jadügpí ca' mecxtujcín yajtuñ. Chi oy ymigüg pidägy pujxtigoty, ixti cooni anajty micuedyii. ³¹ Co je jacjadyii ymidumbidijc oy ixy jadu'n nej ti yajtuñ je' ymigüg, chi ooy ajcxy jihuüy. Chi ajcxy nicx ma je yhuindzin etz yajnimayday tüg'óciy nejaty anajty ti ijxcixy. ³² Huin'it je' ajcxy yhuindzin oy yajhuoyii je huídibi minuucx'ajtíp canaag millón. Chi nimay: “Miich ooy mdzachjibicjäyity. Ti ich miich nhuinmeecxí tüg'óciy je mnuucxy, miiđ co miich pa'ayoohuin mbijctzooy ma ich. ³³ E miich nañ jadu'n ixyipy ti mba'ayoy je migüg huídibi miiđ mmiduñ, huídibi xyminuucxy'ajtp, jadu'n nej ich miich ti nba'ayooy.” ³⁴ Chi je huindzin

ooy chachjotma'ty, chi pidacy ane'min co huen yajtzaachytuñ je' ytumbi mabaad cuejttäy tüg'óciy huidibi ñuucxy'ajtpy. ³⁵ Chi Jesús ycapxycijxni, minañ:

—Tim jadu'n nej jada rey ti tuñ mïd je ytumbi, nañ tim jadu'n Dios tunipy mïd miich ajcxy, pen ca' nidüg nidügti miich ajcxy ca' mhuinmeecxy je mmigügtijc amumdügjot.

19

Jesús yaj'ixpicy mïd co jäy ytöxyijc ixmach

¹ E co Jesús capxtay jada ayuc, chi choñ Galilea, chi oy yjädy ma Judea it jim Jordán mij nï nïnaxy. ² Chi ooy mayjäy ypanicxi, e jim yajtzoocy huidijaty anajty yuu mïd pa'm mïd.

³ Huin'it nijëjity je fariseos ajcxy nimiiñ Jesús co yajmachcähuaangixy anajty. Chi ajcxy y'amidooy:

—¿Nej janch co Dios ti xymooyim cötujcin co jëbi tüg yëydijc ixmadzip ytöxyijc mïd tim hueeni ti capxy ti ayuc?

⁴ Chi Jesús y'adzooy:

—¿Nej ca'ni miich ajcxy m'ixy mgapxy ma ymiiñ jaybety ma Dios ñecy co je naaxhuiñybi chondacy, co Dios ogañ yajcojy tüg'óciy tijaty huidibi ji'ajtp co “Dios yajcojy tüg yëydijc etz tüg töxyjäy”?

⁵ Nañ jadu'n Dios yminañ: “Je yëydijc y'ixmadzip ytaj yteedy etz pudigihuipy je' ytöxyijc. E je yëydijc etz ytöxyijc tú'ciy idaangixy.” ⁶ Paady ca' ñimetzity ajcxy, com je yëydijc etz ytöxyijc tügmucy y'idaangixy. Com Dios ti huijtzmucy je yëydijc mïd je töxyjäy, paady ca' huaadity co jäy ajcxy huijtzhuäcxyp tïibi Dios huijtzmucy.

7 Huin'it je fariseos ajcxy y'amidooy Jesús:

—¿Na'amy co Moisés cõtujcin ti yejcy jecy'ajty co tüg yëydijc jëbi huaad ixmach ytöxyjic, e möhuipy ñinecy ñidiy'ajt e jadu'n jëbi ixmach?

8 Chi Jesús ymïnañ:

—Moisés jada cõtujcin ti xymooygixy co jëbi m'ixmajtzicxy mdöxyjic mïd co miich ajcxy mdzachcöjuuñity, ca' mgapxymïdohuaangixy Dios. Per co je naaxhuiñybi chondacy ca' anajty jadu'nity. 9 Janch tïy'ajt jadu'n nej ïch miich ajcxy nïmaaygixy co je yëydijc huïdibi yajjayhuäcxp mïd je ytöxyjäy, e je ytöxyjäy ca' anajty ti ytundigooyb mïd huïngbi yëydijc, hue' je' yëydijc ytundigooy co ixmach ytöxyjic etz ypijctigach mïd huïngbi. Nañ tim jadu'n pen tüg yëydijc ypicxy mïd tüg töxyjäy huïdibi ñäy ti y'ixmachyïi, hue' tundigooyb anajty je yëydijc.

10 Co Jesús ydiscípulos ajcxy mïdooy jada ayuc, chi ajcxy ymïnañ:

—Pen jadu'n jëdu'n je tïy'ajt co je yëydijc ca' huaad ixmadzip ytoxyjäy, jac'oy co ca' nbijcïm.

11 Chi Jesús ymïnañ:

—Ca' tüg'óciy je jäy huinjihuïy jadyaabi tïy'ajt. Jëyi ajcxy huinjihuïhuip pin ajcxy Dios pïdaaci co huinjihuïhuip. 12 Ji canaagnax je ayuc je huinma'ñ nej ca' yjëbity ypiçipy je yëydijc. Naagity pi'ctijc yma'xung'aty e ca' yca'pxity ñinïcxy, paady ca' picxy ajcxy. E nijëjity je yëydijc ca' huaad ypicxy, mïd jëgixpi co anajty je' ti ymïjaapigyyi. E nijëjity yëydijc huï'my jaybicy mïd jëgixp co ajcxy ytuñ ma Dios ytung, je Dios huïdibi ane'myb tzajpjoty. Pinjaty cöbigamy ïch n'ayuc huen cöbicy.

Jesús conucxy maybi'ctijc

¹³ Chi naagity je jäy mïdnicxy y'ung y'anäg ma Jesús jaydëb yajc'ñixajipy etz Dios mibijctzoy mïd yí' ajcxy ycixpi. Chi Jesús ydiscípulos ajcxy ogy je jäy ajcxy huídibi anajty mïd miimb je y'ung y'anäg, nimaaygixy co ca' jadu'n y'oyity. ¹⁴ Per Jesús ymïnañ:

—Huen mïd miiñ ajcxy pi'c'anäg ma ñich, ca' mjijpcogapxiygixy. Com pinjaty ymibijcp ñich ngapxy n'ayuc, jadu'n nej jadyaabi pi'c'anäg ajcxy ymibicy, je' ajcxy tigiñhuam ma Dios y'ane'my jii by tzajpjoty.

¹⁵ Chi Jesús c'ñixajy je pi'c'anäg ajcxy. Chi ñicxni.

Tüg yeeg'anägnip comeñybi mïdmïydägy Jesús

¹⁶ Chi tüg yëdyjc oy icy Jesús. Chi y'amidooy:

—Huindzin, ¿ti jada' co oy ñich ndunipyich jaydëb nbaadibich jugy'ajtin huídibi ca' ycixipy ytigoyipy?

¹⁷ Chi Jesús y'adzooy:

—¿Na'amy co xyñimäyich co oy huindzin ñich? Dios tügpajc oyip, ca' jac pin. Pen miich mdzocpy co mbada'ñ jugy'ajtin huídibi ca' ycixipy ytigoyipy nimina mguydunipy je Dios ycötujcïn huídibi Moisés ycojaay jecy'ajty.

¹⁸ Chi je yeeg'anäg yajtiñhuimbijty:

—¿Huídibi cötujcïn miich mdijp?

Chi Jesús ymïnañ:

—Ca' migüg myaj'ögipy. Ca' migüg ytöxyijc migapxtigooyipy. Ca' mmeedzip. Ca' mmigüg mhuin'ñinip. ¹⁹ Yajmij'at mdaj mdeedy. Mdzogipy mjihuñhuip miich mmigügtijc, tim jadu'n nej miich ci'm mnaychogyi.

20 Chi je yeeg'anäg Jesús nimaayi:

—Ti nguydundäyich jadyaabi cötujcin ajcxy maabi ich nbi'c'atyich. ¿Ti jada njacyajtigoy'ijtpyich?

21 Chi Jesús jadüg'oc y'adzooy:

—Pen miich m'idam tudägy, nicx tooctigoyda' hu'idijaty miich m'id, etz mo' je meeñ je jäy ajcxy hu'idijaty ayoob. Co jadu'n mdunipy, chi mbaadipy oy'ajtín jii by tzajpjoty. Co jadu'n mdooctähuipy tijaty miich m'id, chi miinip jadüg'oc ma ich nyaj-paadyich, e pajamgich.

22 Co je yeeg'anäg jadu'n midooy, chi ñicxni taj may com ooy anajty chachcomeeñity.

23 Huin'it Jesús nimay je' ydiscipulos ajcxy:

—Janch tiy'ajt jadu'n nej nimaaygixy co ooy ymijhuinma'ñity co tüg comeeñjyäy ytigihuipy ma Dios y'ane'my jii by tzajpjoty. 24 Jadüg'oc nmına'ñich co ooy chipity co tüg comeeñjyäy tigihuipy ma Dios y'ane'my, nigí ca' chipity co tüg camello ñaxipy ma tüg xu'ñ'ijx yxutity.

25 Co Jesús ydiscipulos ajcxy jadu'n midoy, chi ajcxy ooy jihuiy huinmay. Chi ajcxy ñay'amidoohui miñ xyipy:

—¿Pín jëbi paady je' y'alma nïdzoocin?

26 Chi Jesús ajcxy huindicxpejty etz nimay:

—Je huidibi jäy ajcxy chipjihuiyb, m'id Dios ca' ni ti chipity.

27 Huin'it Pedro ymına'ñ:

—Huindzin, ich ajcxy ti n'ixmajtztäyich tüg'óciy hu'idijaty anajty ich ajcxy nm'id etz nbanicx ich ajcxy miich. ¿E ti jada' ich ajcxy nbaadaamybich?

28 Chi Jesús y'adzooy:

—Janch tıy'ajt nmina'nñich co anajty je xii je tiempo paady mina Dios yajtigajztähuiipy je tzajp etz naaxhuiñybi, co anajty ñich, je jäy huiidibi tzoon tzajpjoty, n'ityich ma ngötujctacich oybi jiiiby tza-jpjoty, chi miich ajcxy huiidi ti xypahuidityich, miich ajcxy mbadamy majmetz cötujctac, e miich ajcxy mdıydunıpy je majmetz pıccypı Israeljäy ajcxy. ²⁹ E tüg'óciy jäy ajcxy huiidibi ti ixmajztäy yjiin ytıjc, y'uch ymıgüg, y'ung ytöxyıjc, y'ung y'anäg, ytaj yteedy, o ycam ytu' mıid ñich ycıxpi, yı' ajcxy ypadamyb mıgo'px'oc, ca'ydi huiidibi ti ixmach. E ypadamy je jugy'ajtin huiidibi ca' ycıxıpy ytıgoyıpy ni mina. ³⁰ Mayjäy ajcxy huiidibi cham ymıid mij'ajtin cötujcin, tzajpjoty ca' ajcxy mıid'ada'ñ mij'ajtin cötujcin. E mayjäy huiidibi cham ca' mıidity ajcxy mij'ajtin cötujcin, tzajpjoty ymıid'adamy ajcxy mij'ajtin cötujcin.

20

Je naymıdunıptıjc y'ıjxpejt

¹ Jadu'n Jesús yminañ:

—Je Dios y'ane'mın jiiiby tzajpjoty jadu'n nipaady nej tüg cogambi huiidibi ooy mij cam mıidity. Chi je cogam jopyñi choñ ma oy nıcxıy ıxtäy tumbııjc ajcxy huiidibi yajpidıgıpy yı uva cosecha. ² Chi ycapxytuñ mıid nidüg nidüg ytumbı co mujuya'ñ tüg denario meeñ tüg xıibi. Chi quejxy nidüg nidüg ytumbı ma je uva cam. ³ Chi petyxii je cogam ñıcxıy jadüg'oc tumbı ixtaayb. Chi paty cajp cujc nijejıty tumbı huiidibi ca' ti tung mıidity. ⁴ Chi je cogam je tumbı ajcxy nımay: “Nıcxı miich ajcxy tuñ ma ñich ngosecha. Cham nmujuyıpy jadu'n

nej ytiy'ajitity.” Chi ñicxy ajcxy midumbi. ⁵ Chi je cogam ñicxy jadüg'oc cujcxii tumbi ijxtaayb. Nañ jadu'n nicxy jadüg'oc minacyxii. ⁶ Nañ tim jadu'n tzuu jadüg'oc je cogam ñicxy tumbi ijxtaayb, chi paty nijëjity cajpcujc huidibi ca' ti tung midity ajcxy, chi ajcxy nimay: “¿Na'amy co miich ajcxy myaajity? ¿Nej co ca' mnicxy mdungixy?” ⁷ Chi je' ajcxy y'adzooy: “Je' co ca' ich ajcxy pin ti xycapxytuñ.” Chi je cogam ajcxy nimay: “Nicx miich ajcxy tun ma ich nnaaxjot. Cham iya nmujuyipy jadu'n nej ypaadyii.” ⁸ Co oy ycodziyñi, chi je huindzin nimay je huidibi nigop'ajtp je tung: “Nicx mijhuoodäy je tumbidijc etz mujuyipy. Mujuy jayjip huidibi ti ymiiñ axam tumbi etz jim nicxy myajcogixiy ma huidibi anajty ti miiñ jayjip tumbi.” ⁹ Chi ajcxy jayjip yajmujuy je tumbi ajcxy huidibi anajty ti ytiy tumbi axam. Chi yajmujuy ajcxy jadu'n nej anajty jäy ñaymujuyii je tüg xibi. ¹⁰ Co miiñ je tumbi ajcxy je huidibi ajcxy jayjip tiy tumb. Chi ajcxy jot'ajti co jac'anaxy yajmujuya'ñ. Per quipxyjaty ajcxy paty tüg meen nidüg'ociy je tumbidijc. ¹¹ E co ajcxy quipxyjaty yajmujuy, chi ajcxy ytiy jotma'tpi. ¹² Chi ajcxy nimay je cam huindzin: “¿Na'amy co quipxyjaty ich ajcxy ti xymujuyich miid je huidibi ti miiñ axam tumbi? Yi' ajcxy tüg jaxigy ti ytuñ, e ich ajcxy tüg xii je anbi ti ngöbicyich.” ¹³ Chi je cam huindzin y'adzooy, nimay nidügti je' ajcxy: “Miich, ich nmigüg, ca' ich jibic ti nduñich miid miich. ¿Nej ca' ich ajt ngapxytuunim co jadu'n nmujuya'ñ tüg denario meeni?” ¹⁴ Con yi mmeen, e nicxni. Jadu'n ndzocyich co quipxyjaty nmujuya'ñich miich miid

huidibi ti ymiñ axam ma je tung. ¹⁵ ¿Nej ca' huaad ñich nduñich miid ñich nmeenñ nej ndzócyichi? ¿O co xyajca'oy'ixyich, co ñich ooy n'oyjäyity?" ¹⁶ E huidibi ajcxy jaccogixiyyb, yi' ajcxy jayijp'adam. E huidibi ajcxy jayijp'ajtp cham, yi' ajcxy yjac-cogixihuamb. May ooy yjayajhuoomiñ e hueeni huidi huin'íjxipy.

Jesús capxypidzimy jadüg'oc co y'öga'ñ

¹⁷ E co Jesús anajty ñicxy ma Jerusalén tü'aa, chi miid nicxy ahuingujc je nimajmetzpi ydiscipulos. Chi ajcxy nimay:

¹⁸ —Jadu'n nej miich ajcxy m'ijxy mnejhuüy cham ñich ajt nba'ttigüym jim Jerusalén. Jim Jerusalén ñich, je jäy huidibi tsoon tzajpjoty, xyajcüyegaamich je teedy mijtungmiidpi etz es-cribas ajcxy. Nyajtiyduna'ñich etz pidäga'ñ ajcxy ané'min co n'ögibich. ¹⁹ E yi' ajcxy xycüyega'ñich ma je huidibi ca' yjudiojäyity, jigix xyñixigibich xyajxigibich, xycoxipich, etz xyajcruutzpedipich ajcxy. E co n'ögibich, chi njugypigipyich codugüig xii.

Huidibi Jacobo etz Juan ytaj ypijctzou

²⁰ Chi je Zebedeo ytöxyijc nimiñ Jesús miid metz je ymang; Jacobo etz Juan. Huin'it je ungdaj huingoxtinay'ihuüy Jesús, pijctzoy may'ajt. ²¹ Chi yajtiy Jesús:

—¿Ti mdzojcpy?

Chi je ungdaj y'adzooy:

—Tun may'ajt möhuipy ñich metzpi yi nmang yi jacmijtung ma miich m'ane'min, jaydéb iñahuipy ma miich mmijc, tüg a'oy'amy etz jadüg ana-jty'amy.

22 Chi Jesús y'adzooy:

—Miich ajcxy ca' mhuinjihuüy ti ajcxy mbijctzooyb. ¿Nej mminaxa'ñ myajnaxa'ñ miich ajcxy je tzaachypi huídibi ñch nminaxamy nyajnaxamyich? Jadu'n nej jihuüy m'üga'ñ ajcxy je ta'm nñ huídibi ñch n'ügamy e mbaada'ñ je nñbejtin huídibi ñch nbadamyb.

Chi je' ajcxy y'adzooy:

—Jëbi.

23 Chi Jesús ymina'ñ:

—Janch tìy'ajt nej miich ajcxy mina'ñ co mmináxcixipy myajnáxcixipy je tzaachypi huídibi nnaxa'ñich. Per ca' ñch cõtujcin nmídidyich co ñch miich ajcxy nbidägipy migtungmíid, co myajpaadip tüg ma ñch nmíjc a'oy'amy e jadüg anajty'amy. Hue' janchtìy Dios Teedy ymíid ni'ixi' pinjaty ti huin'ixy jaydëb yajnicxip je migtung ma ñch n'ane'mdac.

24 Co je nimajcpi ydiscípulos ajcxy nejhuüy jadu'n nej Jacobo etz Juan pijctzooy may'ajt ma Jesús, chi ajcxy ooy mijotma'ty Jacobo etz Juan.

25 Huin'it Jesús mijcapxy je' ydiscípulos ajcxy, chi nimay jadu'n:

—Miich ajcxy mnejhuüy co yi jäy ajcxy huídibi migtungmíidpi ma je maybi naax cajp, mic ajcxy ane'my je naax cajp. Nañ jadu'n yi' ajcxy huídibi mic'ajt míid ma je maybi naax cajp, mic ajcxy ane'my je jäy ajcxy. 26 Per miich ajcxy ca' mjadu'nity nej je migtungmíidpi ma je maybi naax cajp. Pinjaty miich ajcxy je mij tung yajnicxip, copicy ñaybidägüyb nej tüg tumbi. 27 Pen ji miich ajcxy nidüg nigohuajc'ada'ñ, copicy ñaybidägüyb nej tüg tumbi. 28 Com ñch nañ jadu'n, je jäy huídibi

tzoon tzajpjoty, ti nmiiñich ya naaxhuiñ jaydëbi nbubedipyich yi mayjäy ajcxy. E canan yi' ajcxy xypubedipich. Ngïyegaamyich njugy'ajtïn ma yi o'cin miid je mayjäy ycixpi, jaydëbi ngohua'nich jäy ajcxy y'alma huidibi tigoyam.

Jesús yajtzoocy metz jay huintzpi

²⁹ E co Jesús etz ydiscípulos ajcxy ycajppidzimy jim Jericó, chi ypanicxi ajcxy mayjäy. ³⁰ E jim anajty iñaay nimetz huintzpi tüba'áy. E co ajcxy nejhuñy co jim anajty ñaxy Jesús, chi ajcxy yaaxpi jojcpï:

—Huindzin, David y'ap y'oc, tun may'ajt ñich pa'ayoog.

³¹ Chi je mayjäy ajcxy ojcooty je metzpi jäy huintzpi, nimay ajcxy co huen amoñ. Per je huintzpi ñigi minan'idich:

—Huindzin, David y'ap y'oc, tun may'ajt ñich pa'ayoog.

³² Huin'it Jesús ytinayxijp, e yminañ:

—Ocmin miich ajcxy ya.

Huin'it yajtiy:

—¿Ti mdzojcpy ndunipyich miid miich?

³³ Chi ajcxy ñimaayi:

—Huindzin, ndzojcpyich co xya-jhuindicxigibich.

³⁴ Huin'it Jesús pa'ayoogoty ajcxy. Chi ajcxy nïdoni ma je' yhuiñ, e mic'amy je huintzpi ajcxy y'ijxigy. Chi Jesús ajcxy panicxy.

21

Jesús ytiñy jim Jerusalén

¹ E co anajty Jesús etz je mayjäy ajcxy ti mihuingoni Jerusalén, chi yja'ty ma Betfagé cajn mihuingon je Olivos cögop. E jim Jesús quejxy nimetz ydiscípulos ajcxy. ² Chi ajcxy nimay:

—Níxcix ma je cajn huídibi jim'amy. E jim tüg burro ycoxochity miid y'ung. Coguejtüdi ajcxy je burro e yajmiingix ya ma ich. ³ E pen jim pin nej xyñimäy, nima' co je Huindzin yajtunam, e yajhuimbida'ñ mic'amy.

⁴ Jadayaabi oy jadu'n ytuñyii yjadyii ycixy yca'pxy jadu'n nej je profeta jecyip jaay, co jadu'n yminañ:

⁵ Yajnimá' je jäy ajcxy huídibi tzinaayb jim Sión (Jerusalén), oc'ijxcix, chi miñ ajcxy je mrey, yung nax yjot yhuinma'ñ miidity je mrey, etz burrocixy miñ. Ma tüg burro mang huídibi ytaj tziy yajyöyp.

⁶ Chi je metz ydiscípulos ajcxy cuyduñ nej anajty Jesús ti y'ane'myii. ⁷ Yajja'ty ajcxy je burro miid ymang. Chi Jesús ydiscípulos ajcxy jibe'ñ je metzpi burro miid ajcxy yjocxhuit, chi Jesús yaj'ñay je burro mang. ⁸ E je mayjäy ooy yajhuinyëby ajcxy je tü'aa miid yhuit, chi ajcxy oy ypuxy quipy y'aacx. Chi ajcxy pidacy ma je tü'aa. ⁹ E jim ñajxy je burro, e je mayjäy huídibi nícxp jayijp, e nañ jadu'n huídibi anajty mimb axam, ooy ajcxy ytigiyy huambi jihuüyb, chach minaangixy:

—¡Hosana! ¡Gloria a Dios! ¡Ooy ycömayty Dios! Huen capxpaady idipy jada yëdyjc huídibi mimb ma yi nHuindzin Dios yxi etz miid ymic'ajt. ¡Gloria a Dios!

10 Co Jesús ytiḡiḡy jīm Jerusalén, chi tūḡ'óciy je mayjäy huinmay'ahuidiḡty, chi ñay'amidóohuigiḡxy miñ xyipy:

—¿Pīn yī' yijiibi jāy?

11 Chi mayjäy y'adzooy:

—Yī' je' je profeta Jesús huidibi tzoon ma Nazaret cajp ma Galilea it.

12 Huin'it Jesús ytiḡiḡy ma Dios ytiḡc. Chi ixquejxtay tūḡ'óciy je ajuybi adoocpi huidibi anajty yajpatp jiiby. Chi tijhuimbijttay tūḡ'óciy je mesa ma anajty jāy jīm ymeeñhuingogongixy, etz nañ jadu'n tijhuimbijttay je muuxytoocpi iñaybejt. 13 Chi jadu'n nīmay ajcxy:

—Jaaybety jadu'n ymiiñ ma Dios ñecy: “Hich ndiḡc je' yī' ma jāy ajcxy Dios miḡijctzoy”, per miich ajcxy hue' yī' mhuañ meetzpi tiḡc.

14 E co anajty jiiby tzajptiḡoty Jesús, chi jiiby ñimiini huidiḡaty anajty huintz, huidiḡaty anajty cīma'ty tecy'ma'ty, chi Jesús yajtzoocay. 15 Per je teedy ajcxy huidibi miḡtungmiid etz je escribas ajcxy ooy miḡotma'ty Jesús co ajcxy ijxy nejhuḡiḡy jadu'n nej Jesús anajty tuñ miḡhuinma'ñ. Etz nañ jadu'n ajcxy ijxy co je pi'c'anäg anajty ajcxy yhuaangixy yjihuiḡyḡixy jiiby tzajptiḡoty, yminaangixy: “¡Huen cōmay'idipy je rey David y'ap y'oc!” 16 Chi je teedy etz escribas ajcxy Jesús nīmay:

—¿Nej ca' miich mmidooy nej je pi'c'anäg chach minaangixy?

Chi Jesús y'adzooy:

—Nmidooybich. ¿Nej ca' miich ajcxy mgapxyñi Dios ñecy ma ymiiñ jaaybety co jadu'n ymiñañy?:

Ti myaj'ixpicy ñy ma je pi'ctijc ma'xungdijc jaydëbi
ajcxy ñbaadip capxpaadip Dios.

17 Chi Jesús ycapxycijxy müid je teedy etz es-
cribas ajcxy etz chooñ jiihy tzajtigoty. Chi ñicxy
ma Betania cajp, e jim yajnaxy je tzumbi.

Jesús capxpojcy je higueri ca'p anajty ytëm'aty

18 E co yxëmüy ytïcxiy, chi Jesús yhuimbijty
Jerusalén. E ma anajty tim ytüyöy, jim yuuböcooti.

19 E jim ijxy ma tüba' tüg cop je higueri quipy. Chi
ninicxy. Chi pä't'ijxy, per ca' anajty ni tüg ytëm,
jëda'ajty je' y'aay. Chi Jesús nimay je higueri quipy:

—¡Ni ca minaa xii mdëm'adipy!

E mic micüy je higueri quipy ytïch. 20 E co je'
ydiscipulos ajcxy jadu'n ijxy, chi ajcxy ooy huin-
may. Chi ajcxy y'amidooy Jesús:

—¿Na'amy co yi higueri quipy mic'amy ti ytïch?

21 Chi Jesús y'adzooy:

—Janch tiy'ajt jadu'n nej nnimaaygixy. Pen mi-
ich ajcxy müid je mibijcïn, etz ca' ajcxy mmibicy
aametz jotmetz, jëbi mijhuinma'n mdungixy nej
ïch ti nduñich. E nañ jadu'n jëbi jac mijpi
mijhuinma'ñ mdunipy ajcxy. Jëbi ajcxy tun
cop mnimäy: “Quëg ya, tigi' mejyoty” e xy-
capxymidohuipy ajcxy je tun je cop. 22 E tüg'óciy
tijaty miich ajcxy mbijctzooyb huen ytïmytijyity,
pen mmibijcp ajcxy, mbaadip ajcxy.

Jesús ycötüjcïn

23 Co Jesús yja'ty Jerusalén, chi ytigüy jadüg'oc
ma Dios ytijc. E jiihy anajty yaj'ixpicy je mayjäy,
chi ñimiini je teedy mijtungmüidpi etz judío
mijjäydijc ajcxy. Chi ajcxy y'amidoohui:

—¿Ma cõtujcïn ti mbaady co jadu'n mduñ tzajtigoty? ¿Pïn jada cõtujcïn ti xymöy?

²⁴ Chi Jesús y'adzooy:

—Nañ jadu'n ñich miich ajcxy nyaj'amidoohuamy tüg ayuc. Pen m'adzooyb ajcxy jada ayuc, huin'it ñich miich ajcxy nyajnimáhuipy ti cõtujcïn ñich miid nduñ huídijaty.

²⁵ ¿Pïn quejxy je Juan, je Bautista, yajñibejtpi, Dios o jäy ajcxy?

Chi ajcxy ñayñimáayigixy miñ xyipy:

—Co ixypy ajt n'adzoohuim co Dios Juan quejx, huin'it xy'adzoohuim: “¿Na'amy co miich ajcxy ca' mmibijcy Juan?” ²⁶ Per nañ jadu'n ca' huaad nmīnaanīm co jäy ajcxy yajñibijcy Juan, com ne-jhuuyim co yi mayjäy mibijccixy co je' anajty Dios tüg y'ayucnajtzcaxiybi.

²⁷ E paady ajcxy jadu'n adzooy Jesús:

—Ca' ñich ajcxy nejhuuyigixy.

Huin'it Jesús ymīnañ:

—Nañ jadu'n ñich ca' nigapxa'ñich pïn je' ycõtujcïn miid nduñich huídijaty.

Je metzpi ung ixpejt

²⁸ Chi Jesús ymīnañ:

—¿Nej m'oc'ixy m'ocjaygugi' jadyaabi ixpejt? Tüg je yëydjcy ymīd anajty metz je' ymang. Chi nīmay je mījpi: “Ñicx cham m'octuñ ma ñich n'uva cam.” ²⁹ Huin'it je' ymang y'adzoohui: “¡Ca' nnicxa'ñich!” Chi jacohueeñyi je' ymang yhuin-maydigajch, chi ñicxy tumbi. ³⁰ Chi je ungedeedy oy ixy je ymang mutzpi. Chi nañ jadu'n nīmaay co huen nicxy tuñ. Chi je' ymang mutzpi y'adzooy:

“Oy, cham nícxibich.” Per ca' ñicxy. ³¹ ¿Huidi je' nidügti ycuycduuñ nej anajty yteedy tzoczy?

Chi ajcxy ymíañ:

—Je' ymang mijpi huídibi jayijp nimay.

Huin'it Jesús nimay ajcxy:

—Janch tıy'ajt jadu'n nej nimaaygıxy co je huídibi ajcxy yajcogüejtpi etz je töxyjäy ajcxy huídibi tundıgooyb müd yëydıjc, je' ajcxy tigihuamb jayijp ma Dios y'ane'my jııby tzajpjoty, ca'ydi müch ajcxy. ³² Paady ycıxpi oy ymiiñ je Juan huídibi jäy ajcxy yajniıbejt, Juan yajni'ixııygıxy je mayjäy nej ajcxy jëbi yjothuımbıpy ma Dios. E müch ajcxy ca' mıbjcy jadu'n nej Juan ymíañ. Per je' ajcxy huídibi yajcogüejtp etz je töxyjäydıjc huídibi tundıgooyb müd yëydıjctıjc, ymıbjc je' ajcxy Juan. Oy müch ajcxy mja'ıjxy, per ca' mjothuımbıdaangıxy etz ca' mıbıgaangıxy.

Je naymıduunıptıjc jıbıcjäybi ajcxy y'ıjxpejt

³³ Chi Jesús ymíañ:

—Oc'amıdoo'ıjtcıx jadayaabi ıjxpejt. Ji anajty tüg je huídibi niıuındzın'ajtp mıjpi je tundac. Chi je cogam uvas cojy ma je ytundac etz jügajy. Chi yaj'oyııy ma anajty jëbi je uvas ñıı yajniğıdägaanı. Nañ jadu'n cojy tüg tzaaboch cıxpi, jıgıx jëbi cuend'aty ycam. Co yaj'oyıyday, chi je cogam yejcy pıjctzoy je ycam ma je jäy ajcxy huídibi naymıdunaanıp. Chi oy choonı je cogam nıcxıy viaje tumbı. ³⁴ Je huin'it tiempo co yhuaad'ajtnı je cosecha, chi je cogam quejxy nijejıty ytumbı jım ma huídibi anajty tı yajpıjctzoy je ñıax co huen möyıı je huídibi yı' paadaanıp. ³⁵ Per je jäy huídibi anajty tı naax pıjctzoy, chi ajcxy majch je tumbı.

Chi ajcxy ooy huinhuojpy jijphuojpy tüg. Chi ajcxy huingäch jijpcäch jadüg. Chi ajcxy je midugügpi yaj'o'cy. ³⁶ Chi je conaax cogam huingbi ytumbidijc quejxy. E nañ jadu'n ajcxy oy tungixy jadu'n nej anajty ti tungixy je jayijp'atypi. ³⁷ Chi yci'm'ung oy quejx cogixiyñi. Hue' jot'ajti co yajmij'adiiyb je' y'ung. ³⁸ Per co ajcxy je tumbidijc ijxpaty je cogam je' y'ung, chi ajcxy ñaygapxi: “Tzoc ajt yaj'o'cim je cogam ymang, com yi' je' mihui'mamb je' yteedy je yjugy'ajtín je ypidägy. E co ajt nyaj'o'cim, chi ñch ajt nmihui'mim je cam.” ³⁹ Chi ajcxy majch je cogam ymang. Chi ajcxy huijtzpidzimy ma je tundac. Chi oy yaj'öccixy.

⁴⁰ Huin'it Jesús ymíñañ:

—Co anajty ti miñ je conaax je cogam, ¿ti jada' y'octunipy miid je tumbidijc ajcxy?

⁴¹ Chi je teedytjic etz mijjäydijc y'adzooy:

—Je cogam yaj'ögipy yijiibi jibicjäydijc, ca' ajcxy pa'ayoohuipy, etz yegipy je uvas cam pijctzoy ma je huingbi jäy huídibi yegipy je pidägy huídibi cogam paatip.

⁴² Chi Jesús ymíñañ:

—¿Nej ca'ni miich ajcxy mgapxy ma miñ jaay-bety ma Dios ñecyi? Jadu'n ymíñañ:

Je yëydijc huídibi je jäy ajcxy ca' anajty tzocy, Dios ti pidägy mij'ane'mbi. Tim jadu'n nipaady nej tüg tzaa oybi huídibi je pojtzpidijc ca' ajcxy yajtuna'ñ, e je' je' oy ti yhui'mni ma anajty yjaccopicyity. Je Huindzín Dios jada tung ti tuñ, e ooy oy n'ijxim yi' ytung.

⁴³ E paady jadu'n ñch miich ajcxy nimäy co miich ajcxy myajpiga'ñ yi m'it mlugar jiiby tza-jpjoty ma Dios y'ane'my etz yajmöhua'ñ je huingbi jäy je huídibi amuumdügjot naygiyejcip ma Dios. ⁴⁴ Píñjaty ca' cöbiga'ñ jada mij'ane'mbi, ayo'n ypadaamb, ytimnipatp nej jihuïy jim ycijcíday ma je tzaa nïc, tijhuídiz yjajtáhuipy. O pen je mij'ane'mbi midziptzoñ je jäy, chi ytigoydáhuipy ajcxy, tim jadu'n nej jihuïy je tzaa ñigidaagoodyii ajcxy, e janch jaam püx nïcxy yjaty.

⁴⁵ Co ajcxy midooy, chi je teedytjic etz je fariseostjic huinjihuïy co yi' ajcxy yajnigapxyp, ⁴⁶ chi Jesús ajcxy jamadzaañ. Per tzigüyb anajty ajcxy mïd je mayjäy, je' co je mayjäy anajty mibijccixy co Jesús najtzcaxüyb Dios ytiy'ajt.

22

Je iixpejt ma jäy anajty pijcpídjic nixïduuñ

¹ Chi Jesús jadüg'oc ytigüy capxp mïd iixpejt, ymïnañ jadu'n:

² —Je Dios y'ane'min jadu'n nipaady nej je rey ymang ocnixïduñ co ti ypic. ³ Chi je rey quejxhuäcxtay je ytumbi co huen nïcxy huoomujctaaygixy je huídijaty anajty ti yaj'nïmaaygixy co míingixipy ma ytuna'ñyii yjada'ñyii je pijcín. Per ca' je' ajcxy ymïnañ ma je pijcín nixïduñ. ⁴ Chi quejxnip huingbi ytumbi, nimay ajcxy: “Nïmaaygix je tibi oy jayjip'aty mnïmaaygix jadu'n co huen mmiingixy ma yam je caayin uucín ni'ixi' y'ity. Ti je huaj nïcxi nyaj'ögyich. E ni'ixi' ijttayñi, huen miññ ajcxy ma je pijcín ytuna'ñyii yjada'ñyii.” ⁵ E je' ajcxy

tüibi anajty yaj'nimaaygixy, ca' ajcxy je' ytimy tuñ cuendi. Nijëjity ajcxy ñicxy ma ytundac. Nijëjity ajcxy ñicxy toocp yejcp; ⁶ e nijëjity ajcxy majch je rey yquejxyöybi ajcxy, chi ajcxy oy chaachytuñ, chi yaj'o'cy. ⁷ Chi je rey ooy chachjotma'ty. Chi je soldados ajcxy quejxy co huen ñicxy yaj'öctäyii je jäyyaj'öcp ajcxy etz ytoydhuiip je ycajp. ⁸ Chi je rey nimay je ytumbi ajcxy: “Ni'ixi' ijttäy ma jadaayaabi je pijcin yajnixiduna'ñ. Per je huidibi ajcxy ti yajnimäy ca' ajcxy mihuaadity co ymingixipy. ⁹ Nicx miich ajcxy majaty jäy yjin ytijc. Nimaaygixy tüg'óciy pinjaty ajcxy mbaty, co huen miingixy ma je pijcpi.” ¹⁰ Chi ñicxy je rey ytumbi ajcxy. Chi ajcxy midmiinday je mayjäy, je oyjäybi etz je jibicjäybi. Chi y'ujztay je rey ytijc mid je mayjäy. ¹¹ Huin'it je rey ytigiy mayjäyjoty, ixa'ñ anajty huidijaty ti yajhuomiñ. E jii by tüg yëydijc ti ijxpaty huidibi ca' anajty ti ñayxoxyii, jadu'n nej jäy nayxójxigixy co ajcxy ñicxy ma tüg pijcin. ¹² Huin'it je rey minañ: “Migüg, ¿nej ya ti mdigiy tigoty, e ca' mxojx midity nej ypaadyii?” E je yëydijc amoñyi je' yhui'my. ¹³ Chi je rey nimay huidibi anajty jim pubejtp: “Cixotz tecyotz jada yëydijc etz pidäg agootztuuby. E jii by yjihuipy yäxipy, jii by ytitz huinqueedip mid jotmay.” ¹⁴ Com may je jäy ajcxy huidibi ti yajhuooy, e hueeni ajcxy huidibi ti yajhuin'ixy.

Je cogüejetin ñimiydägy

¹⁵ Je huin'it tiempo je fariseos ajcxy tuuñ quipxycapxy co anajty xihuaangixy nihuambedaangixy Jesús. ¹⁶ E jadu'n ajcxy quejxy ma Jesús yajpaady naagity huidibi minicxpejt

je fariseos ajcxy ytiy'ajt etz naagity huídibi mijniçxpejt je Herodes ytiy'ajt. Chi ajcxy Jesús nimay:

—Huindzin, nejhuiybich ich ajcxy co miich mgapxy je tiy'ajt. Tudägy myaj'ixpiçy jäy ajcxy jadu'n nej huaad ajcxy cuyçinaaygiçy Dios ytiy'ajt. E ca' mgüendituñ nej jäy ajcxy yminaangixy. Tú'ciy miich mduñ mïd comeñjyätz etz mïd ayoobtjç, ca' hui'n'ixpety myaj'ixpiçy.
 17 Nejhuihuamy ich ajcxy nej miich mina'n pen tiy'ajt jadu'n: ¿Nej ndundiçooym ma Dios ycötujçin, co ngüejtim ma César, je romano mij'ane'mbi?

18 Per Jesús ñejhuiyb anajty ajcxy yjibichuinma'n, e chi ajcxy nimay:

—Ooy miich ajcxy naybidáaciçy nej jihuïy ooy mdudägyity, e ca' yjanchity. ¿Na'amy co ajcxy xychachjot'ixy xychachhuinma'n'ixyich?

19 Yaj'ijxcich tüg meen huídi mïd migüéjtigixy César.

Chi ajcxy mimiñ tüg meen. 20 Chi co Jesús y'ijxy je meen, chi yajtïy:

—¿Pin y'ahuinax e pin yxi çixjaay ma jada meen?

21 Chi ajcxy y'adzooy:

—Je romano mij'ane'mbi y'ahuinax etz yi' yxi.

Huin'it Jesús je' ajcxy nimay:

—Mo' je César huídibi yi' yjë'ajtpy, etz mo' Dios huídibi Dios yjë'ajtpy.

22 E co ajcxy jadu'n midooy, chi ajcxy ooy jihuïy huinmay. Chi ajcxy ixmajch Jesús, e ñicxni ajcxy.

Yaj'amidooy ajcxy je jugypjçin co pin ti y'ögy

²³ Je huin'it xii je saduceos ajcxy oy ixu Jesús. Yi' ajcxy ymína'n co ca' yjugypíga'n je öcpi ajcxy. E jadu'n ajcxy huinma'n pídágy, e ymínaangixy:

²⁴ —Huindzin, jadu'n miiñ ma Moisés ycötújcín co je yéydijc huídibi ypijcyhínaayb miið ytöxyijc, e pen öcp je yéydijc, e ca' ni tüg y'ung yajhui'my, copicy co co'öcytöxyjäy ypijctigadzipy miið je yéydijc ymíguëx. ²⁵ Pues jii ma iich ajcxy anajty tüg quëx je yéydijc nihiixtujc. Je ungoob ypijcy, e chi ix'ögy ytöxyijc, e ca' ni tüg y'ung yajhui'my. Chi je míguëx ypijctigajch miið je töxyjäy. ²⁶ Nañ jadu'n je mímetspi yéydijc ix'o'cy ytöxyijc. Nañ jadu'n je midugíggpi yéydijc ix'o'cy ytöxyijc. E jadu'n oytuñyii yjadyii miið je töxyjäy co ti anajty miiðdzínay'abídzímdäy je nihiixtujcpi yéydijc tüg quëxpi. E je nihiixtujcpi ajcxy ix'o'cy je töxyjäy, e ca' ni tüg y'ung ajcxy yajhui'my. ²⁷ Chi nañ jadu'n oy y'öcni je töxyjäy. ²⁸ E co anajty xii tiempo paty, co anajty Dios yajjugypicy yi tiibi ajcxy y'ögy, ¿huídibi jada' ajcxy nidügti je yéydijc töxyijc'adaanip je töxyjäy? Com ti ajcxy jadu'n nihiixtujcpi miiðdzínay'abídzímgixy.

²⁹ Chi Jesús je' ajcxy y'adzooy:

—Miich ajcxy ca' mhuinjihuüy je tiy'ajt, com ca' mnejhuüygixy Dios y'ayuc ytiy'ajt, e com ni ca' mnejhuüygixy je mic'ajt huídibi Dios ymiið. ³⁰ Pues co anajty yjugypijccixy je jäy tiibi y'öccixy, chi ca' ajcxy ypi'ga'n, e nañ jadu'n ni ca' ajcxy ñaymöhuiyb y'ung huen pijccixy. Hue' ajcxy yjugy'adaangixy chinähuaangixy jii by tzajpjoty, tim jadu'n nej je ángeles ajcxy chinaaygixy jugy'ajtcixy. ³¹ Per je tiy'ajt co jäy ajcxy tiibi

y'öccixy yjucypigaangixy jadüg'oc, jëbi mbaatcixy jada tÿy'ajt ma Dios ñecy. Dios ci'm jadu'n mïnañ: ³² “Tich je' je Dios huïdibi Abraham, Isaac etz Jacob yDios'ajtpy.” Com yï Dios ca' yï' yDios'aty ma yï öcpi ajcxy. Yï Dios Dios'ajtp yï' ma yï juugypï ajcxy.

³³ E co je mayjäy jadu'n mïdooy, chi ajcxy ooy tzachjihuïy tzachhuinmaay je Jesús y'ixpïjcïn.

Je ane'mïn huïdibi ooy ycopïcyity

³⁴ E co je fariseos ajcxy nejhuïy co Jesús ana-jty ti yaj'amoñyï je saduceos ajcxy, chi ajcxy ñayyöymujctaayï. ³⁵ E jim anajty tüg leyhuindzïn huïdibi Jesús anajty jot'ijxyp huinma'ñ'ijxyp, chi y'amïdooy:

³⁶ —Huindzïn, ¿ma yï maybi Dios ycötujcïn, huïdibi yï' jaccopïcyïp?

³⁷ Chi Jesús y'adzooy:

—Tzoc jihui' etz yajmïj'at nHuindzïn'ajtm Dios mïd tüg'ócïy m'aa mjot, etz mïd tüg'ócïy m'alma, etz mïd tüg'ócïy mhuinma'ñ. ³⁸ Jada je' jadu'n je Dios ycötujcïn huïdibi jaccopïcyïp, etz huïdibi tim jayïjpïp. ³⁹ Je mïmetzpi Dios ycötujcïn jahueengi tú'cïy ñaybadyï mïd je jayïjpi, yï' huïdibi jadu'n mïnamb: “Tzojccix jihuiïygix yï mmïgügtïjc, tim jadu'n nej mnaychogyï nayjihuiïyï ci'm.” ⁴⁰ Jada Dios metzpi ycötujcïn jaccopïcy jacmïc'ajt mïd ca' jac huïdibi cötujcïn huïdibi Moisés etz je profetas ajcxy yejc.

¿Pïn je' y'ung je Cristo?

⁴¹ E ma anajty jim tüg mucy yjac'ïjtcixy je fariseos, huin'it Jesús yajtïy:

42 —¿Nej miich ajcxy huinmay m̄id Cristo? ¿P̄in je' y'apmang?

Chi ajcxy y'adzooy:

—Je David je' y'apmang.

43 Chi Jesús ajcxy n̄imay:

—¿Na'amy co David anajty ti ym̄ina'ñ co Cristo hue' je' ȳi' yhuindz̄in? Jadu'n ti capxy David anajty m̄id je Dios ȳihūi'ñ ym̄ic'ajt, ym̄ina'ñ:

44 Je Huindz̄in Dios n̄imay ñich nHuindz̄in: “Íña' ma ñich n'a'oy'amy, ixti coon̄i ñich miich nyajm̄imadäḡip ma je mm̄idzip ajcxy.”

45 ¿Nej jēb̄i David ym̄i'ap'adyii je Cristo? Com David c̄'m ym̄ina'ñ co Cristo ȳi' je' yhuindz̄in.

46 E nitüg'aa ajcxy yca'adzohuimbijty. E jadu'n nej je x̄i tiempo yjacn̄icx anajty ca' ni p̄in ocja-cyajt̄i'yñi hūidijaty ayuc.

23

Jesús x̄iy ajcxy je fariseos etz escribas

1 Chi Jesús n̄imay je mayj̄ay etz ȳi' ydisc̄ipulos ajcxy:

2 —Je escribas etz je fariseos ajcxy chachnayḡöm̄aaȳiḡixy co ȳi' ajcxy jajtp nej capxti'cxipy je c̄otujc̄in hūidib̄i Moisés yjaay jecy'ajty. 3 Oy co ajcxy mguydun̄ipy jadu'n nej ȳi' ajcxy xyaj'ixpijccixy Dios y'ayuc, capxym̄idooḡix nej xyñimaaȳiḡixy per ca' mdunḡixy hūidib̄i ȳi' ajcxy ytumb, com ȳi' ajcxy oy ycapxcixy e ca' ajcxy cuydunḡixy. 4 Ȳi' ajcxy n̄igo yajcoj̄cixy canaag costumbre hūidi je j̄ay ajcxy ca' m̄imadäga'ñ, e ca' ajcxy pa'ayoy je j̄ay, tim jadu'n nipaady nej j̄ihūiy t̄üg tz̄im̄y ti mooyḡixy jemxyp̄i hūidib̄i ca' je j̄ay

ajcxy mĩmadäga'ñ, e yi escribas etz fariseos ajcxy ni ca' ycĩhuäx yajpaadaangixy je tzĩmy. ⁵ Tüg'óciy huĩdi yi' ajcxy ytumyb, je' ajcxy ytumyb co huen jāy ajcxy ıxyii, jaydēbi yajcōmay ajcxy. Yi' ajcxy yajhuimboc-huĩnıyigixy etz ñayyajcĩhuĩnıyigixy Dios y'ayuc. Nayxojxcixy mĩd huit yooñjatypi co chachcōmayaangixy. ⁶ Ooy ajcxy tzocy iñaybejt ma je' iñäy je ane'mbi ma jāy ajcxy yxĩduñ. Ooy ajcxy tzocy yi cōdumbi iñaybejt ma je naymujtac. ⁷ Yi escribas etz fariseos ajcxy oy tzojccixy co ajcxy yajcapxpooxip huĩndzigi'ñ'amy mayjāyduum. Etz nañ jadu'n ajcxy tzocy co jāy ajcxy yajmij'adıyb nej huĩndzĩndijc ıxpıcytjic. ⁸ Miich ajcxy ca' jadu'n m'a'ıxıhuıpy co ajcxy xytijıpy huĩndzin com nidüg'óciy miich ajcxy mnaymıgüg'ájtıgixy, etz tūgpajc je' huĩdibi miich ajcxy mhuĩndzin'ajtpy yi' je' Cristo. ⁹ E nañ jadu'n miich ajcxy ya naaxhuıñ, ca' oy ni pın mdeedy'adıyb co mĩd miich ajcxy tūgpajc je mDeedy, huĩdibi jıiby tzajpjoty. ¹⁰ E nañ ni mganaydijıyb ajcxy mij ane'mbi, com yi Cristo je' tūgpajc miich ajcxy mmij'ane'mbi. ¹¹ Je pın jaccapxymıdoob ymıgügtjic, je' je' mij'ajtin mĩd ma miich ajcxy. ¹² Pınjaty huĩdibi cı'm naygōmayıp, tzöydu'nbaadıp je', e pınjaty naybidaacıp nıcy xeemy, je' je' capxpaady y'idıpy.

¹³ ¡Ay miich ayoob ajcxy fariseos etz escribas ajcxy! Miich ajcxy mnaybidáacıgixy nej jıhuıy ooy mdudägyjāy, e ca' yjanchıty. Miich ajcxy mgoyüchpy je Dios ytıy'ajtin nej huaad jāy ajcxy ytıgıy jıiby tzajpjoty ma Dios y'ane'my. Ni miich ajcxy mgatıgıygıxy, e nañ ni mga'a'ıxıygıxy co huıngbi ytıgıhuıp.

14 ¡Ay miich ayoob ajcxy fariseos etz escribas ajcxy! ¡Miich ajcxy m'aanidacp! Miich ajcxy myajcijxtaayi yi co'ögy ytöxyjäy ypidägy mïd ajcxy m'adzojcin, e mdungixy ooy jecy tzajpcapxy-capxi, jigix capxpaady mbidzimipy. Dios niigi chaachytunip miich ajcxy mïd mbocy ycixpi, ca'ydi jac pin jäy.

15 ¡Ay miich ayoob ajcxy fariseos etz escribas, miich ajcxy naybidaacigixy tudägy, e ca' yjanchity! Mhuinyöy'abidzimyb miich ajcxy je naaxhuiñybi, co mgapxhuäcxa'ñ je m'ixpijcin ma je tügpj jäy. E co ajcxy je' myajmibicy, huin'it mejtz jadu'ñyi je pocy anajty mïdity je jäy, ca'ydi miich ajcxy.

16 ¡Ay miich ayoob ajcxy huidibi jadu'n iditzp nej tügi huintzpi huinhuoy! Miich ajcxy minamb co pen tüg jäy tuñ yhuandaacin, e ñbaati capxpaati Dios ytijc, chi ca' cuyduñ je huandaacin. Per pen ñbatpy capxpatpy je oori huidibi jiiiby ma Dios ytijc, huin'it janchity cuyduñ je huandaacin.

17 Tzuudijc locidijc huidibi ca' huinjihuïy je tïy'ajt. ¿Huidibi jaccopicyip: je oori o je Dios ytijc ma je oori yoxy ity?

18 Nañ jadu'n miich ajcxy mina'ñ: “Pen tüg jäy huandaacin tuñ, e capxpaady je altar ma Dios yajhuindzigïy, chi ca' cuyduñ je huandaacin. Per pen capxpaady je huindzigï'ñ tzüch ma je altar ma Dios yajhuindzigïy, chi cuyduñ yhuandaacin.”

19 ¡Tzuudijc locidijc huidibi ca' huinjihuïy je tïy'ajt! ¿Huidibi jacmij'ajtin ymïd je huidibi ti yajyoxy o je altar? 20 Pinjaty capxpatp je Dios ytijc ma Dios yajhuindzigïy y'agapxmuctaayb anajty huidijaty jiiiby yajpaatp ma Dios yajhuindzigïy. 21 Pinjaty

capxpatp je Dios ytijc, ca' anajty jëyi capxpaady Dios ytijc, nañ ycapxpatp anajty Dios huïdibi jiiiby tzinaayb. ²² Pinjaty capxpatp je tzajp, nañ capxpatp anajty Dios y'ane'mdac quipxyi miid Dios huïdi tzinaayb jiiiby.

²³ ¡Ay miich ayoob ajcxy fariseos etz escribas ajcxy, huïdi naybidaacip tudägy, e ca' yjanchity! Miich ajcxy mooyb Dios je tügpicy je majcpi huïdibi je' paatip, ixti yi tzajnimang, yi ruda etz je pi'c'ujtz'ay ung. Per ca' ajcxy mduñcuenti je cõtujcin huïdibi jaccopicyity. Miich ajcxy ca' mdzinäy tïydudägy miid je migügtijc. Miich ajcxy ca' mmïdity pa'ayo'n miid je' ajcxy huïdibi ayoob jottigooyb, etz ca' mmibijccixy Dios. Jada ixypy ajcxy mbaadumy, e mooygixy Dios je tügpicy je majcpi. ²⁴ ¡Tzuudijc locitijc! Miich ajcxy ti m'anajxyp je uux, e mgojinnaaxcixy je camello, je mijpi iyujc.

²⁵ ¡Ay miich ayoob ajcxy fariseos etz escribas ajcxy, miich ajcxy naybidaacip nej tudägy jäy, e ca' yjanchity! Jiiiby jotjoty huinma'ñyjoty miich ajcxy miidity jibicpi. Miich ajcxy miid je ca'oy'ixii etz je adzojcin. Tim jadu'n nipaady nej jihuiy myajhuächpy ajcxy yi tasi ninïcx yi texy ninïcx, e chi myajhui'my jibicpi ma tasi jot ma texy jot. ²⁶ ¡Tzuudijc miich ajcxy! Jayijp yajhuadz jiiiby jotjoty texy tasi, huin'it hui'm nañ jadu'n huadz nigix'amy.

²⁷ ¡Ay miich ayoob ajcxy fariseos etz escribas ajcxy, miich ajcxy naybidaacip nej tudägy jäy, e ca' yjanchity! Jadu'n miich ajcxy nipaady nej öcpi jut. Je öcpi jut nigix janch oy yquëxigy, per

mijpocy ñigĩdaccoda'ñ je jäy ajcxy huĩdibi tziinaayb jadachambi tiempo.

Jesús yäxy miid Jerusalén cajp ycixpi

³⁷ ¡Miich ajcxy Jerusalén jäy! ¡Miich ajcxy Jerusalén jäy! Jerusalén jäy huĩdibi jecy'ajty yaj'ögy je profetiitjc etz ycögächpy ajcxy je Dios ycogapxy. Canaag'oc ti njayajtügmujtähua'ñich miich ajcxy, jadu'n nej tzeydaj yajtügmujtäy je' y'ung ma yqueec pät, per miich ca' m'a'ixiıygiıxy.

³⁸ Oc'ix miich ajcxy nej mdiıc abac yhui'maangıxy.

³⁹ Janch tiı'ajt jadu'n nej niımaaygiıxy co camina miich ajcxy xy'ixıpyıch jadüg'oc, ixti cooni paadıpy je xıı je tiempo co jäy ajcxy ymiına'nıpy: “Cömay yi huĩdibi miimb miid nhuindzin Dios yxıı etz ymic'ajt.”

24

Jesús ymiına'ñ co Dios ytıjc yhuındıgoyıpy

¹ Ma anajty Jesús ti ypidzimni ma Dios ytıjc, niıcxp anajty, huin'it Jesús ydiscıpusos ajcxy ñimıjhuäcı. Yi' ajcxy anajty yaj'ixıydähuamyb je Dios ytıjc, com ooy anajty chachmiıtıjıcy.

² Chi Jesús ymiınañ:

—Huındıcx miich ajcxy jada maybi miıjıaty ytıjc. Miııpy xıı tiempo miına tüg'ócıy jada tiıc niıcxıy yhui'my taj xit, ca' ma tzaamacxy. Huındıgoydähuıpy tüg'ócıy.

Je tiı'ajt ma ca'ni naaxhuiñybi ycıxa'ñyi ytıgoya'ñyi

³ Chi oy ñicxni ajcxy ma Olivos cögop. E co anajty jim, Jesús y'ñäy, chi ñimaayi ameech je' ydiscípulos ajcxy:

—Eich ajcxy nejhuihuamyb mina jëdu'n ytuna'ñyii yjada'ñyii. ¿Ti je' quëxigamb co anajty miich mhuimbida'ñ ya naaxhuiñ, e co anajty je naaxhuiñybi ytigoya'ñ?

⁴ Chi Jesús nimay ajcxy:

—Mnaygüend'adiib ajcxy, ca'ydi pin xyhuin'ingixy. ⁵ Ooy mayjäy ñaybidägáanigixy miid ich nxii, naybidägáanigixy co je' ajcxy je Cristo, ymina'na'ñ ajcxy: “Eich je' je Cristo.”

⁶ Co miich ajcxy ayuc midohuipy co jäy ajcxy chachtziptungixy ñayñibidigigixy xi ya, chi ca' ajcxy mdzigüygixip, com ooy ycopicyity co jadu'n jayjip ytuniyb yjadiyb. Ca' nan hue' je' anajty tim cijxp tim tigooyb je xii je tiempo. ⁷ Nayñibidigiiib naax cajp miid huingbi naax huingbi cajp, e gobierno miid huingbi gobierno. E miinip mic'ujx canaag'it etz mij yuu etz mij pa'm xi ya. ⁸ Jada tzaachypi ayo'n oga'ni anajty chondägy huidibi nminaxaanim nyajnaxaanim. ⁹ Huin'it xii huin'it tiempo miich ajcxy myajciyegipy, jigix xychaachytungixipy e xyaj'ogixipy. E tüg'óciy je maynaaxhuiñjäy xyca'ixáangixipy, miid ich nxii ycixpi. ¹⁰ Je huin'it tiempo may je jäy ajcxy yajtigoya'ñ ymibjcin. E nañ jadu'n ñayca'oy'ixáanigixy etz ñayñigapxáanigixy ñi'ojihuáanigixy miñ xyipy. ¹¹ Ooy may quëxigaangixy aanidaacpidijc mina'naangixy co Dios y'ayuc ytiy' ajt nimiydaci, e mayjäy oy huin'inaangixy. ¹² E je' co ajcxy xii jimijt

ñajtzniñicxiñyñi jac tim niği jibicpi tunaangixy, ca' ajcxy y'ocnaychójcinipy miñ xyipy. ¹³ Per pinjaty tydudägy panixp je mibijcin, je' ajcxy ypaadip y'alma nüdzoocin. ¹⁴ Copicy co jayjip yajcapxhuäcxa'ñ huindu'ñybi naaxhuiñybi Dios y'ayuc ytiy'ajt jemybi, jaydēbi jāy ajcxy nidüg'ociy nejhuñy Dios ytiy'ajt. Huin'it je naaxhuiñybi yciñxiñi ytiğooñi.

¹⁵⁻¹⁶ Je profeta Daniel jaay jecy'ajty jada ayuc (miich ajcxy pinjaty capx jada necy huinjihuñygyxy) ma mīnañ: Miich ajcxy co m'ixy pinjaty jibic-huinma'ñ tumb nej ca' ypadyii ma Dios ytijc, huidibi ooy ycodziğijity, chi miich ajcxy huidibi tzinaayb jim Judea, co jadu'n m'ijxcixy, chi nicx mgueectzóocixipy mic'amy ma tungop. ¹⁷ Pinjaty huidibi yajpatp ma ytijcnicx ca' nicxy tijaty yajpidzimy ma ytijc. ¹⁸ Yi jāy ajcxy huidibi yajpatp camjoty, ca' ajcxy huimbidiy co yajpidzimipy tijaty ma ytijc. ¹⁹ Huin'it tiempo ayo'n ypadamy je töxyjäy ajcxy huidibi anajty y'ungdzim'ijt, e nañ jadu'n je' ajcxy huidibi mīid y'ungma'xung. ²⁰ May'ajt ajcxy mbijctzooñipy yi Dios co jada jadu'mbi ayo'n ca' ytunñyb yjadiyb ma anajty ytichtiempojity, etz ma anajty pocxinñijoty. ²¹ Huin'it oy ayo'n jotmay ytuna'ñyii yjada'ñyii huidibi nicamina ycatuñyii ycajadyiini mabi naaxhuiñybi chondägy e nicamina jadu'n ycajactunñyb ycajacjadiyb. ²² Pen ca' Dios capx'aduga'ñ yjiibi ayo'n xii ayo'n tiempo, ni pin ca' chögipy. Per Dios ycapx'adugamy yjiibi ayo'n tiempo mīid je mibijcpidijc yciñxiñi huidibi Dios ti huin'ixy. ²³ Co yi jadu'mbi xii

tiempo anajty ymiñ, ca' mmibíjccixipy, pen ji pinjaty xyñimaaygixy: “Ijxcix, cha yajpaady je Cristo”, o “Jim'amy yajpaady je Cristo.” Ca' mmibíjccixipy. ²⁴ Pues miinip jäy ajcxy huídibi huin'inaangixy ymígügtijc. Ci'm ñayyajnaxáanigixy jadu'n nej jihuiy je' yCristity, e ymináangixipy co capxhuäcxy ajcxy Dios y'ayuc, e ca' yjánchity. Ytunip ajcxy mijhuinma'ñ etz mijpi iixpejt, ixti jëbi jahuin'ingixip je mayjäy huídibi Dios ti yhuin'ixyii. Per ca' Dios a'ixihuipy co yhuin'innyb yi' yjäy. ²⁵ Ti ñich yi' jayijpni nigapxich. ²⁶ E co pinjaty ajcxy xyñimähuipy: “Chim je' je Cristo mijtigídumb”, ca' ajcxy mninixcip. O co pinjaty ajcxy xyñimähuipy: “Chiiby je' tigoty yhuingoyüch”, ca' ajcxy mmibigipy. ²⁷ Hich je' je jäy huídibi tzoon tzajpjoty, nhuimbidaambich ya naaxhuiñ mñd je tñcxin je jájin, jadu'n nej je huídzuc huídi tñcxp xñbidzimyb ixti xiigidägy. ²⁸ Ma je öcp ninicx yajpaady jim ññmujctähua'ñ je luud ajcxy.

Nejjada' je' Dios y'ung ymiinipy

²⁹ Co anajty ti ñaxy je ayo'n xñ ayo'n tiempo, huin'it je xñ ycoodziygídäga'ñ, je po' ca' ytñcxa'ñ, je madza' ycädähua'ñ etz janch mic je tzajp yücxa'ñ. ³⁰ Co yi' jadu'mbi ytunnyb yjadnyb, chi quëxiga'ñ tzajpjoty je iixpejt co ñich, je jäy huídibi tzoon tzajpjoty, nhuimbida'ñich ya naaxhuiñ. E chi tüg'óciy je mayjäy tájip máyip yjihuihuipy yäxipy, chi ajcxy ixipy je jäy huídi tzoon tzajpjoty miñ anajty jocjoty mñd ymic'ajt y'oy'ajt. ³¹ Chi nguexipyich ángeles ajcxy co huen mic yajxüxy ajcxy ytrompeta, jigix

yöymujctähuiipy tüg'óciy pínjaty huin'ijxyp xi ya ma ajcxy yajpaady ya naaxhuiñ; ma xii pidziymb, ma xii cidägy, ma jünboj pidziymb, ma tichpoj pidziymb.

³² Jim miich ajcxy ijxpejt mbigipy ma je higueri quipy jadu'n nej je xii tiempo ymiiñ cidägy. Co je higueri quipy jadüg'oc pidägipy je' y'aay'ung, huin'it miich ajcxy nejhuñhuiipy co yhuingoni mina ypottigiiñi. ³³ Tim jadu'n nej tiy'ajt mbijccixy ma je higueri quipy co jada ajcxy jadu'n ixipy nejhuñhuiy co yhuingoni anajty je xii je tiempo jün'aguy tijc'aguy. ³⁴ Janch tiy'ajt jadu'n nej nimaaygixy co tüg'óciy ytunañyii yjadañyii ma ca'ni anajty je jäy y'öctäy huidibi anajty jactzinaayb huin'it tiempo. ³⁵ Je tzajp etz je naaxhuiñybi cixam tigoyam yi', per ich n'ayuc ca' ycixa'ñ ytigoya'ñ nimina.

³⁶ Ca' ni pín nejhuñy je xii je hora mina nhuimbidañich ya naaxhuiñybi. Ni je ángeles ajcxy canehuiñy, ni je Dios y'ung canehuiñy. Tügpaic je Dios Teedy nejhuñy.

³⁷ Com jadu'n nej yjajti ya naaxhuiñ jecy'ajty, co je Noé chinay, nañ tim jadu'n yjadipy co anajty nhuimbityich, yi jäy huidibi tzoon tzajpjoty, ya naaxhuiñ. ³⁸ Jecy'ajty co anajty ca'ni je ayo'nduu ymiiñ ya naaxhuiñybi, hue' je' mayjäy ajcxy chinay agujc jotcuic, ycaaygixy y'uuccixy etz yajpijccixy je y'ung y'anäg, ixti cooni paty je xii tzuu co ytigiiy Noé barcojoty. ³⁹ Je mayjäy ajcxy ca' ajcxy cuentuñ co ayo'n miina'ñ anajty, ixti cooni je ayo'nduu miin e öctay ajcxy je jäy niijoty. Jadu'n nej yjajty jecy'ajty mid je mayjäy huidibi tzinaayb anajty

quipxy miid Noé, nañ tim jadu'n yjada'ñ miid je jäy ajcxy huudibi tzinähuiþ jac jiini co ðich anajty nhuimbityich ya naaxhuiñ jadüg'oc. ⁴⁰ Je huin'it tiempo co nhuimbidityich jadüg'oc ya naaxhuiñ, chi metz yëdyjc yajpaadipy ma ytundac, tüg je' yajminicxa'ñ, e tüg je' yhui'ma'ñ. ⁴¹ E mejtz töxyjäy yajpaadip anajty yjich, tüg je' yajminicxa'ñ, e tüg je' yhui'ma'ñ.

⁴² E paady miich ajcxy ni'ixi'ijtcix, xyjiip'ixipyich com ca' mnejhuuygixy mina miich ajcxy je mHuindzin ymiina'ñ. ⁴³ Mnejhuuygixy miich jada co ixypy je ungededy nejhuüy ti hora je meetzpi miina'ñ, ca'p je' ymahuiþy, e ca'p a'ixihuiþy co je meetzpi ytigihuiþy tigoty. ⁴⁴ Nañ tim jadu'n miich ajcxy ni'ixi'ijtcix, je' co ðich, je jäy huudibi tsoon tzajpjoty, nhuimbida'ñich ma ca' ni pin anajty nejhuüy.

Je tumbi tudägyþi etz je huudibi ca'p ytudägyty

⁴⁵ ¿Huudibi tumbi je' ya huudibi tumb miid yhuindzin janch cixyjot huinjot huudibi miid xpijcin, huudibi je' yhuindzin mooyipy ane'min ma ytijc, huudibi yajnidagihuiþy ma ymigügtijc caayin uucin mina ypadyii? ⁴⁶ Janch jotcuyc je tumbi co yhuimbiditye je' yhuindzin, e je' cuyduñ jadu'n nej je' yhuindzin ti ñimäyii. ⁴⁷ Janch tiy'ajt jadu'n nej nimaaygixy co je huindzin ytumbi yajnigohuajc'adyii tüg'óciy huudibi ymiid. ⁴⁸ Pen je tumbi jibicjäybï mina'ñ jotjoty huinma'ñyoty: “Huäcxijpni ðich je nhuindzin.” ⁴⁹ E chi nïmajtztägip ymigügtijc, e ytigihuiþ caaybi uucpi miid amügyjädyjc; ⁵⁰ chi je tumbi yhuindzin minipy ma ytijc huudi xiï mina je tumbi ca' anajty

aa'ixy jijp'ixy e ni je hora anajty canejhuüy.
 51 Chi huindzin tzaachytunip je' ytumbi, etz
 ypidägipy miid je jacjadyii jäy ajcxy yajpaady
 huidibi naybidáacigixp nej tudägyjäyity e ca'
 yjanchity. Jiiby ayoodactuuby yjihua'ñ yäxa'ñ
 etz huinmucxa'ñ huingueda'ñ ytitz miid jotmay.

25

Je ijxpejt ma je majcpi töxy'anäg

¹ Co anajty nhuimbityich jadüg'oc ya
 naaxhuiñybi jadu'n nipaadip nej je nimajcpi
 töxy'anäg co ñicxy ajcxy ñayjijpcobadihuáanigixy
 miid je yëydijc huidi pigamb. Chi minicxy ajcxy
 aceite lámpara co yajticxaangixy. ²⁻⁴ Nimigoox
 je töxy'anäg huidi cohuinma'ñity etz ahuing
 minicxy jadüg quiig ujtz miid aceite. E nimigoox
 je töxy'anäg ca'pi ajcxy cohuinma'ñity, e ca' ajcxy
 ahuing minicxy jadüg quiig aceite. ⁵ E je yëydijc
 huidibi anajty pigamb huäcxijpni ooy, chi je
 töxy'anäg ajcxy ooy ytigiiyñi mä'uuybi. ⁶ E mijcuctz
 ajcxy midoy co tüg jäy mic mina'ñ: “Chi miñ je
 yëydijc huidibi pigamb, nicx jijpcobadiiygixy.”
⁷ E huin'it je nimajcpi töxy'anäg ajcxy ypidictay.
 Chi ajcxy yjin ni'ixiiy nidüg nidüg. ⁸ Chi je
 nimigooxpi huidibi ca' ycohuinma'ñity nimay
 je nimigooxpi huidibi cohuinma'ñip: “Fich ajcxy
 hueeni mooygich yi m'aceite, co pidzaanip ich
 ajcxy njin.” ⁹ Chi y'adzooy je cohuinma'ñybi
 ajcxy: “Ca' nyega'ñich, je' co ca' ich ajcxy nje'
 yhuaadihua'ñ. Nicx miich ajcxy juy jim ma
 ytoogyii.” ¹⁰ E ti anajty ajcxy ñicxy aceite juuyb
 je huidibi ajcxy ca' ycohuinma'ñity, co oy yjäty

je yëydjç huidibi pigaanip. Chi je cohuinma'ñybi ajcxy miid tigiy tigoty je yëydjç huidibi pigaanip. Chi tijc yaj'agiyy. ¹¹ E com jecyñi oy yhuimbity ajcxy je huidibi ca' ycohuinma'ñity. Chi ajcxy yminañ: “¡Huindzin, Huindzin, ocyaj'ahuädz mdijc!” ¹² Chi je' y'adzooy: “Ca' ñch miich ajcxy n'ixy'adyii.”

¹³ Chi Jesús yminañ:

—Nayñi'ixiyyigix, je' co ca' mnejhuuygixy mina ñch nhuimbida'ñich jadüg'oc ya naaxhuiñ.

Je ijxpejt ma je meeñ

¹⁴ Co ñch anajty nhuimbida'ñich jadüg'oc ya naaxhuiñybi, jadu'n nipaadip nej jadayaabi ijxpejt, co anajty tüg comeeñyäjy chona'ñ viajetumbi, chi je' ytumbi ajcxy mooy je meeñ co huen cuend'ajtcixy. ¹⁵ Je ymidügpi tumbi moy migoox mil meeñ. Je mimetzipi moy mejtz mil. E je ymidugigpi moy tüg mil. E jadu'n ajcxy moy nije' nije' nej huaad cuend'ajtcixy. Chi choñ je huindzin viajetumbi. ¹⁶ Je tumbi huidibi cidigiiyi migoox mil meeñ, ytigiy ajuybi adoocpi. Chi je' ymeeñ y'ung'ajty jamigoox mil. ¹⁷ Nañ jadu'n huidibi cidigiiy mejtz mil, ytigiiy tumbi miid je meeñ. Chi je' ymeeñ y'ung'ajty ja mejtz mil. ¹⁸ Je huidibi cidigiiy tüg mil hue' oy pidägy je meeñ tützjoty. Chi tajiy, e yützi je yhuindzin ymeeñ. ¹⁹ E com jecyñi oy yhuimbity je huindzin. Chi ytigiiy cuenta yaj'oyiyyb miid je ytumbi ajcxy. ²⁰ Chi miñ jayjip je huidibi anajty ti cidigiiyi migoox mil meeñ. Chi je tumbi yajcidigiiy je' yhuindzin majc mil meeñ. Chi yminañ: “Miich ti xymooyich migoox mil meeñ, e ñch ti nyaj'ung'atyich jamigoox mil.”

21 Chi je' yhuindzin mīnaañ: “Janch jotcuje ñich cham co jadu'n ti mduñ mīd je hueenbi meeñ. Miich ooy mdudägy etz oy ti mduñ, e paady njacmōhuamyb jacmay. Tig'i' ma ñich, e xondäg mīd ñich.” 22 Chi ymiñ je huídibi anajty ti cīdigīyī mejtz mil meeñ. Chi ñimay je yhuindzin: “Miich xymooyich mejtz mil meeñ, e ti nyaj'ung'atyich jamejtz mil.” 23 Huin'it je' yhuindzin ñimaayi: “Janch jotcuje ñich cham, co jadu'n oy ti mduñ mīd ñich nmeñ, e paady njacmōhuamy jacmay. Tig'i' xondäg mīd ñich.”

24 E co oy yja'ty je huídibi cīdigīyīb tūg mil meeñ, chi ñimay je' yhuindzin: “Huindzin, hue' ndijyich miich myēydīc'aty janch jibic jāy. Miich cosecha myajpidīc'py ma ca' ti mnīpy etz miich mgosecha myajpidīc'py ma ca' ti ti mhujy. 25 Paady ooy ndzigīyich co je meeñ ngayaj'ung'adīpyich. E co miich mhumbida'ñ, mdzogamy je mmeñ, e paady je mgi'mmeñ ti nyūchich, je' co ndzigīyich co ñicxy nyajtīgooyich miich mmeñ. Cha je meeñ huídibi ti xymooyich.”

26 Chi je' yhuindzin ñimaayi: “Jibic tumbi miich, ooy mnuuxity. ¿Nej ti mnejhuīy miich co ñich cosecha nyajpidīgyich ma ca' ti ti nnībyich, etz cosecha nyajpidīgyich ma ca' ti ti nhujyich? 27 Oy co ixipy miich je ñich nmeñ ti myejc'anucxy, e jim ixipy y'ung'at. E cham co ti mhumbityich cham ixipy je nmeñich xycīdigīyich mīd nimeñ'ung.”

28 Chi je huindzin ñimay je jacjadyī tumbidīc: “Pijci ajcxy yī meeñ huídi ymīd, e moogyix yī huídibi majc mil ymīd. 29 Je huídibi oy tumb jacya-jmōhuamb je' anaxy, e ymīd'adamy je' conaxpi. Je'

huidibi hueen mïd yajpigamb je' huidi ymïd, je' co ca' oy ti ytuñ mïd je hueenbi. ³⁰ Yi jïibi tumbi huidibi ca' oy ytuñ, pidäg ajcxy agootztuuby ma yjïhuipy yäxipy, ma ytïtz huinmuucx huingueedip mïd jotmay.”

Co anajty naaxhuiñjyäy ajcxy yajtyduñ

³¹ Co ïch, je jäy huidibi tsoon tzajpjoty, nhuimbity ïch anajty jadüg'oc ya naaxhuiñybi, huin'it n'ixtäga'ñich ma ïch n'ane'mdac etz ane'mañich mïd ïch nmij'ájtïn etz n'oy'ajtïn.

³² Chi tüg'ócïy je naaxhuiñjyäy yajtügmuajtähua'ñ ma ïch. Nhuäcxamybich jadüg jadüg jadu'n nej jäy ajcxy huäcxy je cöbixy etz je chiibo ajcxy.

³³ Nbidägaamybich a'oy'amy je jäy ajcxy huidibi oy ti ytungixy mïd ïch. E yi' ajcxy jadu'n nipaadip nej cöbixy. Nbidägaamybich anajty'amy yi jäy ajcxy huidibi jibic ti ytungixy mïd ïch. E yi' ajcxy jadu'n nipaadip nej chiibi.

³⁴ Chi nnimähuibich yi jäy ajcxy huidibi a'oy'amy: “Miingix miich ajcxy huidibi Dios Teedy ti xyconuucxy ajcxy. Je'ájtigix ane'mdac huidibi ijtp ni'ixï mïd miich ajcxy ycixpi maabi naaxhuiñybi chondägy. ³⁵ Ma anajty ïch nyuubögyii miich ajcxy ti xyajcaayich; ma anajty ïch ndidziyii, miich ajcxy ti xyajn'ügyich; ma anajty ïch niहुidityich, miich ajcxy jättac ti xymöyich; ³⁶ ma anajty ïch je nhuit ti nyajmayjatyich, miich ajcxy ti xymöyich je huit; ma anajty ïch nbigyijich, miich ajcxy ti xycuend'átyich; etz co anajty ïch pujxtigoty nyajpaady, miich ajcxy ti xycogapxiyich.”

³⁷ Huin'it ymına'na'ñ je jäy ajcxy huıdibi oy ti ytungıxy mııd ıch: “Huındzin, ımına ıch miıch ajcxy ti n'ixy ayuu, e ti nyajcay? O ımına ıch miıch ajcxy ti n'ixy co mdıdzıyii, e ti nyajni'ügy? ³⁸ ımına ıch miıch ajcxy ti n'ixy co miıch mnihuıdity, e ti nmöy jättac? O ımına mhuit ti myajmayjaty, e ti nmöy je mhuit? ³⁹ ımına ıch miıch ajcxy ti n'ixy, co miıch mbigyii, e oy ti ngüend'aty? etz ımına ıch miıch ajcxy ti n'ixy co pujxtıgoty myajpaady, e oy ti ngogapxıy?” ⁴⁰ İch, je mij'ane'mbi, n'adzohuımbıdıpyıch: “Janch tıy'ajt jadu'n nej nnımaaygıxy co yı jäy ajcxy huıdibi oy ti ytungıxy mııd pınjaty huıdibi xymıjnıcxpejtpıch, nañ jadu'n oy ti ytungıxy mııd ıch. Ca' ñejıty co jäy ajcxy ymınañ co ca' ypınıty je jäy huıdibi xymıjnıcxpejtpıch.”

⁴¹ Chi ıch, je mij'ane'mbi, nımähuıbıch je jäy ajcxy huıdibi yajpatp: “Huınhuäctuutcıch miıch ajcxy jıbcjäydıjc. Nicxy miıch ajcxy mıjıınjoty, huıdibi ijtp ni'ixı mııd je mujcu' ycıxpi etz mııd je' y'ángeles ajcxy ycıxpi. ⁴² Ma anajty ıch nyu-ubögyii, ca' miıch ajcxy xyajcaayıch; ma anajty ıch ndıdzıyii, ca' miıch ajcxy xyajni'ucyıch; ⁴³ ma anajty nıihuıdityıch, ca' miıch ajcxy xya-jjättägyıch; ma anajty ıch nhuit xytıgoy'ıjtıgıch, ca' miıch ajcxy huit xymooyıch; etz ma anajty ıch nbigyii e nyajpaadyıch pujxtıgoty, ca' miıch ajcxy xycogapxııyıch.” ⁴⁴ E chi je' ajcxy ymına'na'ñ: “Huındzin, ımına ıch ajcxy miıch ti n'ıjxcıxy co anajty miıch yubögyii tıdzıyii, o co anajty mnihuıdity? ımına ti n'ıjxcıxy co ca' mhuit mııdity, o co mbigyii, o co anajty pujxtıgoty myaj-

paady, e ca' ñich ajcxy miich nbubejty?"

⁴⁵ Chi ñich, je mij'ane'mbi, n'adzohua'ñich: "Janch tiy'ajt jadu'n nej nnimaaygixy. Huen tim pinity huidibi ca' miidity pa'ayo'n miid je' ajcxy huidibi xymijnicxypejtpich, oy jäy yjamina'ñ co ca' ypinity, ñich miich ajcxy anajty jadu'n ti xytuñich."

⁴⁶ E jada ajcxy nicxip huinixi ayoodactuuby, e yi tudägypi ajcxy nicxip ma yi jugy'ajtin huinixibi.

26

Je huinma'ñ nej anajty Jesús madzaangixy

¹ Co Jesús nigapxtay tüg'óciy jadayaabi ayuc, chi nimay yi' ydiscipulos ajcxy:

²—Miich ajcxy mnejhuib co huixtic je amayxi, je pascua xii. Pascua xijoty ñich, je jäy huidibi tzoon tzajpjoty, nyajciyega'ñich ma nmidzipich etz xyajcruutzpeda'ñich, xyaj'öga'ñich ajcxy.

³ Je huin'it xii je teedy huidibi tungmüd ajcxy, je escribas, etz je mijjäydijc ajcxy ñayyöymujctayi ma je' ytiba' je teedy huidi jacmijtungmüd huidi anajty yxi Caifás. ⁴ E jim ma Caifás ytiba' jim ajcxy huinma'ñy'ixtay nej jëbi yajmachycägixy Jesús miid anii etz yaj'ögaangixy. ⁵ Chi ajcxy ñayñimaayi miñ xyipy:

—Ca' y'oyity co xijoty nmajtzim Jesús. Ca' jecyity co je mayjäy xymijotma'ttayim etz ytigihuij ajcxy huambi jihuiybi.

Tüg töxyjäy pidacy aceite ma Jesús ycohuajc

⁶ Jesús anajty yajpaady Betania ma Simón ytijc, je Simón huidibi anajty ymiid je jibic nibüdiz pa'm.

⁷ E ma anajty Jesús ycaj, huin'it ymiñ tüg töxyjäy miid tüg quiig ujtz miid perfume huidibi ooy oy

yxuugy, jada perfume ooy anajty choohuüty. Chi je töxyjäy yaj'ahuäch je quiig, e yajcöyogiy Jesús je perfume huidibi ooy oy yxuugy. ⁸ Co Jesús ydiscípulos ajcxy jadu'n ijxy, chi ajcxy mijotma'ty je töxyjäy. Chi ajcxy ñayñimaayi miñ xyipy:

—¿Ti co jada perfume huidibi ooy oy xuugy ayoy? ⁹ Tzou ixypy ooy jada yajtoocy, jaydëbi ixypy mïid yajpubet je ayoobtijc.

¹⁰ E co Jesús nejhuüiy nej ajcxy yminañ, chi nimay:

—¿Na'amy co m'amayïy jadayaabi töxyjäy? Yi' huidibi ti tuñ, je' yi' tüg oybi. ¹¹ Je ayoobtijc ca' ytigoy'ida'ñ ma miich ajcxy nimina. Huen huidibi xii huen huidibi tiempo jëbi miich ajcxy mbubedipy ayoobtijc. Hich ca' n'ida'ñich jecy ya mïid miich ajcxy. ¹² Jada töxyjäy ti pidägy ma hich nninïcx perfume huidibi ooy oy xuugy, jayijp ca'ni nnaaxtigïyich. Jadu'n je' jijp'ijxpy mina nnaaxtigïhua'ñich. ¹³ E huentimma'amyity je Dios y'ayuc anajty yajcapxhuäcxy huindu'my naaxhuiñ jim yajnigapxa'ñ jadu'n nej je töxyjäy ti tuñ cham mïid hich, e jadu'n je mayjäy jäymedzipy jada töxyjäy.

Judas cïyecy yi Jesús ma ymidzip agojïx

¹⁴ Chi nidüg je' ydiscípulos huidibi yxii Judas Iscariote oy nimäy je teedy mijtungmïidpi, ¹⁵ nimay ajcxy:

—¿Ti ajcxy xymöhuibich co ngïyegïpyich Jesús?

Chi ajcxy moy iipxmajc plata meeñ. ¹⁶ Co ajcxy meeñ ymooy, chi mic'amy Judas yhuinma'ñ'ixtay nej jëbi cïyecy Jesús ma ymidzip.

Jesús y'adzuu'ajty pascua x#joty

17 Je ymidügpí xii, je amayxii, je pascua xii ma anajty yajcay je tzajcaagy huidi ca' levadura m#dity, huin'it je' ydiscípulos ajcxy nimiiñ Jesús. Chi ajcxy yajtiy:

—¿Ma mdzocy co #ch ajcxy ni'ixihuip huidi mgayamy je pascua xii cixpi?

18 Chi Jesús y'adzooy:

—N#cx miich ajcxy jim Jerusalén ma tüg jáy ytijc, e mnimähuiip: “#ich nHuindzin jadu'n minamb co yhuingoñ je' yxi yhora, e paady ma miich mdijc yi' tunañ je pascua xii adzu'ajt#n m#d ydiscípulos ajcxy.”

19 Huin'it Jesús ydiscípulos ajcxy cuyduñ jadu'n nej Jesús anajty ti ñimäyii. Chi ni'ixiy ajcxy je pascua adzuu'ibi.

20 E co chu'iy, chi Jesús y'ixtacy ma je mesa m#d je nimajmetzpi ydiscípulos. 21 E ma anajty ycaaygixy, huin'it nimay je nimajmetzpi:

—Nidügti miich ajcxy huidibi xcy#yegaambich ma nm#dzipich.

22 Huin'it ajcxy yjajtay taj may. Chi ajcxy yajtiy:

—Huindzin, ¿nej #ch jada'ji?

23 Chi Jesús y'adzooy:

—Yi huidi m#d ndocxmucyich, yi' je' jadu'n xcy#yegaambich ma nm#dzipich. 24 Janch tiy'ajt co #ch n'öga'ñich, jadu'n nej je profeta jaay jecy'ajty. ¡Ay ayoob je yeydijc huidi xcy#yegaambich! Jac'oy co ca' ycama'xung'aty je huidibi xcy#yegaambich.

25 Chi Judas yminañ:

—Huindzin, ¿nej #ch jada'ji?

Chi Jesús y'adzooy:

—Miich jadu'n minamb.

²⁶ E ma anajty ajcxy yca, huin'it Jesús tzajcaagy conigy. Chi yajnajxy Dioscojuyip. E chi jada' tujchuäcxy je tzajcaagy. Chi moy je nimajmetzpi ajcxy je tzajcaagy, e ymíañ:

—Cay miich ajcxy jadayaabi tzajcaagy, yí' je' ñich je nninícxich.

²⁷ Huin'it Jesús ciyigy je y'ügy. Chi yajnajxy Dioscojuyip. E huin'it moy je ügy je nimajmetzpi ajcxy, e ymíañ:

—Üc miich ajcxy jadayaabi ügy, ²⁸ yí' je' ñich je nni'pyich. Yí' ñigapxy co Dios tí yaj'aducy je jemybi ayuc. E ñich nni'py ytemañ yoga'ñ miid je mayjäy ycixpi, jaydëbi ajcxy paadip je huin-meecxin miid je ypocy ycixpi. ²⁹ Janch tíy'ajt jadu'n nej nnímaaygixy, co ca' n'oc'ügaanich jadüg'oc je pascua xii ügy, ixti cooni je xii tiempo paadip co ñich ajt n'uucim huinjemybi je pascua xii ügy ma ñich nDeedy y'ane'min.

Jesús nigapxy co Pedro ycoyütza'ñyii

³⁰ E co tí y'íidäy, chi ajcxy choon ñicxy ma Olivos cögot. ³¹ Chi Jesús je' ydiscípulos ajcxy nimay:

—Nidüg'óciy miich ajcxy xy'ixmajtztähua'ñich cham coodz. Je' co jaaybejty jadu'n miin ma je Dios ñecy: “Ögip je cuend'ajtpi, huin'it je cöbixy yöyhuäcxtähua'ñ.” ³² E co anajty ñich njugypicyich jadüg'oc ma anajty tí n'ögyich, chi jayijpni nnicxa'ñich ma Galilea, e jim naybaatim nidüg'óciy.

³³ Chi Pedro ymíañ:

—Oy yi jacjadyiibi migügtjicich xy-jadim'ixmajtztäy, per ni camina xii ich miich n'ixmadzipy.

³⁴ Chi Jesús Pedro nimay:

—Janch t'iy'ajt jadu'n nimäyich, cham coodz ca'ni anajty je tzey yaxigy, miich tugig'oc mina'nip co ca' xy'ixy'adyiijich.

³⁵ Chi Pedro yminañ:

—Oy ich ndim'ögip müd miich, ni camina ngaminá'nibich co ca' miich n'ix'adyii.

E nidüg'ócüy je' ydiscípulos ac tim jadu'n yminañ.

Jesús mibijctzoy Dios jim Getsemaní

³⁶ Chi Jesús ñicxy müd je' ydiscípulos ajcxy, oy yja'tcixy jim Getsemaní. Chi jim Jesús nimay je ydiscípulos ajcxy:

—Ya miich ajcxy oc'ña', miin ich n'ocnicxyich jim'amy Dios mibijctzoobi.

³⁷ E chi Jesús ñicxy müd Pedro etz nañ jadu'n müd je Zebedeo ymang nimetzpi. E jim Jesús ñayjihuiyi janch tajy may mij cajee. ³⁸ E chi jim yajnimay je nidugigpi discípulos:

—Nayjihuiybich taj may ma njot nhuinma'ñ, ixti mabaad anajty n'ögich müd tájin máyin. Hui'm miich ajcxy ya müd ich etz ca' mmaagixy.

³⁹ Huin'it Jesús ñajtzyöyiy mijci'm jahui'. Chi jim ñaygojxtinaydaci naaxcixy, e ytigiy Dios mibijctzoobi, yminañ:

—Dios Teedy, ich nDios, pen jëbi jadu'n, mduñ may'ajt píjcigich jadayaabi tzaachypi ayo'n, per ca' yjadu'nity nej ich ndzojcín mdunipy, jadu'n mdunipy janchtiy nej miich mdzojcín.

⁴⁰ Huin'it Jesús yhuimbijty jím ma anajty ti yajhui'my je nidugügpi. E oy paady ac tím maab anajty ajcxy. Chi nimay je Pedro:

—¿Nej ca' madäga'ñ miich ajcxy co m'idipy juugy tüg hora müd ich ycixpi? ⁴¹ Hui'mi' ya, juugy m'idipy etz mibijctzoo Dios, jaydëb ca' je ca'oybi xymimadägip. Janch tiy'ajt co jotjoty ooy mni-jot'ajtcixy com tunaangixy yi oybi. Per yi mninix ca' ymadäga'ñ nicxy tuñ oybi.

⁴² Chi mimetz'oc Jesús ñicxy oy Dios mibijctzoy, yminañ:

—Dios Teedy, pen copicy co ich nbaadibich je ayo'n, huen jadu'n yjadüyb müd ich nej miich mdzojin.

⁴³ Chi jadüg'oc Jesús huimbijty ma je nidugügpi discípulos, e oy pátnibi maab ajcxy, je' co ca' anajty ajcxy mimadägy mähuii. ⁴⁴ Chi yajhui'my ajcxy, e midugüg'oc ñicxy Dios mibijctzoo. E nañ tím jadu'n oy minaanip jadu'n nej anajty ti y'ocminamb. ⁴⁵ Chi jadüg'oc huimbijtni jím ma je nidugügpi, chi nimay ajcxy:

—¿Máagixni? Póxcix jadachambi. Ti je tiempo yhuaad'ajtni mina ich, je jäy huidibi tzoon tzajpjoty, nyajcüyega'ñich ma yi jibicjäydijc ajcxy. ⁴⁶ Pidiccix, tzoc jámim, chi ymiñ je huidibi xycüyegaambich ma nmidzipich.

Tzomy mach ajcxy Jesús yajnicxy

⁴⁷ Jesús capxni anajty jím co yjäty je Judas. Judas hue' je' nidügti je majmetzpi discípulos huidibi Jesús yhuin'ijx. E je Judas müd ja'ty mayjäy, je huidibi anajty ti quexy je judío teedy mjtungmüdpí etz je mijjäydijc. E je mayjäy hue'

anajty ajcxy m̄id ypujx etz quiipy. ⁴⁸ Judas, je huídibi anajty c̄ıyejcp Jesús, ti anajty jayıjp yecy t̄üg ijxpejt huídibi m̄id j̄ebi ajcxy ijxcapy Jesús. Jadu'n jayıjp Judas ycapxtuñ m̄id je' ajcxy, e ym̄inañ:

—Je j̄ay huídibi anajty ndz̄ücxp̄ich, yı' je' Jesús. Májtzc̄ıx.

⁴⁹ Huin'it Judas nimijhuägy Jesús co capxpcxa'ñ, chi ym̄inañ:

—ıHuindzin!

Chi tz̄ücxı.

⁵⁰ Chi Jesús ñımayı:

—Mıḡüg, ¿na'amy co xyñimijhuägyıch?

E co jadu'n nımay, chi mıc'amy yı' ajcxy majch Jesús. Chi ajcxy yajnicxy tzumy mach.

⁵¹ E huin'it nidüg je Jesús ymıḡüg, juudy je ypujx. Chi tatzpujxtucy je teedy mıjtungm̄ıdpı ytumbı.

⁵² Chi Jesús nımay je' ydiscípulo:

—Pıdäg yı mbujx ma ytıjc. Com pınjaty tzıptumb m̄id pujx, nañ jadu'n y'ögıpy m̄id pujx.

⁵³ ¿Nej ca' mnejhuıy co ıch j̄ebi nbıjctzooyıch cham adzu'x may ángeles, je huídibi xyñihuá'nıbıch ma nmıdzipıch? ⁵⁴ ¿Per nej ycıxıpy yca'pxıpy nej mıñ jaaybety, jadu'n nej cham ytuñyıı yjadyıı m̄id ıch ycıxpi?

⁵⁵ Chi Jesús nımay je mayj̄äy:

—Mııch ajcxy ti xyñıdzonıyıch m̄id je pujx m̄id je quiipy. ¿Nej mdıjy ıch meetzpi o j̄ay yaj'öcpıch? ıch jabom jabom anajty ıñäyıch nyaj'ıxpcıyıch mııch ajcxy jııby ma Díos ytıjc. E ca' mııch ajcxy xymajchıch. ⁵⁶ Huinjıhui' mııch ajcxy co t̄üg'ócıy yam ytuñyıı yjadyıı ca'px tım jadu'n nej je profeta ajcxy cojaay jecy'ajty.

Huin'it nidüg'ócıy je' ydiscípulos ajcxy yqueec-tay. Chi Jesús yhui'my naydügpajc.

Jesús ma naymujcpıdıjc yhuinduu

⁵⁷ Je' ajcxy huıdıbı anajty tı mach Jesús, yajnicx ajcxy jim ma Caifás ytıjc. E jim ma Caifás ytıjc ma anajty tı ñayyöymujctáayıgıxy je escribas etz je mijjáydıjc ajcxy. ⁵⁸ E je Pedro anajty axam nicxy jıguëgy jıhuıy, ixtı coonı yajja'ty ma Caifás ytıba'. Chi jim ytıgıy. Chi ixtacy mııd je cuend'ajtpı ajcxy, je' co oc'ıxa'ñ ocnejhuıhua'ñ nej Jesús yjada'ñ.

⁵⁹ Je teedy ajcxy mıjtungmııdpsı etz tüg'ócıy je judıójáy mıjtungmııdpsı ajcxy huınma'ñ ixtaaygıxy nej jëbı Jesús yajpocycägıxy mııd ajcxy xıhuın, e jadu'n jëbı mooygıxy yı o'cın. ⁶⁰ Mayjáy nıhuambejty Jesús mııd anıı, per nı pın anajty ca' mııdıty tıy'ajt co Jesús anajty tı ytundıgooy mııd judıójáy ajcxy ycötujcın. Jac com jecy mıın metz testigos mııd aanıı. ⁶¹ Je' ajcxy ymınañ:

—Jadayaabı yëydıjc mıınañ co jëbı nya-jhuındıgooyıch Dios ymıjtzejptıjc, e codugıg xıı tı anajty nyaj'oyıyıch jadüg'oc.

⁶² Huın'it je teedy mıjtungmııdpsı ytınayıgy, e nımay Jesús:

—¿Nej co ca' m'adzooy? ¿Nej janch tıy'ajt nej jadayaabı metzpsı testigo ymına'ñ?

⁶³ Per Jesús ca' y'adzooy. E huın'it je teedy mıjtungmııdpsı ñımaayı:

—Nımaayg ıch ajcxy Dios ycıxpı, pen janch mııch je' je Cristo je Dios y'ung.

⁶⁴ Chi Jesús ymınañ:

—Miich jadu'n minamb. Nañ jadu'n ñich miich ajcxy nimäy, co ñich je jäy huïdibi tzoon tzapjoty, miich ajcxy xy'ixipyich tzapjoty ma Dios ymijc a'oy'amy. Nañ jadu'n miich ajcxy xy'ixipyich jocjoty co anajty nhuimbityich jadüg'oc ya naax-huiñ.

⁶⁵ Chi je teedy jacmijtungmïdipi oy yhuit huindzeczy huinma'ch, chi yminañ:

—Jadayaabi yëydijc ti capxtigooy Dios. ¿Ti testigo njac-huaanim? Miich ajcxy ci'm ti mmidoogixy co yi' ti ycapxytigooy ma Dios, e minañ: ⁶⁶ ¿Nej miich ajcxy minaangixy?

Chi ajcxy yminañ:

—Ti ycapxytigooy, copicy co y'ögipy.

⁶⁷ Chi ajcxy huindzujy jïptzujy etz cojxy ajcxy. Chi jacjadyii huingoxy jïpcojxy. ⁶⁸ E chi ajcxy nimay:

—Pen janch co miich je' je Cristo octiygapx pin ti xycoxy.

Pedro yminañ co ca'p Jesús ix'y'adyii

⁶⁹ Je huin'it moñi Pedro anajty iñay tibägujc. Chi ñimiini tüg töxy'anäg tumbi, chi ñimaayi:

—Miich nañ jadu'n ti mhuidity mïd Jesús je Galilea jäy.

⁷⁰ Chi Pedro yminañ mayjäyjoty:

—Ca' nhuinjihuïyich ti mgapxy.

⁷¹ Pedro hue' anajty pidzimmip co ñimiini huingbi töxy'anäg. Chi je töxy'anäg nimay je' ymïgügtijc:

—Jadayaabi yëydijc ti yhuïdity nañ jadu'n mïd Jesús je Nazaretpi.

⁷² Chi Pedro jadüg'oc coyüch je Jesús cixyjot huinijot yminañ:

—Ca' n'ixy'adyiijich yijiibi yëydijc.

⁷³ Jac co hueeni, je jäy huidibi anajty ajcxy jimip ñimay ajcxy je Pedro:

—Janch co miich nañ jadu'n anajty miid mhuidity yi Jesús, com yi m'ayuc yi' xyajniquëxïcp.

⁷⁴ Chi Pedro tigiiy capxpi janch oy ñinej mïnañ huini jot:

—Ca' n'ix'adyiijich yi yëydijc.

E tim huin'itïy je tzey yaxïgy. ⁷⁵ Chi Pedro jäymejtcoody jadu'n nej anajty Jesús ti ñimäyïi: “Ma ca'ni anajty tzey yaxïgy cham coodz, miich tugii'g'oc xycoyützibich.” Chi Pedro pidzimy tïba', e jiiy oy yäxy mïbaad yjotcidägy.

27

Chi Jesús yajcïyejcy ma Pilato

¹ E co oy yxïmïy yticxïy, chi je teedy mijtungmïdipi etz je mijjäydijc ajcxy quipxycapxy co yaj'ögaangi xy Jesús. ² Chi ajcxy yajnicxy cïxoch oy ajcxy cïyecy ma Poncio Pilato je gobernador.

Judas ñayyöctïyi

³ Co je Judas je huidibi anajty ti cïyecy Jesús, co ijxy co yaj'ögaanip Jesús, chi oy yjotmaybaatni. Chi conhuimbijty je iipxmajcpi plata meeñ ma je teedy mijtungmïdipi etz mijjäydijc ajcxy. ⁴ Chi Judas ñimay je teedy mijtungmïdipi etz je mijjäydijc ajcxy:

—Iich ti ndundigooyich co ti ngïyecyich yi tudägyjäy ma miich ajcxy.

Chi je' ajcxy y'adzooy:

—Ti ñich ajcxy n'occuent. Miich yi' mnëgixp tibi mduñ.

⁵ Huin'it Judas cohuijy je meen jii by tzajtigoty. Chi ñicxy. Chi ñayyöcti yi.

⁶ Huin'it je teedy mïjtungmïd pi yajpidïgy je meen. Chi ajcxy ñayñimaayi miñ xyipy:

—Jadayaabi meen ca' yjëbity co nbidaacim ma ofrenda ñigidägy. Je' co yi' yjëjity je huidi ni'py ti tzoo'adyii.

⁷ Huin'it je teedy ajcxy tuñ je quipxycapxy co juyaangixy mïd je meen tüg naax huïdibi jäy ytijp, tütznaax it, ma ajcxy yajnaxtigihui py pinjaty ca' ycogajpity jim Jerusalén. ⁸ Ixti chambaad jadu'n xii'adyii jejimbi it: Ni'py naax. ⁹ E jadu'n ycijx yca'px nej je profeta Jeremías ymïñañ: “E jadu'n ajcxy je' yajpidïgy meen iipx majcpi plata meen (je' choou nej anajty ajcxy Israeljäy ti yajnigödugïy), ¹⁰ e mïd je meen ajcxy juy je tütznaax it, jadu'n nej anajty ti xy'ane'myich Dios.”

Pilato y'amïdooy Jesús

¹¹ Jesús yajpaady jim anajty ytinäy ma je gobernador Poncio Pilato yhuinduu, chi y'amïdoohui:

—¿Nej miich je' judíos jäy xyrey'ajtp?

Chi Jesús y'adzooy:

—Miich jadu'n minamb.

¹² Je judío teedy ajcxy huïdibi mïjtungmïd pi etz je mïjjäydijc tzachxigixy Jesús ma je gobernador. Ni jadu'ñyi Jesús ca' y'adzooy. ¹³ Chi je Pilato ñimay Jesús:

—¿Nej ca' mmïdooy nej yi' ajcxy yxïyi?

14 Per Jesús ni jadu'ñyi ca' y'adzooy. E paady je gobernador oy mij huinmay, ni ca' ocnejhuñi ti ycapxiy.

Jesús y cödujcy y'o'cin

15 Je gobernador jadu'n anajty ycostumbre mädity co jimijt jimijt najtzmaziy tüg machyjäy pascua xijoty, je huidibi je mayjäy ti ytimychojcpy.

16 E jim anajty tüg je machjäy huidibi anajty ajcxy ix'yajttaayb, e yxijity Barrabás. 17 E co anajty jim ti ytügmujctaaygixy, chi Pilato ajcxy y'amidooy:

—¿Pin miich ajcxy mdzojcpy co ñch nnajtzmazihuibichi? ¿Najtzmaziyich Barrabás o Jesús huidibi jäy ajcxy ytijpy je Cristo? 18 Pilato ñejhuñyb anajty co mañ'ájtngix anajty ti cïyecxixy Jesús.

19 Jimni anajty iñäy Pilato me je ycotujctac co je ytöxyjc tiy'ajt quejxy ma yi', yminañ: “Ca' huaad myajtzaachytuñ yi tudägyjäy. Je' co ñch amygoodz ti ngumäyich janch jibic mid yi' ycxipi.”

20 Per je teedy ajcxy etz je mijjäydijc ti anajty capxyjotcidaaccixy je mayjäy co huen yaj-najtzmaziy Barrabás etz huen yaj'öccixy Jesús.

21 Paady co jadüg'oc je gobernador y'amidooy je mayjäy:

—¿Huidibi machyjäy mdzojcpy co nnajtzmazihuibichi?

Chi je mayjäy y'adzooy:

—Najtzmazi' Barrabás.

22 Chi Pilato y'amidooy je mayjäy:

—¿E nej ndunipyich yi Jesús, huidibi jäy ytijpy Cristo?

Huin'it ajcxy nidüg'óciy y'adzoday:

—¡Yajcruutzpet yi Jesús!

23 Chi Pilato ymīnañ:

—Pues, ¿nej ti ytundigooy?

Per je mayjāy nigoob y'adzoday:

—¡Yajcruutzpet! ¡Yajcruutzpet!

24 Pilato yjapubedaan Jesús, per co ijxy nejhuiy co je mayjāy ca' ni nej niducy. Hue' ajcxy oy ytiḡiy huambi jihuḡybi, chach ñayñajtztijḡyḡy mīd jot'an. Huin'it Pilato capxyñiguejxy je huādz nī. Chi ytiḡiy cībuyp ma je mayjāy yhuinduu, e ymīnañ:

—Ca' ḡich ngo'adzohuipyich jadyaabi tudāgyyēdyjc y'o'cīn. Mīich ajcxy yī' mgo'adzoohuipy.

25 Chi je mayjāy y'adzoday:

—Ich ajcxy ngo'adzohuipyich yī' y'o'cīn mīd n'ung anāḡ etz n'ap n'oc.

26 Chi Pilato najtzmaziy je Barrabás. Per Pilato ane'my co huen Jesús yajhuojp. E co yajhuojp-tay, chi cīyejcy, co huen yajcruutzpedyī. 27 Chi Pilato ysoldados ajcxy yajnicxy Jesús ma agujctijc. E jiiby tūḡ'óciy soldadtijc ñayyōymujci ma Jesús.

28 Chi je soldado ajcxy je' yhuit yajnīenducy. Chi ajcxy yajnīeniy je tzapx huit huīdibi je rey ajcxy yajtuumyb. 29 Chi ajcxy tacy tūḡ corona mīd apy. Chi ajcxy yajcōjeniy ma Jesús. E huin'it ajcxy a'oy'amy yajcīgabīy tūḡ je paxy. Chi ajcxy huīngojxtīnay'ahuīy. Chi ajcxy nīxiicy yajxiicy, e ymīnaangīxy:

—¡Ooy ymījity yjanchity, je judíos ajcxy yrey!

30 Chi ajcxy huīndzujy jījptujy. Chi ajcxy yajcīgajptucy je paxy, e yajcōhuojpīgy ajcxy. 31 E co ajcxy nīxiictay yajxiictay, chi yajnīenducy je

rey y huit etz yajñjeniy je yci'm huit. Chi ajcxy yajñicxy ma yajcruutzpedaangixy.

Co Jesús yajcruutzpejti

³² E jim ma anajty hueeni ti ytüyöy, jim ti paty tüg Cirene yëydijc anajty yxiiñity Simón. Chi ajcxy adzíp nimay Simón co huen jaccapi Jesús ycruudz.

³³ E co ajcxy yja'ty ma tüg je it yxiiñip Gólgota, jadu'n yhuimbizim Öcpi Cohuajc Cögop. ³⁴ E jim ajcxy Jesús jayaj'üga'ñ vino temhuidity mïd tzooy, jigix ca' jihuihuip je tzaachypi. Per co uucmajch, chi jihui'ñybijc co ca' y'oy'uucñity.

³⁵ E co anajty ajcxy yajcruutzpety Jesús, chi je soldadtijc suerte ijxy, pin jëbi ocjè'adyii Jesús yhuit, chi yciñxy yca'pxy jadu'n nej je profeta co-jaay jecy'ajty: “Yajhuäcxipy ajcxy ñich nhuit e mïd ñich nhuit yciñpi ixipy ajcxy suerte.” ³⁶ E jim anajty ajcxy iñaaygixy cuend'ajtcixy. ³⁷ Je xihuñ ayuc huidibi ajcxy yjaay ma Jesús ycöduu jadu'n yminañ: “Jadayaabi je' Jesús, je judíos ajcxy je yrey.”

³⁸ Quipxy mïd Jesús ajcxy yajcruutzpejty metz meetzpi. Tüg a'oy'amy, e jadüg anajty'amy. ³⁹ Je mayjäy huidibi ajcxy naxiiyb anajty ma Jesús, ooy anajty oy ycöjigiñ, niñigxy yajxigxy ajcxy Jesús, ⁴⁰ ymina'ñ ajcxy:

—Bah, miich huidibi Dios ytijc jidaanip, e co-dugig xii huingbi myajpidi'ga'ñ. Miich ci'm cham naygohuäñi, e minac cruudzcíxy, pen janch miich Dios xy'ung'adyii.

⁴¹ Nañ jadu'n je teedy ajcxy huidibi mïjtungmïdipi, etz je escribas, etz je fariseos

ajcxy etz je mijjädijc nixiicy yajxiicy ajcxy Jesús, ñayñimáayigixy miñ xyipy:

⁴² —Huingbi ti cohua'ñ, e ca' jaty nej ci'm ñaygohua'niyb. Pen janch co yi' jējity je Cristo je Israel jāy rey, huen minacy jadachambi ma cruudz, huin'it nmibijcim. ⁴³ Yi' ti pidägy ymibijcin ma Dios; huen jadachambi je Dios yajnödögyii, pen janch Dios chogyii; yi' ti ymina'ñ co Dios y'ung'adyii.

⁴⁴ Nañ jadu'n je metzpi meetzpi ajcxy huidibi cruudzpejt quipxy miid Jesús nixiicy yajxiicy ajcxy ooy Jesús.

Jesús y'ögy cruudzcíxy

⁴⁵ Co yucjcxiiñy, chi ycoodziyday tüg'óciy naaxhuiñybi. E jadu'n je naaxhuiñybi y'ijty coodz, ixti minacy yxii. ⁴⁶ Huin'ítity Jesús ycapxyqueecy janch mic yminañ:

—Elí, Elí, ¿lama sabactani? —yi' jadu'mbi ayuc hue' yhuimbizimy: Dios Teedy, Dios Teedy, ¿ti co ti xy'ixmachich?

⁴⁷ Nijējity jāy huidibi anajty jim yajpatp huingon ma Jesús co jadu'n midoogixy Jesús y'ayuc, chi ajcxy yminañ:

—Jadayaabi yēydijc cham yaaxtaayb je profeta Elías.

⁴⁸ Huin'it nidüg jāy ñicxy janch poyigy etz oy yajzooñ je pixy. Chi je pixy yajxoogy miid je xun vino. Chi pidacy je pixy ma je paxyjijp. Chi yujctijy ma Jesús y'ahuac co huen ügy. ⁴⁹ Huin'it nijējity ajcxy yminañ:

—Ixmatz, tzoc ajt oc'ijxim, pen nimiinip Elías, pen janch yajnödögyii.

50 Jadüg'oc Jesús yaaxqueegy janch mic. Chi oy y'o'cni. 51 Co Jesús y'o'cy, tim huin'ítiy jim ma Dios ytijc je mapxy yhuit ycíitzhua'cxy tiná'amy. E nañ jadu'n je naaxhuiñybi ooy chuyuy miid uyx micpi etz je mijjatychaa oy jüitzhua'cxy. 52 May öcpi jut y'ahuach etz yjugypijcy mayjäy tiibi anajty y'o'ccixy tiibi anajty mibijccixy Dios. 53 Co Jesús yjugypijcy, chi je may'öcpi tiibi anajty jugypijccixy etz tiibi anajty pidzimgixy ma öcpi jut, chi ajcxy ytigiiy ma je Dios ycajp, je Jerusalén. E mayjäy ajcxy ijxy. 54 Co je mic uyx oy ñaxy etz jac tijaty anajty ti ytuñyii ti yjadyii, chi je capitán etz miid jadyii ymigügtijc huidibi anajty cuend'ajtp Jesús ooy ajcxy chigiy yjihuiy, e minaangixy:

—Janch tiy'ajt co yijibi yëydijc Dios yi' anajty y'ung.

55 May anajty nañ jadu'n töxyjäydijc ymij'ijxcixy jiguem huidibi anajty ajcxy Jesús ti miiddzoon jim Galilea. Yi' anajty ajcxy Jesús ypubejtp. 56 E ma je' ajcxy jim anajty chooñity, María Magdalena, María huidibi Jacobo etz José ytaj'ajtpy, etz je huidibi Zebedeo y'ung ytaj'ajtpy.

Jesús yajnaaxtigiiyi

57 Co oy chuu'iiyñi ycoodziiyñi, huin'it chooñ ma Arimatea tüg comeñyjäy huidibi yxi José. E je' ymijnicxpejty anajty Jesús. 58 Chi José ninicxy Pilato oy pijctzou Jesús ñinicx. Huin'it Pilato pidacy y'ane'min co huen möyii. 59 Chi José ycidigiiyi Jesús ñinicx. Chi huinmojch miid tüg poob sábana. 60 Chi yajnaaxtigiiy ma je yci'm jut jemybi huidibi anajty ti yajtzejtztüty ti yajpädüty ma tüg tzahuingueetz. Chi adiguejctujcy je öcpi jut miid tüg tzaa. 61 Chi

José ñicxni. E jim yhui'my María Magdalena etz je jadügpí María, y'ñäy ajcxy ymihuingon öcpi jut.

Je cuend'ajtpí ajcxy ma Jesús ñaaxtigíy

⁶² E com jabom ma anajty Jesús ixíybi ti y'ögy, ma anajty ti ni'ixíydäy miid je sábado xii ycixpi, chi je teedy ajcxy huidibi tungmiid etz je fariseos ajcxy ñayyömuji ma je Pilato. ⁶³ Chi ajcxy ymínañ:

—Huindzin, yi' iich ajcxy njäymejchpyich co je aniidacpi ymínañ ma anajty yjuugyity co codugiig xii jugypíga'ñ jadüg'oc co anajty ti y'ögy. ⁶⁴ E paady tunmay'ajt quexipy soldados ajcxy ma Jesús ti ñaaxtigíy huen cuend'ajtcixy ixti cooni tugíy xíbi paadipy. Ca' yjeyity co ñiminiib adzuum agoodz je' ajcxy huidibi mijnicxpejtíp etz tzinguégípy ajcxy Jesús ñinícx. E chi nícx yäy ymína'ñ: “Ti yjugypicy je öcpi.” Chi anajty jac'anaxy je anii ti yjajtni ca'ydi je jayijpi.

⁶⁵ Chi Pilato ajcxy nimay:

—Miich ajcxy miid tüg pícy soldados huidib cuend'ajtpí ma miich ajcxy. Níxcix miich ajcxy yaj'adujccixy je öcpi jut, jadu'n nej m'a'ixíygyxy.

⁶⁶ Chi ajcxy choni ma je Pilato. Chi ajcxy quejxy je tüg pícy soldados ma je öcpi jut. Chi ajcxy pídac yjxhui'mín ma je tzaa huidibi ajcxy je jut yaj'adiguejctujcy.

28

Co Jesús yjugypíjcy

¹ E com jabom co yximíy ytícxígy je domingo xii, hui'nít nícx María Magdalena etz je jadügpí María ma Jesús ñaaxtigíy. ² Chi tüg mij ujj ñajxy.

Huin'it ycidacy Dios tüg y'ángel huídibì tzomb tza-jpjoty. Chi jidigejcy je tzaa ma je öcpi jut aguü. Chi y'ixtacy ma tzaa ñicx. ³ Janch adicxp je ángel anajty yhuinjip jadu'n nej huídzc, e je yhuít janch poob'ögy. ⁴ E co je soldados ajcxy ijxpaty je ángel, chi ajcxy ooy chuyuygooty. Chi ajcxy yhuí'my jahuengi ögy. ⁵ Huin'it je ángel y'adzooy je metz töxyjäy:

—Ca' miich ajcxy mdzigíy. Ich nejhuybich co miich ajcxy m'ixtäy Jesús je huídibì ajcxy ya-jcruudzpejty. ⁶ Per ca' je' cham ya. Tì je' yjuggycy, jadu'n nej ymíañ. Min miich ajcxy oc'ix ma ñaaxtigíy. ⁷ Nicx miich ajcxy jottigooyb ma je' ydiscípulos ajcxy e nima': “Tì Jesús yjuggycy jadüg'oc, e yí' ñicxip jim Galilea e jim ajcxy mmídnaybadíyb.” Ich miich ajcxy yam nnímaaygíxy.

⁸ Huin'it je töxyjäy ajcxy chooñ janch poyígy ma anajty tì ñaaxtigíy Jesús. Chi ajcxy ñicxy míd tzigi'ñ, per agujc jotcujc. Poyígy ajcxy oy tiy'ajt yecy ma je discípulos ajcxy. ⁹ E jim anajty je metzpi töxyjäy ytüyöy, timetini Jesús ñayguëxici ma je' ajcxy yhuinduu. Chi Jesús ajcxy capxpocxy. Chi je' ajcxy mihuingoñ Jesús etz mineeni je' ytecy. Chi ajcxy huindzigíygyxy. ¹⁰ Jesús míañ:

—Ca' mdzigíygyxy. Nicx miich ajcxy nima' je nmígügtijcich co huen ajcxy nicxy jim Galilea, e jim naybadíybich míd yí' ajcxy.

Huídibì ajcxy je soldadotíjc ñigapx

¹¹ E tüyöybñi anajty je töxyjäy nimetzpi co nijëjity je soldados ajcxy chooñ ma Jesús ñaaxtigíy ñicxy jim Jerusalén, mídmíydäga'ñ je teedy huídibì

tungm̄dp̄i nej anajty ti ytuñyii ti yjadyii ma Jesús ñaaxtiḡīy. ¹² E huin'it je teedy ajcxy ñayyöymujctayi m̄id je mijjädijc, tunaangixy quipxy capxy. Huin'it je teedy ajcxy etz je mijjädijc moy ajcxy je soldados may meeñ. ¹³ Chi ajcxy nimay:

—Miich ajcxy m̄ina'n̄ip co maab anajty miich ajcxy mijcoodz co ymiiñ Jesús ydiscípulos ajcxy etz tzingueeci Jesús ñinīcx. ¹⁴ Etz pen ymidooyb anajty yi gobernador, ñch ajcxy ngapxjotcidägich, jigix ca' nej xytúngixipy.

¹⁵ E huin'it ajcxy je soldados yc̄idiḡīy je meeñ. Chi ajcxy ñicxy cuyduñ jadu'n nej anajty ajcxy ti ñim̄äyii. E ixti chambaad jadu'n judíojäy capx je ayuc.

Huidibi Jesús yajñibijc ydiscípulos ajcxy

¹⁶ E jadu'n ajcxy ñicxy je nimajctügpi Jesús ydiscípulos ajcxy jim Galilea. Chi ajcxy ñicxy ma je cögop jadu'n nej anajty Jesús ti ñim̄äyigixy. ¹⁷ E co ajcxy ijxpaty Jesús, chi ajcxy oy huindziḡīy. Per jim nijëjity huidibi ca' m̄ibijcy co anajty yjëjity. ¹⁸ Huin'it Jesús ymijhua'cy ma yi' ajcxy, e nimay:

—Ñich ti nyajm̄öyich je cötujc̄in jiīby tzajpjoty etz ya naaxhuiñ. ñich ti nyajm̄öyich je mij cötujc̄in, jaydëbi n'ane'myich jiīby tzajpjoty etz ya naaxhuiñ. ¹⁹ E paady ñicx miich ajcxy huindu'my naaxhuiñ capxhuäcx̄ic̄x je ayuc, jaydëbi jäy ajcxy xymibiḡīpyich. Tüg'óciy jäy ajcxy huidibi xymibijc̄p̄ich myajñibedipy ajcxy m̄id Dios yxī, Dios y'ung yxī, etz m̄id je Espíritu Santo yxī. ²⁰ Miich ajcxy myaj'ixpiḡīpy je mayjäy co copicy cuydunipy ajcxy ñch ngötujc̄in tüg'óciy jadu'n nej ti n'ane'myich miich ajcxy. E miich ajcxy

mnejhuñyb co nmñd'ityich miich ajcxy huinixñ
huinñtiempo, ixtñ mabaad naaxhuiñybñ anajty
ycixpi ytigooy. Jibaad ycixy. Amén.

El Nuevo Testamento en mixe de Coatlán **New Testament in Mixe, Coatlán (MX:mco:Mixe,** **Coatlán)**

copyright © 1976 Wycliffe Bible Translators, Inc.

Language: Coatlán Mixe (Mixe, Coatlán)

Translation by: Wycliffe Bible Translators, Inc.

Mixe, Coatlán [mco], Mexico

Copyright Information

© 1976, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixe, Coatlán

© 1976, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2018-11-16

PDF generated using Haiola and XeLaTeX on 11 Nov 2022 from source files
dated 29 Jan 2022

4190de74-18ab-52cf-ba4e-5f99ab05892f